

# Locasiicha laenai

## Ena Nenea Cana Coaunera Ere

---

### Teofilo rai Locasiicha laenai quiricha

**1** <sup>1</sup>Arajii cachaaurute caa canacaanu jana Jesoso ichanohichuru laenacurelu. <sup>2</sup>Nii laenaeraaurute nunuhe caje coaaneein aina amuhemujueein niicha coarai que canacaanu relaeraneein neeuruhane coina tenojoinnein neurelu. <sup>3</sup>Nii jaunna, canuhetonai satiin coitucuurera caje bajaau, rai nunuhe caje coaaneein colalajiin, caohachaain coitucuhanune coina. Nii jana, carai netonai jataain caohachaane jaunna carai nelatein neeine rai laenaau Teofilo, <sup>4</sup>esinae rauhijiriin erenea niha nii ii relaauruhane jaa esenetaain caohachaain coitucuhin neeine coina.

### Nejanoarichaa in cache baotisaera Joanne biha anjerane

<sup>5</sup>Jodea batane curuaanaa- *rey* neein niha leinjiin Jorionein nenea Erodesine bana jetaote, ichoaelu leinjiin Cana Coaunera aina caohachaain niha cachane coina rucuhanein nenea saseredote Sacariasi. Aca jetaote, acaauru inoansi saseredotecuru Abiasa lauri caje nenaanelu. Nii jana rai sinijera Isabeli jetaote, jauriaanejeein saseredotenein nenea Aaroon nefoera-teeuru caje nenaanelu. <sup>6</sup>Acaauru

jetaote, esinae rauhijiriin jiniiquin Cana Coaunera esenetaain naitoonjoan tonoraain neurelu. Nitohaneunruhane jaun jetaote nii chuni- acaauru que chatohanai ujuaitena nainecurenelu.

<sup>7</sup>Nejetaote, canaanai sirina inaeniha nii Isabeline jaun, leinjiinejei canaanai sirilanaala jiniiquin biinaaneurelu.

<sup>8-9</sup>Nitohanein jetaote, inae Cana Coaunera notaracae saseredote neeuruhane ichanohin jujui mocooruhane coina neeuruha Sacariasi laurichurune jaa cojoinacaque tihane jaun jetaote, nitohaniha saseredote neeuruhane ichaone jaun, Sacariasi que tacaajeein dadae, rori ichoaae tein jujui mocoha Teenforo asaaene coina.

<sup>10</sup>Nitohanein jujui mocoha enohane tonohanau jetaote, aere neein Cana Coaunera bajae bajaecure leeochoauru saseredotecuru aina cachaauru.

<sup>11</sup>Nii jana jetaote, Sacariasi rai ecocohin, nii jujui mocohane jaa rori raotono nichajai que jetao chujujuae Cana Coaunera letono anjera. <sup>12</sup>Nii jaun jetaote, nii anjera coariin, nesoonetiin cojoaelatoha Sacariasine jana jetao:

<sup>13</sup>“Coo nesoonetohara Sacariasi. Bajaebajaequiine aonajian Cana Coaunerara. Nii ii sinijera Isabelite leinjiin canaanai siricheeincha. Acate Joann neein curuaateriquincha.

<sup>14</sup>Chaentechu aina jataain raotojoein neriquincha. Leeochaauru cachaauru netonaite nejanoa coroaecurureein, <sup>15</sup>jataain Cana Coaunera rai nelateinnein nerichainne jaunra. Coatiha bino, abariinti, naaonjoainuri corinaainta. Acate esinae rauhijiriin Cana Coaunera suujue que suujuecoha cureein nejanoaane ajiniha caje coauneeincha. <sup>16</sup>Acate, Cana Coaunera Ere tonoraai che Israeli cocoaichaneichene caina ichareeincha. <sup>17</sup>Nii Joaante turuha uheneni Cana Curuaanaa ajiniha cureein, Cana Coaunera ere bera inoansi Irihasi rai niicha tei suujueque suujuequiin- Cana Coauneraacha ichana nainei ichaain naaonjoaaincha. Acate aicheein calaohichuru aina jiniiquin ita que suujua acateein neeuruha acaauru fojaraaurune coinara. Chaen erenaa tonorana jeriheichuru netonai erenaa tonoraain naaonjoaauruhane, raotojoein Cana Curuaanaa ranaa nainecuruhane coinara,” naa rai nii anjerane jaun jetaote:

<sup>18</sup>“Inasiine bajiaa nitohaneein nerichaaunnine esenetareeun, inae casinejera aina jiniiquin jataain biinaanihacaanu natiinta,” naa Sacariasine jana jetaote:

<sup>19</sup>“Canune, Cana Coaunera letono Cabirieli neeun. Acate caletoe, ichei caa erenaa raotono bihanune caina.

<sup>20</sup>Nete caa ichei aitocooaunne esenetareeine jaun, ena caje coauneei caa ichei caitoonjoan cojoinaca que tihanereein tiaain erenaachara neein neriquincha,” nae jetao Sacarias rai nii anjera.

<sup>21</sup>Nii tonohanau jetaote, aerene neein Sacarias cohacuruha cachaurune jana, jataain carajaane jaun jetao, “Chana jataain ichae carajaain Teenforo asaae caje mituenihane caina,” naain jetao ita caje bajaaure nii aerene neein coharaauru.

<sup>22</sup>Nii jana jetaote, tabiicha acaauru rene eresilanaala Teenforo caje mituha uhe nii Sacarias, acaauru rai biji nejesinaacha que bihajein. Nii jaun jetaote: “Jerihanete chaelai coaratih Cana Coaunerane jaa coaracaiha Teenforo asaaera,” naaunre jetao ita rai.

Nii caje nunuhetein jetaote, erenaa nainelanaala nelu Sacarias.

<sup>23</sup>Inae nitohanein teenmforo asaae niicha ichanenu nainain jetaote, jelaiha nenajaun cauha cue Sacarias.

<sup>24</sup>Nii baiha neeonriin, inae ausirinein jetaote, rai loreri caje amuelanaala ecuhacha ne saoqui ateein rai sinijera Isabeli:

<sup>25</sup>“Cana Coaunerate, caa catohanein caete, nabana caque nererojoecaain jaolecooruha cachaurune coataa,” naain suujua ereein.

#### **Nejanoarichaa in Jesosone biha leinjiin anjerane**

<sup>26</sup>Inae saota ateniha canaanai siriha Isabeline jana jetaote, Calileea batane que nena Nasareteu jetao, leinjiin letono anjera Cabirieli letoae Cana Coaunera. <sup>27</sup>Chariji bana quicha aina ichoaelanaala nena leinjiin ranuna Mariha rene turuha cuhane caina. Nii ranuna jetaote, cana inoensihuru curuaanaa Rabiri neferatenein nena Jose que nelanajaane rai ne.

<sup>28</sup>Nitohanein cuhin jetaote, nii niha Marihane jaaun rene turuhin enohin jetao:

“Ii renena bedaeniha uunra, Cana Coauneraacha rausiajei. Jataainte ii rausiaje Cana Coaunerara” naa rai nii anjerane jaun jetaote, <sup>29</sup>coaariin nesoonetiin: “Chanuna caritiin ere canu rai,” naa suujua cuhane Marihane jana jetao,

<sup>30</sup>“Cooa nesoonetohara Mariha. Cana Coaunerate ii janiji, ii rai caohacha

ichaane coina. <sup>31</sup>Inae leinjiin canaanai siririquiinch. Inae nejanoaane jana Jesoso neein curuaateenicha. <sup>32</sup>Acate itolere cacha amurijiriin itolere que nelateinnein, acaihaniji Cana Coaunera Calaohineein nenaanein coitucua cuurureein cachaaurura. Nii jana Cana Curuaanaa Cana Coaunerate, nii rai foeratera inoensihuru curuaanaa neein nena Rabiri rijijieein *reynein* tereein, inara Curuaanaanein nihane, <sup>33</sup>rai nere tonoraache inara Israeli cocoaichaneichene, chabana satonoelanaala inara Curuaanaanein nihane coinara,” naa nii anjerane jana jetao:

<sup>34</sup>“Inasiine bajiaa nitohanein leinjiin canaanai siricheeun nii chuni cacha aina ichaohanune coalanaalata,” naa Marihane jana jetao:

<sup>35</sup>“Cana Coaunera Suujuete aiha suruaane rijijieein ichoae fauha ureein, leinjiin canaanai siriine coinara. Nii jaunte nii canaanai iicha sirii, Cana Coaunera Calaohinereeincha.

<sup>36</sup>Ii araai Isabeli netonai techu, inae leinjiin canaanai siricheeincha. Inae biinaa nihane sainejeeinte inae canaanai siricha. ‘Canaanai sirina inaenihane jaun jete canaanai sirine,’ naauruhane jaate, inae saota atene rai canaanaicha. <sup>37</sup>Coatiha Cana Coaunera rai caaintaai chata,” naa Mariha raine jana jetaote:

<sup>38</sup>“Aihachuhisicha. Niicha belai nichaanne rai aitohine rijijieein, niicha ichana jerei ichamiin Cana Coaunerara,” naa Marihane jana jetao, inae jelai caje amue nii anjera.

#### Isabeli rene turuha cuha Marihane

<sup>39</sup>Nii bana jetaote, erojoein cuhin Jodea bichatane que nena neseu cuhin Isabeli rene turuha cue jetao Mariha.

<sup>40-41</sup>Nitohanein cuhin jetaote, inae ecu turuhin Sacariasi loreri asae enohin, Isabeli rai iriha Marihane aonaain jetao,

Isabeli suri cuhane neein nerurujuae nii rai canaanai.

Nii jaun jetaote, Cana Coaunera Suujue que suujuequuin jetao, <sup>42</sup>jataain tonijiaain:

“Cana Coaunerate, itolere enecuru rai caohacha ichaane amurijiriin ichei caohacha ichae. Nii rijijieeintechu nii ii calaohi rai netonai caohacha ichae.

<sup>43</sup>Nii jaun chaneeinna jana nereun canu, Cana Curuaanaa nebaneine saijieein carene turuha uhine coina.

<sup>44</sup>Nii carene turuhin ereeine aonaainte, rachoojoenaa caaun canu suri cuhane neein nerurujuae carai canaanai. <sup>45</sup>Nii jaunte raotojoein neei, ii rausiaaeca nii ichei aitoaha Cana Curuaanaa esenetaain tonoraaine jaun,” naa Mariha rai Isabeline jana jetaote:

<sup>46</sup>“Aihanuchujian.

<sup>47</sup>Canu suujuate, itolere niicha ichana naineei ichaain, canu ichoterateein niha Cana Curuaanaa Cana Coaunerane jaun corojaje,

<sup>48</sup>rai chanein nenihanune saijieein canu janijiin canu rausiaaeca Cana Coaunerane jaun.

Nii jaunte ena caje coauneein Cana Coauneraacha rausiajeineein cacurujuatiha cuurureein itolere janonaa bana cachaauru,

<sup>49</sup>nitohanein jataain canu belaiha itolere que nelatein itolere ichana nainera Cana Coaunerane jaun. Leinjiin acaachate Acanein ne.

<sup>50</sup>Nii Cana Coaunerate, cairichaojoaai itolere bana que suujua acatein ichaonacaauru coarae.

<sup>51</sup> Nitohaneein itolere niicha  
ichana nainei ichaainte,  
nii chaque nelatelanaala neeuruha  
nii itolere que nelaetoha  
nocoetonacaaurune coina  
icharaneein ne.

<sup>52</sup> Chaentechu, curuanaacuru  
reychuru nihanatiin,

<sup>53</sup> inae cha nelanaala  
neeuruhane coina ichae.  
Chaentechu,  
nii leeochoauru rai  
chaque nelatelanaala  
cairicheinejeein nenacaauru  
rausiaeraneein ne, itolere que.  
Jana nii coriqui nebaneein  
nenacaaurute,  
nii cha colane bijiicha baejeein  
niha cuurureein.

<sup>54</sup> Aihane jaunte  
rai cacha Israelitanichaachene  
cairichaaajoain cana  
coaraane jaun,  
cana coroatajanereein,

<sup>55</sup> inae nitohaneein ichaane coina,  
cana inoansi Abaraun,  
nii rai inamacooru,  
naaonjoainuri rai aitovalu  
Cana Coaunerane jaun,”

naain jetao Cana Coaunera coroaje Mariha.

<sup>56</sup> Nitohaneein turuha cunajau nichata  
ateein Isabeli aina nihane baiha jetaote,  
jelaiha nenajaun cauha cuelu Mariha.

**Inae nejanoaa cacha coujunacateein  
baotisaera Joanne**

<sup>57</sup> Inae nejanoaane que tiha nii Isabeli  
rai canaanaine jaun jetaote, quicha  
cojoaajineein janoae rai neba Isabeli.

<sup>58</sup> Nii jana jetaote, rene turuhacoain  
jetao coroaeca cuure rai naraichuru  
aina rai laurijiracuru, rai caohacha  
ichaa Cana Coaunerane coitucuruha  
raotjoeine jaun.

<sup>59</sup> Inae fosa janoniha nii canaanai  
nejanoane jana jetaote, amain rai  
jaberoco cari saerateein jetao, rai inaca  
Sacariasi curuaa que jetao curuaatena  
jerecure. <sup>60</sup> Ne jetaote jerelanaala:

“Aihei, jiaohine. Joaan neein curuaa-  
canete caohachae,” naa rai nebane jaun  
jetao:

<sup>61</sup> “Chanuna. Inasiina niha niritoco-  
joaain curuaajaain charaaine coalanaala  
niritocohare rai curuaa,” naain jetao  
jerecurene.

<sup>62</sup> Niritiin jetaote, nii canaanai inaca  
coujeluhin: “Tohanriani rai curuaata,”  
naain jetao bajaure coitucuruhanane coina.

<sup>63</sup> Nii jaun jetaote, acaauru caje que  
teen laenaane jaanu bajaee jetao biji  
nejesinaacha que. Nitohaneein bajaain  
jetaote, “Joaan neein curuaacanete ne,”  
naain jetao laenae rai inaca, jaiti  
mituheniha rai nerene jaun. Nii jaun  
jetaote, satiiin cojoelatoore cachaauru.

<sup>64</sup> Nii rijieoritiin inae nacoaneein  
mituha nerene jaun jetaote, rachoo-  
joeiin Cana Coaunera coroaje Sacariasi.  
<sup>65</sup> Nii jana jetaote, nitohanihane jaun  
cojoelatoore rai laurijiracuru coarajeu-  
rera. Nii jaun jetaote, itolereenein Jodea  
bichatane batane sacuritaain coitucuhin  
ita rai beebejerejetocurelu.

<sup>66</sup> Nii aonaain cojoelatiin jetaote:  
“Chatohanai neeinna nereein nii  
canaanai,” naaure jetao, esinae  
rauhijiriin niicha jerenohineein nena  
nihane coaratihia acaauru que Cana  
Coaunerane coaracuruhanane jaun.

**Rachoojoiha Sacariasine**

<sup>67</sup> Nii jana, nii canaanai inaca  
Sacariasi suujueniha neein que beratihia  
Cana Coaunera Suujuene jaun jetaote:

<sup>68</sup> “Jataainte caohacha ichae  
Cana Curuaanaa Israeli  
Coaunerara,

- raotojoeein neeuruha  
rai cachaaurune coina,  
ichoteratiha uhana jaunra.
- <sup>69</sup> Nii jaunte,  
cana inoensihuru curuaanaa  
Rabiri nefoerateneein,  
jataain itolere amurijiriin  
nelateein laraajiin nenea letoae,  
jianacoon cana mitaeraanu quera.
- <sup>70</sup> Inae catohanein  
ichaane coinata,  
rai nere bera inoensihuru  
que beratelura.
- <sup>71</sup> Itolere  
cana que nererojoecaain,  
cana aina nejerateein nenacaaru,  
naaonjoaihunri caje  
cana mitaane coina  
aitohalune jaunte,
- <sup>72</sup> nii baitena nainene,  
cairichaaajoaain  
cana inoensihuru coaraain  
aitohalune jaun,  
Cana Coaunerara.
- <sup>73</sup> Nitohanein  
esinae rauhijiriin ichaane coina,  
cana foeratera inoensi Abaraau  
rai:
- <sup>74</sup> Jianacoon,  
cana aina nejeratenacaaru caje  
jete cana mitaane,  
cha que casilanaala nere tonoraain  
leinjiin raacha nelateein,
- <sup>75</sup> esinae rauhijiriin  
caohacha nejesina ichaain,  
baaso coacuelanaala  
inoenlu netojoein,  
itolere janonaa bana  
nerichaacheeinje,  
naain belu Cana Coaunera,  
cana foeratera inoensi Abaraau  
rai.
- <sup>76</sup> Jana ii, cacalabineeinete,  
acaihanijin Cana Coaunera  
neein nenea ere beranein,

- Cana Curuaanaa ajiinchatera  
neein niha curiquiin,  
jeriha Cana Coaunerane rijijieein,  
turunaa nainihane jaanu  
beebejeeine coina,
- <sup>77</sup> acauru osa caje  
acauru ichoteraterichaaain  
Cana Coaunerane  
coitucuuruha cachaaurune coinara.
- <sup>78</sup> Jataain cairichaaajoaain  
cana coaraane jaunte,  
dede caje cana rai  
ena nenea Cojoanonaa teein  
ne Cana Coaunera,
- <sup>79</sup> nocohena tabai caje nichoteein,  
nii rai Cojoanonaa que  
neconaain cuhin,  
cana rai niicha tenojoin  
raotojoein rachoojoein  
ichaonaanaja que  
turuacachene coinara,”

naain jetao nii canaanai inaca Sacariasi  
suujueniha neein que beratihana Cana  
Coaunera Suujue.

<sup>80</sup>Nii jana jetaote, esinae rauhijiriin  
Cana Coaunera Suujue que suujuequiin  
jetao, fohejeein cujue nii canaanai.  
Nitohanein fohejeein ichauhenanein  
jetaote, cacha areroo amuhemujueein  
nelu, rai lauri Israelitacuru que  
necoitucueratihane reein tiaaajoaain.

### Nejanoa Jesosone (Mt 1.18-25)

**2** <sup>1</sup>Nii nejanoa rai niha Jesosone bana  
jetaote, itolereenein cana rai  
chauratane sacuritaain cachaauru  
letoaelu reychuru curuaanaacuru  
curuaanaa enferadoro Aogosto, satiin  
cachaauru janijiiin acauru curuaacuru  
cocoirichauruhane coina. <sup>2</sup>Nii jauriaa-  
nejeein cachaauru curuaa cocoirichaa-  
ruhane bana jetaote, Siria batane  
coberenadoro neein nelu Sirenio. <sup>3</sup>Nii

jaun jetaote, satiin acaauru foeratera-curu atane cuhacoain, quiricha cuhane curuaa teratiha cuhacoaurelu lauri lauri caje uhin ecu turunacaauru cachauru.

<sup>4</sup>Nii jaun jetaote, Calileea batane que nena Nasarete caje cuhin jetao, Jodea batane que nena Beleeun cuelu jetao Jose, jelai caje nejanoanaaneein nihalu rai foeratera reyneein nenaalu Rabirine jaun. <sup>5</sup>Nii jaun jetaote, canaanai cousurihu niha Marihane jana, aina jiniiquin quiricha cuhane curuaa laenaratiha Beleeun cue jetao Jose, ita raauruhane rai netiin. <sup>6</sup>Nii jana inae nejanoaane que tiha nii Mariha rai canaanaine jaun jetaote, nii Beleeun neeurunajau nejanoaelu rai canaanai. <sup>7</sup>Nitohaneein, inae nejanoaa nii jauriaa-nejeein nena rai calaohine jana jetaote, rai belaae que conaconariin jetao, baca lenone omane ichoae tocoecae rai neba, neniha loreri turuurunajaanune jaun baca coloheri asaae neeuru jana nejanoaane jaun.

**Carenero beraihurera renete  
turuure anjeraauru.**

<sup>8</sup>Nii jana jetaote, Beleen rohan neeure fasoto jana janoajihanaain, letononeein carenerocuru beraihurera cachauru. <sup>9</sup>Nii jana jetaote, acaauru rai ecooca Cana Coaunera letono anjerane jana jetao, acaauru curuhacaain jilinetoha Cana Coaunera conone jaun, luaa nesoonetoore eluhatohane jaun. <sup>10</sup>Nejetaote acaauru rai: “Coa nesoonetohachera. Raotojoein satiin rachoojoein neriquicheeine jaanune inara rai jataain erenaa caohachaneein biha uunra. <sup>11</sup>Eneete inara inoensihuru curuaanaa Rabiri neseu nejanoae inara Curuaanaa- inaraacha cohajei Mesihasi jianacoon inara ichoterateraanura. <sup>12</sup>Caa inara rai aitocooaunne jaate,

coaraa cuhichene, baca coloheri asaae omane ichoaae rai belaae que conaano-joinnein tocoecoha jana eruha curiquicheeinch,” <sup>13</sup>naa acaauru rai nii anjerane rijieoritiiin jetaote:

<sup>14</sup> “Jataain rachoojoein  
Cana Coaunera coroaecuruhine  
dedeeu.  
Raotojoein rachoojoein  
neeuruhine cau chauratane quene  
maajeein  
niicha rausiajeeinein  
nenacaauru-  
rai cachaurura,”

naain jetao Cana Coaunera coroaecure dede caje arajiin ecojoacoain anjeraauru, nii leeocho anjera rohan ecocohin.

<sup>15</sup>Inae niritiin jelaiha dedeeu cuuruha nii anjeraaurune jana jetaote:

“Chajamaaunchete aihane, caa cana rai Cana Coauneraacha beratenojohin coanichaache Beleeun cuhincha. Chatohanaiquecha aiteta,” naaure jetao ita rai, nii letononeein carenerocuru beraaihurera- cachauru.

<sup>16</sup>Niritiin erojoein cuhin coaracuruhane jana jetaote, Mariha aina Jose eruuruhane jana jetao, baca lenone omane ichoae rai belaaeque conaano-joinnein tocoeeque nii canaanai. <sup>17</sup>Nitohaneein eruhin, nii acaauru rai nii canaanai que aitoha anjerane beeuruha nii letononeein carenerocuru beraihurera jaun jetaote, <sup>18</sup>cojoelatoore jetao satiin ecu neein aonajeuerera cachauru. <sup>19</sup>Nii jana, rai neba Mariha jetaote, rai suujua cuhane nitohanihane coacuhin jetao, suujuaacha cuhane coaraje. <sup>20</sup>Nitohaneein esinae rauhijiriin nii acaauru rai biha anjerane rijijieein, jitariin coaracuruhane jaun jetaote: “Caohachate ichae cana rai Cana

Coaunerara,” naain Cana Coaunera corojeein jelaiha cauha cuure nii letononeein carenerocuru beraihure-raauru cachaauru.

**Cacha que suujua acatiha Cana  
Coaunerane jaa coloheri Teenforo asaae  
Jesoso causine amaauruhane**

<sup>21</sup>Inae fosa janoniha nejanoane jana jetaote, nii canaanai jaberoco macohi cari saerateein, Jesoso neein curuaateure, jaiti ausirineniha Marihane jana aitohalu anjerane rijijieein.

<sup>22</sup>Inae nii aitohalu Moisesane jaan cojoanonaa rijiu que tihane jaun jetaote, jiniiquiin nocoulucoherateeuruhane baiha jetao, Jerosaleeun nii canaanai amaain Cana Coaunera que coitucueratiha cuure. <sup>23</sup>Nitohaniane coina: “Satiin jauriaanejeein quicha cojoajineein bereeconaa Cana Coauneraacha que nii rai beree banihate-miin. <sup>24</sup>Chaen corotajai tajaee laojoiri serori rijijieein nena torotola nenihane, corotajai serori aao uhaaine,” naain aitohalu Cana Coaunerane rijijieein nii niicha bajai tajaee amaain cuure, rai naitoonjoan rijijieein nii tajaee niicha amaauri mocohin que Cana Coaunera belaa, que nii beree banihateeuruhane coina.

<sup>25</sup>Nii bana jetaote, Jerosaleen ichoaelu leinjiin cacha Simeon. Aca jetaote, esinae rauhijiriin Cana Coauneraacha jerei ichajeein, tururichaain jianacoon Israeli cocoaichacuru mitaeranune cohajeein nelu. Aca jetaote, que coitucueratiha Cana Coaunera Suujuene jaun, <sup>26</sup>nii niicha letoaeni Mesihasi coaraelanaala ohenihane coitucuelu. <sup>27</sup>Nitohaniane jaun jetaote, nii cachaauru que suujua acatiha Cana Coaunerane jaa coloheri Teenforo asaae Jesoso causine amaaurua rai fojiaraaurune jana que

coitucueratiha Cana Coaunera Suujuene jaun coitucuhin, Teenforo asaae cuha Simeonne jana jetaote, que jiniichaain nii Jesoso causine turuaaure rai fojiaraauru Teenforo asaae, Cana Coaunera aitoonjoan ninaaruhane coina. <sup>28</sup>Nii jana jetaote, nii canaanai coariin, raain baiichaain jetao:

<sup>29</sup> “Inae laen  
nii iicha ichanenu  
carai chaitoonjoan  
coaracaaunne jaun,  
inae laen nainichaaun ohanu  
iicha jerei icharanichaaunnera,  
<sup>30</sup> itolere notaracae  
<sup>31</sup> iicha tei jianacoon  
canaaanu mitaeranu  
coaracaaunne jaunra.  
<sup>32</sup> Acate Cana Coaunera  
coitucuelanaala  
Israelitaniheichuru  
lauri lauri nenacaauru que  
acaauru aina  
Cana Coauneraacha  
ichanenu coitucueratereein.  
Chaentechu  
raotojoein rachoojoein  
neeurureein Israelitaauru,  
acaauru lauri caje nena  
neein niha caa iicha letoaine jaun,”

naain jetao Cana Coaunera corojee Simeon.

<sup>33</sup>Niritoha nii canaanai que Simeonne aonajeein jetaote, ecu cojoelatoore nii canaanai fojiaraauru. <sup>34</sup>Nii jana jetaote: “Inara corotajanemiin Cana Coaunera,” naa acaauru raine baiha jetao, Mariha coarajeein:

“Aonaan. Caa canaanaite, arajii Israeli cocoaichacuru itolere que nelaetoha nocoetonacaauru nelatela-naala nedaaruhane jana, leeochoauru tabaauru itolere que nelateein nedaau-

ruhane caina nenaane. Nitohaneein nihane corenihate, que jaolecoorureein arajii Isaraelitaauru, <sup>35</sup>satiin que acaauru ichao coitucueraterichaaaine jaun. Nete jataain cunaain cacha jaberoco sauha saberene rijijieein, jataain cunaain ii suujuaque tacareein, que nejerateeriin neeururichaaaine jaun,” nae jetao Mariha rai Simeon. <sup>36</sup>Nii jana jetaote, ecu nelu leinjiin ene netonoai-Cana Coaunera ere beranein nena. Acate Asere laurineein nena- Fanoeri cacunu camotojoe Ana ne. Aca jetaote, jataain ranuna neein nelanajaain, caaunsi jaanacanejeein lana aina ichoaelu. <sup>37</sup>Nii baiha jetaote, fosachoonca jena jaanacaaneein nirijieein autananein ichaohin jetao, suri couu netiinchuru janotiin inetojoeinchuru, sonafaajihanaain-churu Cana Coaunera bajaee bajajeein nerejetelu nii Teenforo caje mituhelanaala. <sup>38</sup>Nii Ana jetaote, nii Jesoso causine turuaauruhane jana ereereeca Simeonne coaraain jetao, acaentonoai nii Jesoso causine que ereereje, satiin nii nichoteeururichaaain Jerosaleen cocoaichacurune cohajeraauru cachaauru rai.

#### **Jelaiha Nasarete caauruhane**

<sup>39</sup>Inae nitohaneein jeriha Cana Coaunerane rijijieein rai naitoonjoa ichacuruhane baiha jetaote, jelaiha rai natane- Calileea batane que nena Nasarete jetao cauha cue Jose, Mariha aina. <sup>40</sup>Nii jana jetaote, fohejeein itolere que nainaan ichauhenanihajejin sacue nii canaanai, coroatajaniha Cana Coaunerane jaun.

#### **Teenforo asaae niha canaanai Jesosone**

<sup>41</sup>Ajaanaa naineein jetaote, Jerosaleeun cuhin Fasocoa beseta bitoaa cunajaoncure nii Jesoso fojiaraauru.

<sup>42</sup>Nitohaneeuruhane jaun jetaote, inae lechoonca coroata jaanacaa Jesosone jana jetao, nitohaniha acaauru ichaone jaun satiin cuhin nii beseta bitoaa cuure Jerosaleen. <sup>43</sup>Inae beseta bitoauruhane baiha, jelaiha nenajaun cauha cuuruha rai fojiaraaurune jana jetaote, Jerosaleeun nedae coitucureenihane jana nii canaanai Jesoso. <sup>44</sup>Nii jaun jetaote, “Inae jecha ichoachaniha cunacaauru aina cauha cuhi nii Jesoso,” naa fojiaraauru suujuune jaun jetao, le janohin cuuru baiha, niicha coitucuuri, naraaichuru, naaonjoaihunri jana arihure niqii rai fojiaraauru, nejetaote eruurene. <sup>45</sup>Nitohaneein eruurenihane jaun jetaote, jelaiha nejenohin ariha cuure Jerosaleeun.

<sup>46</sup>Nitohaneein cuhin jetaote, nichata janohane cuhane jetao Teenforo asae, Moisesa aitoonjoan que cacha relaaure-raauru aina, ita rai ereeuruhane aonajeein, acaauru caje nii ereeuruhane jaan baja lauhequimne jana eruha cuure. <sup>47</sup>Nii jana, jataain nainaan, nii ereeuruhane aonajeein, acaauru caje bajaain, acaauru tonoraane jaun jetaote, cojoelatoore satiin ecu neein aonajeeurera cachaauru.

<sup>48</sup>Nitohanihane jana eruhin jetaote:

“Chanuna canacaanu rai belanaala nitohaneinte canaanai. Ii inaca ainane ii ariirijiacaanu, neeine jaa coitucuenihacaanune jaun ii coinaderaain,” naa rai nebane jana jetaote:

<sup>49-50</sup>“Chanuna canu ariirijieeiche. Tana canu inaca loreri asaae nihanu niicha jerenohineine coitucuhicheta,” naain acaauru tonora Jesosone jana jetaote: “Naaonjoaiquete aitera,” naain coitucusichurene rai fojiaraauru.

<sup>51</sup>Nitohaneein fojiaraauru jiniichaaain Nasarete cauhin jetaote, rai fojiaraauru ere tonoraain nerejetelu.

Satiin niriinanai jetaote, rai suujuaacha cuhane coarajerejetelu rai



neba. <sup>52</sup>Nitohaneein fohejeein ichauhe-nanihajejin, itolere que jataain nainaan jetaote, satiin cachaauru aina caohachaain ne nii Jesoso, coroatajanejin aina caohachaain niha Cana Coaunerane jaun.

**Cacha areroo niha cacha  
cojunacatera Joaan ne**  
(Mt 3.1-12; Mr 1.1-8; Jn 1.19-28)

**3** <sup>1</sup>Inae lechoonca saoqui jaanacaain satiin cocoaianacaaihuri curuaanaa enferadoro neein niha Tiberione bana jetaote, Jodea batane rai coberenadoro neein nelu Ponsio Filato. Nii jana Erodesi jetaote, Calileea batane rai coberenadoro neein nelu. Nii jana rai nejera Ferifi jetaote, Taraconite, Itorea, naonjoahuinri batane rai coberenadoro neein nihane jana, Abilinia batane rai coberenadoro neein nelu Lisania. <sup>2</sup>Nii jana Caifasi, Anasi, naonjoaihunri jetaote, saseredotecuru curuaanaacuru- curuaanaanejin neurelu. Nii bana jetaote, Sacariasi calaohi Joaan rai jetao erelu Cana Coaunera, cacha areroo rai ecocohin.

<sup>3</sup>Nii jaun jetaote, Jorodaan auhaniha nenacaauru nenaanajaauru cuujecujeejin jetao, “Jeriha Cana Coaunerane rijijieein inara suujua coreeuchete acauhanau teein cojunacatenohinejin baotisanojieein neeichete, inara osa caje inara ichoteratemiin Cana Coaunerara,” naain jetao, cachaauru rai beebeje Joaan. <sup>4-5</sup>Nitohanejin jetaote, icharejete Joaan. Niritiin laenaalu Cana Coaunera ere bera inoansi Isaihasine rijijieein:

“Nerichaaain cacha areroo ehehejeein:  
‘Cana Curuaanaa turunajaanu  
coeroteeuche,  
raujuuin cuaain.

Satiin turiararoorute nemoanojoinerejin.  
Atane ucuunooru nihanatiinte ranaasiin macaracanojoi nijihacooa cureein.

<sup>6</sup>Nii banate,  
satiin caa chauratane que nenacaauru cachaauru jianacoon cacha mitaeraanu letoaa Cana Coaunerane coaracururejin,”

naain nii Joaan que aitiin laenaalu *profeta* inoansi Isaihasine rijijieein jetaote ichae Joaan.

<sup>7</sup>Inae nitohanejin cachaauru cojunacatiha acauhanau teein baotisa Joanne coitucuhin, rene cuuruha cachaauru, acaauru baotisaane coinane jana jetaote: “Chaa inara osa coreniha caseteco tabai turu rai nena caje nichotejin, jianacoo mituriquicheeine que inara rai aite, taibinaecuru.

<sup>8</sup>Nitohanihane jaun, nii ajiniha caohachaain inara ichao corejin, Cana Curuaanaa Cana Coaunera coitucuhin esenetaain neeuchete, Cana Curuaanaa coitucueranejin inanacaaichene coaracurumiin cachaauru. Chaenchu jiaonriha: ‘Abaraau nefoerate nichaanune jaun cha latihaacaanu canacaanu,’ naain inara raajenihane necoritanaa nainiheeiche. Cana Coauneraachate nainere, caa ajeri jaberoco caje Abaraau nefoerate coaunaane. <sup>9</sup>Chaentechu, inae ajianojonejin ne tero, inaana inaeniha temulene rai chojaisi aina curuataain sauhin usihanau mocohacane rijijiejin, inae jaolenejin neuruha Cana Coaunera coitucutoha nocoetonacaaurune coina,” nae jetao acaauru rai Joaan.

Niritoha acaauru rai Joanne jaun jetaote: <sup>10</sup>“Chatohanai jana ichariha-

caanu canacaanuta,” naain caje bajaauruhane jaun jetaote:

<sup>11</sup>“Coroatajaain obiri siricha, nii obiri colane nenea rai leinjiin teeine. Chaen lenone siricha, nii lenone colane nenea rai teenera,” nae jetao acaauru rai Joaan.

<sup>12</sup>Nii jana jetaote, Roma curuaanaa rai *impoesto* nuque cachaauru cobarain coriqi bajaaurera tabaauru netonai, acaauru baotisaa Joaan necoina turuhin jetao:

“Chatohanai jana ichariacaanu canacaanuta cacha relaera,” naauruhane jana jetao:

<sup>13</sup>“Jiaonriha aitocuruha inara curuaanaacurune amuritoojoaain cachaauru cobarain leruhin basijiauhichenera,” naa acaauru rai Joanne jana jetaote:

<sup>14</sup>“Chatohanai jana icharihacaanu canacaanuta,” naain caje bajaauruha soondarooru tabaaurune jana jetaote:

“Jiaonriha chatohanai ichaeniha chunine jana coulurujeein sonaa coacuhin cotaain niicha sirii rulunaa coaquichene. Inara amihaneoo corenihacha ichaaochera,” naa Joanne jana jetaote, <sup>15</sup>jataain turuha Mesihasine cohajeeuruhane jaun jetao:

“Caa canaacha cohajei Mesihasi chara inae caa turuera,” naain jetao ita caje Joaan bajaauru nii ecu neein coarajeeurera cachaauru.

<sup>16</sup>Niritiin ita caje bajaauruhane jaun jetaote, acaauru rai: “Canune esinae rauhijiriin, rauhijaain acauhanau inara teein inara baotisaaun. Jana nii caaaijie uhenite, Cana Coanera Suujue, usi, naaonjoain que inara baotisaa ureein. Acate jataain camurijiriin nelateein cocoainain letononeein ne. Nii rai safato ichora rutueranuque nihanatiin nelatejeehaaun. <sup>17</sup>Chaentechu leinjiin inaro uhareein que arosotechu leinjiin inaro uhareein que arosotechu leinjiin rai caohacha raain, rai bano

mocoha charijibana jacanaacharanejeein nenea usihanaau teeine coina. Nii rijijieeinte, nii jeriha Cana Coanerane rijijieein nenea jeriheichuru mocoha cureein, jerihane rijijieein nenacaauru janijiin raaincha,” nae jetao satiin ecu rene turunacaauru cachaauru rai Joaan.

<sup>18</sup>Niritiin acaauru suujuatein jetaote, acaauru rai Cana Coanera beratenojoi Jesuso que Erenaa Raotono beebeje Joaan. <sup>19</sup>Chaen jetaotechu, coberenadoro Erodesi netonoai suujuate, rai nocoala Ferifi comasai Erodiasi siria comasaineeine jaun, chaen itolere baasooru ichaain nihane janihaneeine coina. <sup>20</sup>Nejetaote, nitohaneein nii baaso ichaane ichoae tacaain, caresero cuhane Joaan enoae, rai niritohane coreniha.

#### **Jesoso baotisaa Joanne**

(Mt 3.13-17; Mr 1.9-11)

<sup>21</sup>Nitohaneein jetaote, jaiti caresero cuhane enoainiha Erodesine jana, acauhanau satiin cachaauru teein cojunacatenaaca acaauru baotisarejete Joaan. Nitohaneein cachaauru baotisaa Joanne jana jetaote, Jesuso netonai nebaotisaerateein Cana Coanera bajaane jana, nejoraca dede bacuujuane jana jetao, <sup>22</sup>nichoae fauhin nelauriaa uhe inanacaain Cana Coanera Suujue leinjiin serori rijijieein. Nii jana jetaote: “Iite acaihaniji quiiicha jeree, quiiicha janijiin cacalabineein neeicha,” naain toniha erenaa dedeeune jana jetao aonajeure.

#### **Jesocurisiko foerateeurerauru**

(Mt 1.1-17)

<sup>23</sup>Inae nii Cana Coaneraacha icharatenohin namihaneeon nunuhetihane bana jetaote, nichata choonca jaanaca nelu- nii Jose calaohi niha acaauruacha bei Jesuso.

Nii jana nii Jose jetaote Eli calaohi nelu.

<sup>24</sup> Jana Mataa calaohilu jetao Eli.  
 Jana Lebi calaohilu jetao Mataa.  
 Jana Meriqui calaohilu jetao Lebi.  
 Jana Janaa calaohilu jetao Meriqui.  
 Jana Jose calaohilu jetao Janaa.  
 Jana Matatiasi calaohilu jetao Jose.

<sup>25</sup> Jana Amoso calaohilu jetao Matatiasi.  
 Jana Naaoso calaohilu jetao Amoso.  
 Jana Esili calaohilu jetao Naaoso.  
 Jana Nacaai calaohilu jetao Esili.

<sup>26</sup> Jana Maati calaohilu jetao Nacaai.  
 Jana Matatiasi calaohilu jetao Maati.  
 Jana Semei calaohilu jetao Matatiasi.

Jana Jose calaohilu jetao Semei.  
 Jana Jodaa calaohilu jetao Jose.  
<sup>27</sup> Jana Joanaan calaohilu jetao Jodaa.  
 Jana Resaa calaohilu jetao Joanaan.  
 Jana Sorobaberi calaohilu jetao Resaa.  
 Jana Salatieli calaohilu jetao Sorobaberi.

Jana Neeri calaohilu jetao Salatieli.  
<sup>28</sup> Jana Meriqui calaohilu jetao Neeri.  
 Jana Adiin calaohilu jetao Meriqui.  
 Jana Cosamii calaohilu jetao Adiin.  
 Jana Eremadaan calaohilu jetao Cosamii.

Jana Eri calaohilu jetao Eremadaan.  
<sup>29</sup> Jana Jesoso calaohilu jetao Eri.  
 Jana Eliseri calaohilu jetao Jesoso.  
 Jana Jorimi calaohilu jetao Eliseri.  
 Jana Mataa calaohilu jetao Jorimi.

<sup>30</sup> Jana Lebi calaohilu jetao Mataa.  
 Jana Simeon calaohilu jetao Lebi.  
 Jana Jodaa calaohilu jetao Simeon.  
 Jana Jose calaohilu jetao Jodaa.  
 Jana Jonaaun calaohilu jetao Jose.  
 Jana Eliaquiin calaohilu jetao Jonaaun.

<sup>31</sup> Jana Meleea calaohilu jetao Eleaquiin.

Jana Mena calaohilu jetao Meleea.  
 Jana Matata calaohilu jetao Mena.  
 Jana Nataan calaohilu jetao Matata.

<sup>32</sup> Jana Rabiri calaohilu jetao Nataan.  
 Jana Isaihasi calaohilu jetao Rabiri.  
 Jana Oberi calaohilu jetao Isaihasi.  
 Jana Bosi calaohilu jetao Oberi.  
 Jana Sala calaohilu jetao Bosi.  
 Jana Nasoon calaohilu jetao Sala.

<sup>33</sup> Jana Aminadaba calaohilu jetao Nasoon.  
 Jana Admin calaohilu jetao Aminadaba.

Jana Esroon calaohilu jetao Armi.  
 Jana Faresi calaohilu jetao Esroon.  
 Jana Jodaa calaohilu jetao Faresi.

<sup>34</sup> Jana Jacobo calaohilu jetao Jodaa.  
 Jana Isaca calaohilu jetao Jacobo.  
 Jana Abaraaun calaohilu jetao Isaca.

Jana Tare calaohilu jetao Abaraaun.  
 Jana Nacoro calaohilu jetao Tare.

<sup>35</sup> Jana Seroo calaohilu jetao Nacoro.  
 Jana Raco calaohilu jetao Seroo.  
 Jana Fele calaohilu jetao Raco.  
 Jana Eberi calaohilu jetao Fele.  
 Jana Sala calaohilu jetao Eberi.

<sup>36</sup> Jana Cainaa calaohilu jetao Sala.  
 Jana Arafasa calaohilu jetao Cainaa.  
 Jana Sem calaohilu jetao Arafasa.  
 Jana Nohe calaohilu jetao Sem.  
 Jana Lamee calaohilu jetao Nohe.

<sup>37</sup> Jana Matosalee calaohilu jetao Lamee.  
 Jana Enoco calaohilu jetao Matosalee.

Jana Jaredi calaohilu jetao Enoco.  
 Jana Malareri calaohilu jetao Jaredi.

Jana Cainaa calaohilu jetao Malareri.  
<sup>38</sup> Jana Enoso calaohilu jetao Cainaa.  
 Jana Seti calaohilu jetao Enoso.  
 Jana Adaan calaohilu jetao Seti.

Nii jana Adaan jetaote, jauriaanejeein Cana Coauneraacha coaunaineein nelu.

**Jesoso coujuhin coaraa moconajaerane**  
(Mt 4.1-11; Mr 1.12-13)

**4** <sup>1</sup>Nii baotisaa Joanne baiha Cana Coaunera Suujue que suujuequiu nucuhe Jorodaaun caje cauha cuha Jesosone jana jetaote, cacha areroo amaa Cana Coaunera Suujuene jaun jetao, <sup>2</sup>ucuaae niha jena choonca janoneeinne jana, nechu cojuha sarue moconajaera.

Nitohanein jenachoonca janoneein lenone lanaala nihane jaun mijiintohane jana jetaote:

<sup>3</sup>“Chajaain aihane esinae rauhijiriin Cana Coaunera Calaohi neeine, caa ajeri jaberoco rai aitoote lenonenein nerotomiincha,” naa nechu saruha rai moconajaerane jana jetao:

<sup>4</sup>“Coatiba lenoneecha que ichaonaa nainihe i cacha,’ aite Cana Coaunera, rai Quiricha cuhane,” naain tonoraa Jesosone jaun jetaote, <sup>5</sup>luhecotariin ecuun amaain, satiin caa chauratane coaratein jetao:

<sup>6</sup>“Canune jitariin canuhacha ichana nainei aina satiin caa chauratane que nenacaauru curuaanaacuru curuaanaa-neein neeine coina, ichei tenaa naineen. Satiin acaauru canu rainein neuruhane jaunne chunicoaha jerera rai tenaa naineen.

<sup>7</sup>Aihane jaun neseeriaain canu corojeein, canu bajae bajaequinete satiin ichei niha cureein,” naa moconajaerane jana jetao,

<sup>8</sup>“Nete, ‘Acaihanijin ii Coauneraacha corojeein, rai nelatein niicha jerei ichaau,’ naain laenaerate Cana Coaunera, rai Quiricha cuhane,” naain jetao tonorae Jesoso.

<sup>9</sup>Nii baiha jetaote, Jerosaleen amaain ecuun Teenforo ichoae inaain jetao:

“Chajaain aihane esinae rauhijiriin Cana Coaunera Calaohi neeine caalai

caje nemaroteeute coaracaa. <sup>10</sup>Cana Coaunera Quiricha inoansi cuhane te: ‘Rai letonocuru anjeraauru letoarichaain Cana Coaunera ii beraaihuruhane coina.

<sup>11</sup>Acaaurute rai bijji que ii michuurureein, nabana ajeri que necunaitaaine coataa,’

naain laenaerate Cana Coaunera, rai Quiricha cuhane,” naa moconajaerane jana jetao,

<sup>12</sup>“Chaentechu: ‘Coo ii Coaunera coujuhin coaraara,’ naain laenaerate Cana Coaunera, rai Quiricha cuhane,” naain tonoraa Jesosone jana jetaote, <sup>13</sup>ecu ratiriin carajaaajoaain caje amuhe nii Moconajaera, neniha tonaain Jesoso coujuhin coaraane jaane coitucuenihane jaun.

**Calillea bataneu namihaneoo**  
**nunuhetiha Jesosone**  
(Mt 4.12-17; Mr 1.14-15)

<sup>14</sup>Nitohanein, Cana Coaunera Suujue que suujuequiu niicha ichana nainei coitucuhin, Calillea cauha cuha Jesosone jana jetaote, satiin atane sacuritaain jetao que ereeure coitucuhacoain cachaauru. <sup>15</sup>Nitohanein cuhin jetaote, netaojiaain Cana Coaunera rai Rauhi que ereerecuruhane jaa coloheri sinacocaauru nainein cuhecujeein cachaauru relaane jaun jetao, satiin coroaecure cachaauru.

**Nasareteu niha Jesosone**  
(Mt 13.53-58; Mr 6.1-6)

<sup>16</sup>Nitohanein cuujue cujueein jetaote, nii neein fohecalune jaan Nasareteu jetao cauha cue Jesoso. Nii jana jetaote, nitohaniha rai nicheaone jaun jetao, nebetacaanaa cojoanonaa bana sinacoca asae enoha cue, Cana Coaunera Quiricha ereretaane coina. Nitohanein ecu enohin chujuecohane

jana jetaote, <sup>17</sup>rai *profeta* inoansi Isaihasicha laenai quiricha teeure, ereretaane coina. Nii Quiricha ereretaane coina jasasaane jana jetaote:

<sup>18</sup> “Cana Coaunera Suujuete caniha ne,  
niicha jerenohineein,  
‘Inae raotojoein neriquicheein,’  
naain cairichaihuru rai bihanune  
coina.  
Chaentechu,  
‘Inae jianacoo neriquicheein,’  
naain casetecocuru rai bihanune  
coina caletoe.  
Nii choae tacaain techu,  
maosacuru cochaain acaauru nota  
rautaain,  
cairichaihuru ichoteratichaaunne  
coina caletoe,

<sup>19</sup> nitohanerichaaain  
inaraacha cohajei Cana Coaunera  
Cojoanonaa  
coitucueratihanu inara quene  
coina,”

<sup>20</sup>naain ereretaane baiha jelaiha nii  
quiricha seriin, sinacoca curuaanaa rai  
teen nelauriariin lauhecoba Jesosone jana  
jetaote, chaque tonaelanaala coarajeure  
satiin ecu nenacaauru cachaauru. <sup>21</sup>Nii  
jana jetaote: “Enete esinae rauhijiriin  
caa Cana Coaunera Quiricha cuhane  
aitohane rijjijeein, satiin inara acatiha  
turuhe caa naitoonjoa coarajeechene  
notaracae,” naa acaauru rai Jesosone jana  
jetaote, <sup>22</sup>ita rai ererecure caohacha ichaa  
Jesosone que, satiin cojoelatiin coarajeein,  
acaauru rai raotojoein ereerecane jaun.  
Nejetaote tabaauru:

“Tajian caa Jose calaohinihaneta,”  
naain jetao ita caje bajaare.

<sup>23</sup>Nii jaun jetaote:

“Jerihanete esinae rauhijiriin caque,  
‘Aihane, cacha coichana inaeraneene,

ichaajenihane nocohichaaain canacaanu  
notaacune coaracaanura,’ naain caque  
ereiche. Chaentechu jerihane, ‘Aihane  
itolere ichaa Cafereanaonne rijjijeein,  
cau chatane que jerichanejeein itolere  
ichaaain canacaanu notaacune coaraca-  
nura,’ naain ereiche canu esenetae-  
neeinchene jaun,” naain jetaote:

<sup>24</sup>“Esinae rauhijiriine inara rai  
aitoreeunni. Coatiha esinae rauhijiriin,  
caohachaaain ranojoneein niheilü chuni  
Cana Coaunera ere beraneein  
nenacaauru *profetacuru* rai nataneque.

<sup>25</sup>Coaracuche nachuhinti jataain arajiin  
neeruhalu Israelitanichaachene  
benecuru autanaaunru, nihalu Cana  
coaunera ere bera *profeta* Irihasine  
banane. Nii banate nichata jaanaca  
amurijiriin uheniha elone jaun,  
banejelanaala cana atane Israeli batane  
sacuritaain nelu mijitena omaroeniha  
temulene jaun. Nete nii cana benecuru  
autanaauru rene letono nenelu nii bana  
nena *profeta* Irihasi. <sup>26</sup>Nete laen  
coriaae atane que leinjiin Sidoon nese  
roha nena Sarepta neein curuajai neseu  
cana lauri Israelitanelanaala nena  
autana reneecha letononeein cuhelu nii  
Irihasi, nii autana rai lenone faane  
coina. <sup>27</sup>Jerichanejeein techu, arajii  
cana laurichuru Israelitacuru somane  
cauun cunaitecuruhane jana, acaauru  
rautaanelu Cana Coaunera ere bera  
*profeta* inoansi Iriseeo, cana lauri caje  
nena nihane saijjeein. Nete laen,  
leinjiin Siria cocoaicha cana lauri  
Israelitanelanaala nena Naamaanha  
jetaote rautaelu,” nae jetao acaauru rai  
Jesoso.

<sup>28</sup>Niritoha acaauru rai Jesosone jaun  
jetaote, satiin aina jataain obaaecure nii  
sinacoca asaa nenacaauru cachaauru.

<sup>29</sup>Nitohanein aina obajeein nimichucu-  
taain jetaote, nii sinacoca caje sitaain,  
ichatane ecuunoo ichoae ichanohi niha

nii nesene jaun jetao, ecu amaaunre  
jelai caje coaauneein nii Jesoso  
saruhitocuruhane coina niqui,  
<sup>30</sup>nejetaote, cha que tonajelanaala  
acaauru cataaun situhin amuhe Jesoso.

**Suujua cuhane coitucuhuhi siricha cacha**  
(*Mr 1.21-28*)

<sup>31</sup>Nitohaneein sitaauruhane jaun  
amuhin jetaote, Calileea batane que  
nena Cafereanaon cue Jesoso. Nitoha-  
neein cuhin, ecu turuhin jetaote, ecu  
neein nebetacanaa cojoananaa bana,  
<sup>32</sup>ecu nena sinacoca asaae neein  
cachaauru relaane jana jetao, rautatiin  
aonajeure cachaauru, leechoauru  
cacha relaaurera rijijielanaala, esinae  
rauhijiriin rai suujua caje rochoin  
acaauru relaane jaun.

<sup>33</sup>Nii jana jetaote, nii sinacoca asaae  
ne leinjiin rai suujua cuhane coitucu-  
chuhuhi siricha cacha. Aca jetaote,  
tonijiaain ehequiin:

<sup>34</sup>“Coa canacaanu rorehecaara  
Nasarete cocoaicha Jesoso. Nechu  
canacaanu cairichaain canacaanu  
itajihate uhicha. Canune raotojoein  
ichoitucunra. Iite acailhaniji Cana  
Coaunera letononeein nenaaneeicha.  
Canacaanu jianeera,” naane jana jetao,

<sup>35</sup>“Coaa maitaa. Nii cacha suujua  
jianein caje amuura,” naa Jesusone  
jana jetaote, satiin cachaauru acatiha  
chatohanein cunaitaelanaala atane  
ichoae nii cacha siheitiin rai suujua caje  
amue nii coitucuhuhi.

<sup>36</sup>Nii jana jetaote, satiin nesoonetiin  
coarajein jetao:

“Chatohanai cocoinanacainein  
nenaana caa cacha, jataain chaque  
tonajelanaala nere nejesinaacha que  
caritohane jana caa cacha suujua caje  
mituha coitucuhuhi, rai nere tonoraainne  
coina,” naan jetao ita caje bajaure ecu  
neein nii coarajeurera cachaauru.

<sup>37</sup>Nitohaniane jaun jetaote, satiin nii  
atane sacuritaain jetao, Jesoso que ita  
rai ereerecure cachaauru.

**Simoon Fedoro tano rautaa Jesusone**  
(*Mt 8.14-15; Mr 1.29-31*)

<sup>38</sup>Inae nii sinacoca caje mituhin,  
Simoon loreri asae turuha cuha  
Jesusone jana jetaote, najiniha ajaa  
caun cunaiteein niha Simoon tanone  
jaun jetao, Jesoso rai aitocure rautaane  
coina. <sup>39</sup>Nii jaun jetaote, nichoae  
nenoracaain nii ajaa sitaa Jesusone jana  
jetao, inae caje amuhe nii ajaa. Nii jaun  
jetaote, inae nerautaane jaun nimichuin  
acaauru rai lenone chalue.

**Arajii cunaitenaacuru rautaa Jesusone**  
(*Mt 8.16-17; Mr 1.32-34*)

<sup>40</sup>Nii jana jetaote, inae nuna macohi  
ichoae teejia enotone jana, araai laurii  
cunai caaun cunaitenacaauru turuaa cuure  
Jesoso rene, acaauru rautaane coina. Nii  
jana jetaote, cajanee cajanajein acaauru  
ichoae biji meracaane jaun jetao nerautaa-  
coaure. <sup>41</sup>Chaen jetaotechu, suujua  
cuhane moconajaera letono sirichaauru  
netonoai rautaane nii nerautanacaauru  
cachaauru caje mituhin:

“Iite Cana Coaunera Calaochi neeicha,”  
naauruha cojiriinne jetao, ereeuruha  
nii coitucuhichurune caohate Jesoso,  
Aca Mesihaseein nihane coitucuuruha  
nii coitucuhichurune jaun.

**Sinacoca asae Cana Coaunera  
cojoananaa beebejia Jesusone**

<sup>42</sup>Nitohanein jetaote, inae nemata-  
racaa janonaane jana, nii nese caje  
amuhin neniha cachane jaa cue Jesoso.  
Nii jaun jetaote ariin, nii nihane jaa  
turuhin, jelai caje amuhane caohateeu-  
ruha cachaaurune jana jetao,

<sup>43</sup>“Nena leechoauru nenaanajaaunru  
cuhecujuein Cana Coaunera

Cojoanonaa beebejia cureeun, nii coina letononeein nihanune jaun,” nae jetao acaauru rai Jesoso.

<sup>44</sup>Nitohaneein jetaote, Jodea batane sacuritaain nenacaauru Isarailitacuru rai sinacocacuru naineen cuhecujé niicha beeni beebejeein.

**Cojoelanaacojoaain ate mucuuruhane**

*(Mt 4.18; Mr 1.16-20)*

**5**<sup>1</sup>Calilea conemuri auhaniha turuhin, ecu Cana Coaunera naitoonjoan que cachaauru rela Jesosone jaun, aonaa turuuruha arajiinne jaun jetaote, sururucure cachaauru. <sup>2</sup>Nitohaneein sururucuruhané jana jetaote, caje fauhin redeeuru culeecuruha ate mucuurerane jana, carene que conera colane coroatajaain boteeuru coari Jesoso. <sup>3</sup>Nii jana, Simoon rai niha nii ecu nena leinjiin botene jaun jetaote, cuhane fauhin, nemuri auha caje acau cataaunjeri nii bote amaa Simoonne coina aite Jesoso. Inae nemuri auha caje acau cataaunjeri amaauruhane jana jetaote, nii bote cuhane netiin, ecu nelauriariin caje coauneein cachaauru rai ereerejeein acaauru relaje.

<sup>4</sup>Inae acaauru relaane nainaan jetaote:

“Taa nemuri ucuaano que caa bote amaain, ecu caa inara rai redeeuru jaochette ate mucuhichera,” naa Simoon raine jana jetaote:

<sup>5</sup>“Nena inae janoajeein rede jaohacaanu natiin, leinjiinnijin ate mucuelanaala janohacaanura cacha relaera. Nenachu ii aithohine jaun, nacoauneein caa redeeuru jaohin coaraa curichaanura,” naain jetao tonorae Simoon.

<sup>6</sup>Niritoha acaauru rai Jesosone jaun redeeuru jaoruhane jana jetaote, jataain arajiin ate mucuuruhane jaun

jetao, ate caaun nesoajji nii acaauru rai redeeuru. <sup>7</sup>Nii jaun jetaote, leeochoa bote cuhane nenacaauru acaauru leeochoaauru cotihacure bijj que, acaauru coroatajaniha cuuruhane coina. Nii jaun jetaote cuhin, nii coroatajai bote nemoaauruha ate quene jaun jetao, jataain naluhene rijjijeein nelemue nii coroatajai bote. <sup>8-9</sup>Nitohaneein jataain arajiin ate mucuuruhane jaun jetaote, jataain cojoelatiin satiin nesoonetooruhane jaun, Jesoso tija asae neseonriaain jetao:

“Jataain osaaotohanune jaun ii rohan nena nainihaaunta Curuaanaa,” nae jetao Simoon Fedoro nesoone caaun.

<sup>10</sup>Nii jana jetaote, nii Simoon aina neurelu Sebedeo calaohichuru, Joaan, Saantiaao, naaonjoaihunri, nii Simoon aina ate mucueraneein neeuruhane jaun.

Niritoha Jesoso rai Simoonne jana jetaote:

“Coo nesoonetohara, Simoon. Inae ate mucueraneein nerihheeni. Ena caje coauneente, cachaauru mucuhin raeranein neriquincha,” nae jetao rai Jesoso.

<sup>11</sup>Niritoha raine jaun jetaote, atane ichoae acaauru rai boteeuru inaan, jitariin niicha sirii ratiriin jetao Jesoso aina cuure Simoon Fedoro, Joaan, Saantiaao, naaonjoaihunri.

**Leinjiin cosibi ruhecaera  
cacha rautaa Jesosone**

<sup>12</sup>Nii baiha leinjiin neseu neeuruhane jana jetaote, Jesoso rene turuha cue leinjiin cacha cosibi ruhecaain caaun cunaiteein, nitohanai cunai siricha cacha leeochoaauru rohan turunaa nainenihane saijjeein. Aca jetaote, Jesoso coariin atane que nauri turuanacanejeein notoroaain jetao:

“Ii jereeine canu rautaaau caa canu cosibi cajera Curuaanaa,” naane jana jetao:

<sup>13</sup>“Jerichaaun chujian. Ii caje amuhine caa ii cosibi,” naain biji que dadae Jesoso, nihei chuni cacha, nitohaneein cosibi ruhacaera dadanaa nainenihane saijieein. Nitohaneein dadaa Jesusone rijieeoritiin jetaote, inae caje amue nii rai cosibichuru.

<sup>14</sup>Nitohaneein rautaa in jetaote:

“Inae nerautaaicha. Coa chaen chuni rai: ‘Acate canu rautaera,’ naain caque iriha. Raujiaaincha Cana Coaunera aina caohachaa in niha cachane caina rucuh-raneein nenea saseredote rene turunihute, inae coulunohinee in ii cosibi caje nerautaa in coarami incha. Chaen nerautaa in coujunacane que nii aithalu Moisesane rijijieein belaa in jaanu amaain teeu saseredote raicha. Aihute inae nerautaa in somaraa in neei nii ii cosibi cajene coaraa in, inae acaauru rohan turunaa nainee in coitucuurumi in sati in cachaaurura,” naain jetao letoae Jesoso.

<sup>15</sup>Ne jetaote, niriti in bihane caohatiha Jesusone saijieein, acaauru rautaa ne coinane maajee in jataa in jelai amuritoheri in turuhacoa in coaraa in aonaa uure cachaauru. <sup>16</sup>Ne jetaote, tabaauru que acaauru caje amuh in, nii neniha cachane jaau cuhin jetao Cana Coaunera baja re jetao Jesoso.

#### Leinji in jiu rona rautaa Jesusone

(Mt 9.1-8; Mr 2.1-12)

<sup>17</sup>Nii baiha, cachaauru relaa Jesusone jana jetaote, ecu nelauriaa coa in aonajeure fariseeocuru tabaauru, Cana Coaunera naitoonjoa que cacha relaa urera, naaonjoa in nuri, Calileea batane, Jodea batane, Jerosaleen, naaonjoa ihunri sacuta in churu caje uhacoa in. Nii jana jetaote, aina cuaa in niicha ichana nainei ichaa Cana Coaunerane jaun, cunaitenacaauru rautaa coaa Jesusone jana jetao,

<sup>18</sup>leinji in cacha jiu rona turuaa uure cachaauru, rai nela cuhane tijicha in ama in. Inae turuaa in jetaote, loreri asae enoanaa jerecure, nacatiha coaraa Jesusone caina niqii. <sup>19</sup>Ne jetaote, nene enooruhane jaanu, jataa in araaicha cachana jaun. Nii jaun jetaote, loreri coarana joaraca in jetao rai nela cuhane tijicha in, sati in cachaauru cataaun jetao Jesoso acatiha nii jiu rona cacha faure. <sup>20</sup>Nii jana, esinaen rauhijiri in rautarichaa inne esenetaa in aihuruha nii cachaaurune coaraane jaun jetaote:

“Inae ii que suujua acate in ii osa caje ichoteratenohinee icha cacalabi,” naa Jesusone jana jetao, inae nerautae nii cunaitenaa cacha.

<sup>21</sup>Niriti in nii jiu rona rautaa Jesusone aonaa in jetaote:

“Chanee inna ne caa cacha, cariti in eree in Cana Coaunera baijiaraanu rijiti in irihane caina. Leinji in Cana Coaunera achate nainere nosa caje cacha ichoterate in cacha que suujua acate in nihanera,” naain jetao eree ure Cana Coaunera naitoonjoan que cacha relaa urera aina fariseeocuru.

<sup>22</sup>Niriti in que eree uruhane que nainaa in jetaote: “Chanuna niriti in eree iche. <sup>23</sup>Chaquena caaintare: ‘Inae ii que suujua acate in ii osa caje ichoteratenohinee icha,’ naeniha cane:

‘Nimichuh in amuun,’ naacane. <sup>24</sup>Coara-jeue chenejian, Cana Coaunera Calao hi cachanee in nejanoanaa nichaaunne, itolere Curuaanaa nee in nihanu caa cana rai chauratane quene coaratete, rai nosa caje cacha ichotena nainichaaunne coitucuhiche,” naain jetao, nii jiu rona cacha rai jetao:

“Icheine aitoon. Nimichuh in chela seri in chenejaun caunihu,” naane <sup>25</sup>rijieeoriti in jetao, sati in coarajeeru hane notaraca e nimichuh in, nii tocuhacane jaa nela seri in jetao, Cana



Coaunera corojeein rai nenajaun cauha cue nii jiurohane caje nerautanaa cacha.

<sup>26</sup>Nitohanihane coaraain jetaote, satiin cojoelatiin Cana Coaunera coroaecuruhane saijjeein jetao coasiin: “Charijibana coaraa catohanaine que airijiinte, enene catohanai cojoelanaaco-joai coaracaachera,” naaure jetao ita rai.

**Lebi cotijiaa Jesusone**  
(Mt 9.9-13; Mr 2.13-17)

<sup>27</sup>Nitohaneein nii jiurona cacha rautaane baiha, jelai caje mituha cuuruhane jaun jetaote, leinjiin cacha, Roma curuaanaa rai *impoestonu* que coriqui que cachaauru cobaraera Lebi coari Jesuso, nii coriqui teuruhana jaa rori ichoae lauheco jana. Nitohaneein coariin jetaote:

“Chajaau canihara,” naain cotihaca Jesusone <sup>28</sup>rrijieoritiin nimichuhin jetao, satiin niicha ichanenu ratiriin Jesuso jiniichaain aina cue Lebi, caaijie cunacaauru aina.

<sup>29</sup>Nitohaneein Jesuso jiniichaain cuhin jetaote, nii baiha neenejeein coroaena caaun rai loreri asae beseta ichaa Lebine jana jetao, ecu neure arajiin leeochoauru Roma curuaanaa rai *impoestonu* que coriqui que cachaauru cobaraaurera, chaen leeochoauru cachaauru, naaonjoaihunri.

<sup>30</sup>Nii jaun jetaote, Jesuso aina nerelanacaauru rai:

“Chanuna cocoaeraa Roma curuaanaa rai *impoestonu* que coriqui que cachaauru cobaraaurera aina leeochoauru osaaonacaauru aina lenoneein, acau cohin, naaonjoainchene saijjeein, nii acaauru aina netaojiaain lenonequiche,” naaure jetao acaauru rai, nechu jataain acaauru que iriha Cana Coaunera naitoonjoa que cacha relaureraauru fariseeocuru aina leeochoauru fariseeocuru.

<sup>31</sup>Niritocuruha nii aina nerelana-caauru raine aonaain jetaote:

“Coatiha coichara latecuruhi raotojeein raurohin nenacaauru. Leinjiin cunaitenacaauruhachate coichara latecure. <sup>32</sup>Coatihachu baaso ichacuruhane nihanatiin coitucunaa jeriheichuru cotihaca uhahaun. Leinjiin osaaocuruhane coitucureraaurune cotijiaaun, rai suujua coreein jeriha Cana Coaunerane rijijieein neeunruhane coinara,” naain jetao tonoranajae Jesuso.

**Ena Niicha Tei Ichaonaa**  
**que cacha relaa Jesusone**

<sup>33</sup>Nii jana jetaote:

“Chanuna jana chaen, Joaan, fariseeocuru, naaonjoaihunri relanojoinuru jataain Cana Coaunera bajaee bajaecure suri couu netiin cosinacaain. Nete laen itolere bana ii aina nerelana-caauru, acau cohin, lenoneein, naaonjoaunreta,” naauruha Jesuso raine jana jetaote:

<sup>34</sup>“Aiha chuhisi niqui. Nete ene ranaa jeriha cachana jaa beseta que neeuruhane jaun, suri couu neein cosinacanaa nainecurene caa cotihanohinchuru, jaiti acaauru aina niha nii ene raeranu cachane jaun.

<sup>35</sup>Nete laen, inae nii jianacon teein cacha ranaa jerera nichaaunne amaauruhane suri couu neein cosinacaain inaderaa cuurureeincha,” naain jetao: <sup>36</sup>“Coaraanachuhinti, nihei chuni, obiri enachasine soaain que cajione siri counera. Nitohaneein nii obiri enachasine soaihanete nii obiri enachasine asaaere, nii cajione siri. Chaen caohachaain nedanaa nainihei nii obiri enachasine, nii cajione siri que couneraane. <sup>37</sup>Nii rijijieeinchu, nihei chuni inae conaca que tiha coaeraine jana cuhane ichonai tera. <sup>38</sup>Nitohaneein

cuhane teraa ichonainete naasaare nii coaerai. <sup>39</sup>Niheichu coaerati cohane baiha ichohanti coera, ichonai amuritoheriin raotoha coaeratine jaun,” nae jetao, cacha relauruha fariseeocurune rijijielanaala, leeochneein cacha relaane jaun.

**Nebetacanaa janonaa bana tirico  
moloonejeeuruha Jesoso  
aina nerelanacaaurune  
(Mt 12.1-8; Mr 2.23-28)**

**6** <sup>1</sup>Nebetacanaa janonaa bana tirico coocana jana situujeeuruha aina nerelanacaauru aina Jesosone jana jetaote, nii tirico moloonejeein biji cuhane situsitunjihanaain nuuhe quihure nii aina nerelanacaauru.

<sup>2</sup>Nii coaraain jetaote:

“Chanuna nebetacanaa janonaa bana cocoeraa nitohanai ichara natiin, nitohanai ichacure nii ii aina nerelanacaauru,” naain bajaauruha fariseeocuru tabaaurune jana jetaote:

<sup>3-4</sup>“Aiha niqii. Nete laenanohineein ne Cana Coaunera Quiricha cuhane. Tana lesajei que Cana Coaunera loreri taberenacolo asae enohin Cana Coaunera que banijiaineein niha nii faan natiin, mijitenacaaun rai corihacuru aina jiniiquiin nii faan quiha Rabirine ereretaain coaraqicheneta. Acaihaniji saseredotecuruhacha nii faan quihane rai nihanatiinte quihurelu,” naain jetao:

<sup>5</sup>“Canu- cachanein nejanoanaa nichaunnena, nebetacanaa cojoananaa amurijiriin cocoinanohineein neeun.” naain jetao acaauru tonrae Jesoso.

**Jiurona bijihona cacha  
(Mt 12.9-14; Mr 3.1-6)**

<sup>6</sup>Nii baiha jetaote, coaiten nebetacanaa cojoananaa bana, sinacoca asae enohin cachaauru relaa Jesosone jana

jetao, ecu acaauru jana niha leinjiin cacha, rai biji raotono nichajai que jiuronane jaun jetaote: <sup>7</sup>“Necha caa nebetacanaa janonaa bana nihane saijieein, caa jiurona jijii cacha rautari-chaainta,” naain jetao, Jesoso cojoelaaure colurujeeuruhanane jaan lera ariha aihuruhane jaun, Cana Coaunera naitoonjoa que cacha relaurera aina fariseeocuru. <sup>8</sup>Ne jetaote, nii cojoelauruhane que nainain jetao, nii jiurona jijii cacha rai jetao:

“Nimichuhin nii ena cataaun nichaaurauraa,” naa nii Jesosone jana jetaote, nimichuhin nichaauraa nii cachane jaun jetao, nii fariseeocuru rai:

<sup>9</sup>“Inara raine leinjiin erenaajanaa jereun. Chatohanai ichacaane caohachae. Nebetacanaa janonaa bana, cacha ichao rai caohacha ichacaanena caohachaa. Ainihane cacha ichao itajihacanena caohachaa,”

<sup>10</sup>Nii baiha jetaote, nii ecu satiin curuhacaain nenacaauru coaraain jetao, nii cacha rai aitoha jetao:

“Ichoii raujiaaute coaracaara,” naa rai Jesosone jana jetao, rai biji raujiaa nii cachane jana jetao, jiurohane caje inae nerautae nii cacha biji.

<sup>11</sup>Nitohaneein nii jiurona rautaane coaraain jetaote: “Chana icharihacache caa aansai aina,” naain jetao, jataain Jesoso aina obaaecure nii ecu neein coarajeerera fariseeocuru aina Cana Coaunera aitoonjoan que cacha relaureraauru.

**Lechoonca coroatajai rai  
afosotooru janiicha Jesosone  
(Mt 10.1-4; Mr 3.13-19)**

<sup>12</sup>Nii bana jetaote, ichtatane ecuunno que cuhin, janoaajeein Cana Coaunera bajaebajeein janoe jetao Jesoso. <sup>13</sup>Inae janohane jana jetaote, nii aina nerelaa amuhemuhenacaauru jitariin cotihanajaain acaauru

caje janijiin lechoonca coroatajaihuri cocoaain, afosotooru neein acaauru curuaate. “Afosoto” naanete, “Letononeein nenea” naane aite.

<sup>14</sup>Nii niicha janijiichuru jetaote, Simoon-nii Fedoro neein niicha curuhateeni, chaen nii Simoon nejera Aanderesi, chaen Saantiaao, Joaan, Ferifi, Bartolomee, <sup>15</sup>Mateo, Tomasi, chaen Arafeeo calaohi-Saantiaao, chaen Selote neein niicha curuaateuri-Simoon, <sup>16</sup>chaen Saantiaao calaohi-Jodasi, chaen nii Jesoso couluru-jueranu Jodasi Isacariote, naaonjoaihurine.

### **Arajii cacha relaa Jesosone**

(Mt 4.23-25)

<sup>17</sup>Inae nitohaneein ichtatane ecuunno cuhin, nii rai afosotooru janijiin cocoaiane nainaan jetaote, acaauru aina jiniiquiin atane macararo que fauha cue Jesoso. Nii jana jetaote, ecu turuhin nii aina amuhemuhenaacauru aina netaojiaaure arajii cachaauru. Jodea batane, Jerosaleeun, cucuhana auhaniha nenacaauru neseeuru-Tiro aina Sidoon, naaonjoaihunri cajeeurune maajeein turuhacoaare. Acaauru relaa Jesosone aonanacanejeein, acaauru rautaa acaauru cunain cajene coinane maajeeinchuru turuuure jataain arajii cachaauru.

<sup>18</sup>Nii coitucuchuhi ichanohinein cunaitenacaauru rautaane jana jetaote, nerautaacoaare. <sup>19</sup>Nii coaraain jetaote, satii cachaauru, Jesoso dadanaa jerecure biji que, aca jerihane rijijieein nerautaacoaauruha nii cunaitenacaaurune coaracuruhane jaun.

**Raotojoein neeuruha tabaaurune jana tabaaurute raotelanaala neeureein.**

(Mt 5.1-12)

<sup>20</sup>Nii jana jetaote, nii aina nerelanaacauru coaraain jetao:

“Ena cairicheinein neeichene natiinte, nerausijeein neeiche, Cana

Coanera cojoanona inara rai nihane jaun.

<sup>21</sup>Ena mijitenaanaun neeichene natiinte, nerausijeein neeiche, nii chaque lanaelanaala neriquicheeine jaun.

Ena chanaaiche natiinte, nerausijeein neeiche, rachoojoein enoanaain neriquicheeine jaun.

<sup>22</sup>Canu cachanein neeichene coreniha, inara cotaain, inara sitaain, inara nocoeje chanuhin, inara que jaolequuin naaonjoauruha canu corenihane nihanatiinte nerausijeein neriquicheein. <sup>23</sup>Nitohanein inara teeuruhane nihanatiin jataain raotojoein rachoojoein neeuche, canu coreniha dedeeu raotojoein neriquicheeine jaun. Coaracuchenachuhinti, inara cairichauruha inara araichurune rijijieein, Cana Coanera ere beracuru *profetacuru* cairichaerin nerejetucuruhalu acaauru inoensihuru.

<sup>24</sup>Coaraain nainacuche coriquihonacaauru. Inae ena aachene rijijieein rachoojoein niha curieeicheein.

<sup>25</sup>Coaraain nainacuche ena raotojoein lenonein nenacaauru. Inae nerinaain inara rai lenone.

Coaraain nainacuche ena enoanaain nenacaauru. Inae inaderanaa caaun chanaa curiquicheein.

<sup>26</sup>Coaraain nainacuche itolere neein atane sacuritaain coroaenohinein nenacaauru. Nitohaneinte *profetaniha* nocoetonacaauru corojeein nerejetocurelu inara inoensihuru.

### **Ichei nejeratenacaauru belaihu.**

<sup>27</sup>Nena laen inara canu ere tonoraera nequichene rai aitoreunni. Inara que nererojoecaain jaolequuin nenacaauru belaa in caohachaa in acaauru aina neeuche.

<sup>28</sup>Nechu jataain inara cotaiha: ‘Coaraain nainacuche necha aansaihuru,’ naain inara que erein nei belaa in, rai Cana Coanera bajaauche. <sup>29</sup>Chunucoha lejerajei chomeri

faohitohane, rai jera netonai icharateeu. Jana chunucoha ii cajione buri ruluhane, rai ii obiri netonoai teeute amaaine. <sup>30</sup>Jerichanejeeinchu, ii caje chaelai bajaeranihane teeu. Coa ii caje iicha sirii rulueraanihane, coa tonaain iriha. <sup>31</sup>Charijieeinchaainti, inara belaiha cachane jeriquiche, nii rijijieein acaauru belaihuca inara netonai.

<sup>32</sup>Inara belaihaauruhacha belaiin neeichenete, aihuruha nii Cana Coaunera coitucuelanaala nenacaaurune rijijieein neriquicheein. <sup>33</sup>Nii rijijieein-techu, inara coroatajaneraauruhacha belaiin neeichene, aihuruha nii Cana Coaunera coitucuelanaala nenacaaurune rijijieein neriquicheein. <sup>34</sup>Chaentechu, chaelai lateein niha cachane jana, inara rai cainaane coina teeichene, aihuruha nii Cana Coaunera coitucuelanaala nenacaaurune rijijieein neriquicheein. <sup>35</sup>Jana laen, nii inara que jaolequiin, inara que nererojoecaeriin, naaonjoaain nenacaaru aina caohachaain neein, chaelai latecuruhane acaauru rai teeiche, inara rai cainacuruhane latelanaalane, caohachae. Nii rijijieein neeichenete, esinaen rauhijiriin jerihane rijijieein ichaquichene jaun, inara rai nii cainareein Cana Coaunera, nitohaneein acaauru belaiha natiin coitucunaa jerelanaala nenacaauru, neechu aansainein ichaonacaauru, naaonjoaihurri belaiin ichaa Cana Coaunerane jaun. <sup>36</sup>Nii cairichaojoaain cachaauru coaraa Cana Inaca Cana Coaunerane rijijieein, inara netonoai cairichaojoaain inara amute cachaauru coaracuche.

**Jiaonriha leeochoaauru que  
baasoneein ereein neeichene**  
(Mt 7.1-5)

<sup>37</sup>Jiaonriha leeochoaauru amurijiriin nena coacuhin, leeochoaauru que

baasoneein ereein neeichene, nabana, nii leeochoaauru ichaquichene rijijieein inara tiha Cana Coaunerane coataa. Chatohanai ichaa inara leeochoaurune, acaauru que inara suujua acatecuchete, inara que netonoai suujua acateemiin Cana Coaunera. <sup>38</sup>Chaelai lateein neeuuha inara amute cachaaurune jana rai teeichenete, inara rai inaraacha latei terein Cana Coaunera. Jitariin inaraacha sirii teeichene nihanatiinte, jelai amuritoheriin inara rai cainareein Cana Coaunera. Chaentechu leeochoaauru coaraqichene rijijieein, inara netonain coareein Cana Coaunera,” naain jetaote:

<sup>39</sup>“Coatiha nelaterihei, leinjiin maosa amaeraanu que niha leeochoa namute maosane. Enaachate nitohanihane, leinjiin eucha jachu cuhane naluhin jiniiquiin nitajenaa nainecurure.

<sup>40</sup>Niheichu nii chuni, rai relaera amurijiriin nena nainera. Nii inara relaera rijijieein nerelaachene banaachate nainereiche, raujaain rijijieein neeichene.

<sup>41</sup>Chanuna inejeraacha baaso ichajeein ichaohane coaraa. Tana iitonai jataain amurijiriin baaso ichajeein ichaohine coaraaine. <sup>42</sup>Chasiina iitonai baaso ichajeein ichaohine coitucuneeine, baaso ichajeein ichaoha inejerane coitucureei. Jauriaanejeein ii baaso ichajeein ichaohine coitucuhin jianein ichaao. Nii baihate laen nainereei inejera rai: ‘Baaso ichajeeinte ichaohi. Chajaain baaso ichajeein ichaohine jianein caohachaain ichaao,’ naain erenaa nainereei.

**Rai ninna cajete, coitucunacaine  
temule caohacha**  
(Mt 7.17-20; 12.34-35)

<sup>43</sup>Niheichu chuni temule caohacha, baaso que inaana nainei. Niheichu temule baasoniha natiin caohacha que inaana

nainei. <sup>44</sup>Nitohaneente, rai ninaa caje temule caohacha coitucuhaca. Nitohanihane jaunte, chabana tijiemule que inaana nainene ojoa. Jerichanejeein chu chabana caji uhi que, inaana nainihe i jiaaen soririji. <sup>45</sup>Nii rijijieein techu, caohachaa in suujua coara cacha, caohacha nejesina que ere, sati in caohacha- rai suujua cuhane nihane jaun. Jana cacha, baasoneein suujua coarate baasoneein ere, sati in baaso- rai suujua cuhane nihane jaun. Nitohaneente cacha ujuae caje mitue sati in rai suujua cuhane nena.

**Coroata laurii loreri icharaauru rijiiicha nere aonaera biha Jesosone**

<sup>46</sup>Chanuna itolere bana, ‘Canu Curuaanaa,’ nainchene sainejee in quere tonoraain quii cha jerei ichaeneeiche.

<sup>47</sup>Aonacuchena inara rai canu ere tonoraain caitoonjoan icharaauru que erete coitucuhiche. <sup>48</sup>Charijie in chaainti, loreri jaane caina jauriaanejee in ucuaati in bajee in, enuha suuji caohachaa uru temuh in ichaa leinji in cachane jana, uha tabanaane jana que taca uujinaa mijiaane in nihanati in nii loreri comaene, caohati in ichanoh in nihane jaun. Nii rijiiicha cacha, canu ere tonoraain caitoonjoan ichaa chabana jianelanaala ne.

<sup>49</sup>Jana quere tonoraeni ha cachanete, araracaeri in atane bajee in, baasooru que banesijiatee in loreri icha cacha rijijiee in ne. Nii jana uha tabanaane, que mijiaane in taca ujuinaane jana, beraujuain nitaje nii loreri, nii rijiiicha nii canu aonaane sainejee in, quere tonoraelanaala nenacaauru cachaauru,” nae acaauru rai Jesoso.

**Romanocuru rai soondarooru curuaanaa cafitaan letono rautaa Jesosone**

*(Mt 8.5-13)*

**7** <sup>1</sup>Inae nii cachaauru rai irihane nainain jetaote, Caferenaan cue aina nerelanacaauru aina Jesoso. <sup>2</sup>Nii

jana jetaote, nii Caferenaan ichoae leinji in Romanocuru rai soondarooru curuaanaa cafitaan. Nii jana nii cafitaan letono- jataa in belaa in niicha sirii jetaote, cunaitee in ohane rai ne.

<sup>3</sup>Nii jaun jetaote, nii Caferenaan turuh in ni ha Jesosone inaaori in jetao, Jorioocuru bichauhenaa uru letoae nii cafitaan, conujuee in Jesoso cotihaca cuuruhane, nii rai letono cunaitena rautaa uhane caina. <sup>4</sup>Nii jaun jetaote, rene turuh in:

“Iine cotihaca uhacaanu canacaanu letoaa cafitaane jaunra. <sup>5</sup>Jataa in canacaanu araachuru belai chane in, aca canacaanu rai sinacoca ichaeratee in, naaonjoa in nihane jaunne, caa cafitaan corotajane in rai letono rautaa in jerichaanura,” naaure jetao Jesoso rai.

<sup>6</sup>Nii jaun jetaote, acaauru aina cuh in, inae turuhe lalajee in cujuue ruha Jesoso ainane jana jetao, rai belai chaa uru letoae nii cafitaan: “Curuaanaa, coatih a nii chaque ichei nelatee in ni haan canu loreri asae turuhine caina. <sup>7</sup>Nii jaunne caraaje- nihane ii cotihaca uhenee un. Acaihaniji aitoote nerautami in canu letono. Ii aito hine rijijiee in nerautarichaa in canu letonone coitucuhanune jaunne ichei rai ujiaa in beratee un.

<sup>8</sup>Nii rijijiee in canu letoaa uru ha canu curuaanaa curune tonoraain nee un. Nii rijijiee in techu, canu bijiu nenacaauru soondarooru caje chunucoha letoaanune, canu ere tonoraain cue. Jana chunucoha cotihacaan uhane coinanete canu ere tonoraain uhe. Jana canu letono letoaanu chaelai ichaane coinanete canu ere tonoraain ichae, nanichuchera,” naa in letoaa cafitaane jaun inae aito ha cuuruhane jana jetaote, <sup>9</sup>cojoelati in, nii aina amuhemuhenaacaauru cachaauru coarajee in jetao:

“Coatiha Isaraelita nichaachene lauri jana, caa cacha tocohaneein jataain quesenetaera coarahaunta,” nae jetao acaauru rai Jesoso.

<sup>10</sup>Nii jana inae jelaiha cauha cuuruha nii cafitaan loreri asae nii niicha letooaurine jana jetaote, inae acaauru ajiniha nerautain niha nii rai letono cunaitenaane jana turuure.

**Leinjiin autana calaohi ichtiha  
ohane caje Jesosone**

<sup>11</sup>Nitohaniane baiha jetaote, aina nerelanacauru, chaen arajiin sacuurera cachauru, naaonjoaihunri aina leinjiin nese Naain ineein curujai nichae cue jetao Jesoso. <sup>12</sup>Nii jana jetaote, inae turuhelalajein cuujueeruha nii nese quene jana jetao, leinjiin ene autana calaohi- leinjiin acaacha calaohineein nenea onaa conautiha jetao cuure. Nii jana jetaote, nii nese caje cuhacoaain arajiin corihaniha cuure cachauru.

<sup>13</sup>Nii jana nii autana coaraa Jesosone jana, cairichaojoaain coaraane jaun jetaote: “Coa chanaara,” naain jetao, <sup>14</sup>nii rijieoritiin, nii onaa roha nichuuntaain, nii amaunruhane jaa rori dadaane jaun jetao, ecu inacuhin coarajeeuruha nii baijiaain amaaurerane jana jetao:

“Enamanaa, nimichuhin nelauriaaura,” naa Jesosone jana jetao, <sup>15</sup>inae nimichuhin nelauriaain ere nii onaa. Nitohanein nii neba rai nii onaa ichtatein tiha Jesosone <sup>16</sup>coaraain jetaote, satiin acanein nihane que suujua acatein chojelatiin jetao:

“Jataain itolere amurijiriin nelatein, itolere ichana nainera *profetate* cana rene turuera,” naain jetao:

“Cana Coaunerate rai cacha nichaachene coroatajaniha uhera,” naure jetao Cana Coaunera coroajeein, neebana nitohanai coaracuruhane jaun.

<sup>17</sup>Nitohanein coaraain jetaote, satiin Jodea batane sacuritaain jetao beeuruhane jaun, nii onaa ichtiha Jesosone coitucuuere.

**Joan Baotisita letonocuru  
(Mt 11.2-19)**

<sup>18</sup>Nitohanein onacauru ichtatein, naaonjoan Jesosone coaraain jetaote, Joaan rai biha cuure sacuurerauru. Nii caje coitucuhin jetaote, coroatajai sacuurera cotijiaain jetao: <sup>19</sup>“Ina esinae rauhijiriin canacaanuhacha cohajei turuha uheneninee. Aca neneine canacaanu rai beeu, leeocho cohacaanune coina,’ naain bajanichuche rene turuhincha,” naain jetao letoanajae Joaan Baotisita. <sup>20</sup>Nii jaun cuhin, Jesoso rene turuhin:

“Joaan Baotisitae canacaanu letoae, ii esinae rauhijiriin nii canacaanuhacha cohajei turuha uhenenineeine bajaacanune coina. Aca neneine leeocho cohacaanune coina,” nauruha Jesoso rene turuhin Joaan letonocuru <sup>21</sup>rijieoritiin jetaote, araii laurii cunai caaun cunaitenacauru cachauru rautaaain, arajii maosacuru nota tein, coitucuchuhi caaun cunaitenacaurune maajeein rautaacoaane baiha jetao, nii coroatajai Joaan letonocuru rai jetao:

<sup>22</sup>“Chajaain Joaan rai caa ena inaraacha coarai aina inaraacha aonai benichuche. Chaen, inae maosa neeuruhane caje notaauruha maosacuru. Bacosacuru netonaite inae nichaaurain amuure. Cosibinacauru netonoaite inae cosibi caje nerautaacoaure. Iricho saaecuru netonaite, inae irichohin neeure. Nii jana onacaurute jerichanejeein cacha neein jaberoconein nichaaurain neeure. Jana cairicheinejeein nenacauru raite, jataain acaauru rausiaaerichaain Cana Coaunerane beebeje. <sup>23</sup>Nitohaniane jaunte,

nerausiajeein neeureein canu que jaaecohane jianelanaala nenacaauru,” naain jetao, “Chajaain caritiin benichuche Joaan raicha,” naain jetao acaauru letoae Jesoso.

<sup>24</sup>Niritoha acaauru raine jaun, jelaiha cauha cuuruha nii Joaan letonocurune jana jetaote, nii Joaan que cachaauru rai ereereje jetao Jesoso. “Chatohanai coaraa curejetocochelu nii cacha areroo cuhin. Leinjiin jiarana nujan cujuanaacha rurujuaina coaraquichelu. <sup>25</sup>Chatohanai coaraquichelu. Leinjiin cacha cajione caohacha que necoreetein neina coaraquichelu. Nete nii cajione caohacha que necoreetein nenacaauru, cocoainanacaihuru loreri asae neeuruhane coitucuhiche raotojoein. <sup>26</sup>Chatohanai jian coaraquichelu. Leinjiin *profetana* coaraquichelu. Aiha jerihane, jataain *profetacuru* amurijiriin nena leinjiin *profetate* coaraquichelu.

<sup>27</sup>Nii Joaan que tejian, rai Calaohi nichaunne rai aitelu jetao:

‘Chajinihane quere beranu que leinjiin letoareeunni,

turuhine jaanu rucuheraanu quera,’ naain belu Cana Coaunera, niicha laenaeratenojoi rai Quiricha inoansi cuhane. <sup>28</sup>Coatoha inoanlu caje coaanein, enanetojoein nihei chuni nii Joaan amurijiriin nei cacha. Nete laen ena turunaa Cana Coaunera Cojoanonaa, canuhacha tei que nena cacha, leeochoaauru fautaain nihane niha natiin jataain Joaan amurijiriin ne.

<sup>29</sup>Nete cachaauru relaa Joanne jana, satiin aonaraauru cachaauru, nii Joaan que acauhanau tein nebaotisaerateurelu. Nii choae tacaaintechu, Roma curuaanaa rai *impoestonu* que cachaauru cobaraain coriqui bajaaurera netonai necha ansaineein neeuruhane saijieein nebaotisaerateurelu, esinae rauhijiriin

Cana Coauneraacha icharatenohi ichaa Joanne esenetaauruhane jaun. <sup>30</sup>Jana fariseeocuru aina Cana Coaunera naitoonjoo que cacha relaaureerauru, itolere amurijiriin Cana Coaunera coitucutoha nocoetocuruhane saijieein nebaotisaeratenaa jerecuruhilu, Cana Coaunera icharatenohi icharanein aiha Joanne esenetaan jerelanaala que jaolecooruhane jaun.

<sup>31</sup>Nitohaneinte itolere acaauru rai baaso ne. Nihei acaauru rai chabana caohacha.

<sup>32</sup>Acaaurute nenaanaja cataaun nocoatiijiana jaun auno toteeuruha acaauru amute canaanaihurune jana, raasanaa jerelanaala neein, niheichu berane ichacuruhane jana chanaaurene acaauru amute canaanaihuru. Nii rijichuruha caa enene nenacaauru cachaauru. <sup>33</sup>Nii rijichuruhane jaunte, turuha Joaan Baotisisa coaerai conaa inaelanaala, faan niha natiin quinaa inaelanaala, naaonjoaaine jana, ‘Nechu aansainihane jaunte ai, nechu jataain coitucuchuhi siriha rai suujua cuhanene jaun,’ naain que ereeichelu.

<sup>34</sup>Nii baiha canu- Cachanein nejanohanaa nichaunne turuhin, coaerai cohin, lenonein, naaonjoaanune jaunte, ‘Ahotiritiinjiene tabaain lenonein ajetoriaaneun. Chaen jene nechu aansaineein ichaonacaauru cachaauru belaaain, Roma curuaanaa rai *impoestonu* que cachaauru cobaraain coriqui bajaaurerane maajeein belaitoon,’ naain ereeiche caque. <sup>35</sup>Nete inae ecu thiane bana esinae rauhijiriin Cana Coauneraacha icharatenohi ichacaunne coitucuha cuurureein satiin cachaauru,” nae jetao acaauru rai Jesoso.

**Leinjiin fariseeoneein nena Simoon rene turuha Jesosone**

<sup>36</sup>Leinjiin fariseeo jetaote, Jesoso cotijiae rai loreri asae turuhin lenoniha

cuhane coina. Nitohaneein cotihacane jaun cuhin, inae loreri asae turuhin, lenonecuruhane coina rori ichoae nelauriaa Jesosone jana jetaote, <sup>37</sup>turuha cue leinjiin ene cojoaeloroheri nii neseu ichaonaa. Nii ene jetaote, nii fariseeo loreri asaa turuhin lenoniha cuha Jesosone inaoriin jetao, lecuruhin jataain coretiin nena erene jujui amaain turuhin jetao, <sup>38</sup>chanaain Jesoso tija rohan nelauriaain, rai nota baca que jetao rai tija rujuae. Nitohaneein rujuaane baiha jetaote, rai couturiji que caruruhin jetao liosiin, erene jujui que rujuae.

<sup>39</sup>Nitohaneein ichaane coaraain jetaote: “Esinæ rauhijiriin leinjiin *profetanihane* jana nihanete, caoneein tiha caa ene cojoaeloroerine jana, baaso nihane coitucure caa cachara,” naain jetao suujua ereein coaraje nii Jesoso cotihara fariseeo.

<sup>40</sup>Nii jaun jetaote, nii fariseeo rai: “Simoon, icheina erenaa jereun aonaaine coina,” naa Jesosone jana jetao: “Saan. Aitoo caraine aonaera, cacha relaera,” naa nii fariseeone jaun jetao:

<sup>41</sup>“Leinjiin cacha jetaote, corotajai cacha rai coriqui te, jelai amuritoheriin rai cainacuruhane coina niqui. Nitohaneein jetaote, leinjiin rai te saoque fashaaain. Jana leeochoa rai jetaote, te saoque chooncaain.

<sup>42</sup>Ne jetaote, coretena nainecurenihane jaun, nii corotajai que rebeonacaauru cachaauru cobaraelanaala acaauru que suujua acate nii coriqui erora. Tonaai jana nii que. Chariji jana nii corotajaaiahuri caje, jataain nii coriqui erora belaaain coare,” naa Jesosone jana jetao:

<sup>43</sup>“Jerihane nii leeochoa amurijiriin rebeona cachate jataain nii coriqui erora belaaain coaraera,” naa nii Simoonne jaun jetao:

“Esinæ rauhijiriinte aitohicha,” nae jetao Jesoso.

<sup>44</sup>Niritiin jetaote, nii ene coarajeein, nii Simoon rai jetao:

“Caa ene coaraaunachuhinti. Coatiha jauriaanejeein ii loreri asae turuhanune jana, catiha culecaauune coina carai acau tiheei. Nete laen caa ene, rai nota baca que catiha culejeein rai couturiji que caruruhin jacorae. <sup>45</sup>Coatihachu turuhanune jana canu meri lioracaheei. Caa enete laen turuhin enohane caje coauneein canu tija lioracaane jianene.

<sup>46</sup>Niheichu nii jujui niha natiin cacouturi ichoae tiheei. Jana caa enete laen catiha ichoae erene jujui chorohin que catiha rujuae. <sup>47</sup>Nitohanihane jaunne ichei aitoon. Arajii rai nosate inae que suujua acate, jataain canu esenetaain canu belaihane coaratihaha caa ene ne jaun. Nete laen, nii leeochoaauru amurijiriin caohachaaain ichaoha nocoetonacaauru, rai nosa caje chabana nichoteeureneerein, chabana osaaocuruhane coitucuhin canu belaina jerecurenihane jaun,” naa nii fariseeo raine baiha jetao, <sup>48</sup>nii ene rai:

“Inae itolere baaso ichajeein ichaohine caje ichoteratenojooineeichera,” naa Jesosone jana aonajeein jetao:

<sup>49</sup>“Chaneeinna ne caa cacha, itolere baaso ichajeein niha caa enene jaan caje niha natiin ichoterateein nihane coina,” naauruha nii aina ecu cotihanohineei neein aonajeeurerane coitucuhin jetao:

<sup>50</sup>“Quesenetaaine jaunte, ichoteratenojooineein neeiche, baaso ichajeein neeine jaan caje. Raotojoeein chenena-jau caunihuchera,” nae jetao Jesoso, nii ene rai.

#### Jesoso corotajaneraauru enecuru

**8** <sup>1</sup>Nitohaneein jetaote, itolereenein neseeuu nainein, nenanajaaunru nainein amuhemujeein Cana Coaunera cojoanonaa que ereerejeein amuhemuhere-



jete Jesoso, lechoonca coroatajai rai afosotooru, <sup>2</sup>chaen coitucuchuhi caje, joanreein cunai caje, naonjoaihunri caje niicha rautauri enecuru tabaauru que corihaneraain. Niichuru aina jetaote cuelu, nii caaunsineein suujua cuhane coitucuchuhi sirihane jana nii Jesosohacha rautai “Maadala bene” naain niicha curuaateuri Mariha, <sup>3</sup>chaen Erodesi amihaneeo beraichanein nena Cosa comasai Joana, chaen Sosana, naonjoaihunri aina leeochoaauru arajii enecuru jetao, acaauruhacha sirii que acaauru coroatajaneranein cuure.

**Temule jaera *parabola* que erenaa**  
(Mt 13.1-9; Mr 4.1-9)

<sup>4</sup>Nii jana jetaote, neseuru caje cuhacoaain Jesoso coaraa cuuruha arajii cachaaurune jaun, arajiin netaojiaauruhane jaun jetao acaauru rai: “Aonacuchene ena inara rai temule jaera *parabola* que erete coitucuhiche.

<sup>5</sup>Leinjiin cacha, ucuhe riaaca cuhane jaun jetaote, bero cuhane naluha nii niicha riaajai nucuhene jaun shaaocure cachaauru. Chaen tabaauru quihure tajaaelinaacuru. <sup>6</sup>Nii jana tabaauru ajeri choae nalunacaauru jetaote, omarohane sainejeein ohijiacoae. <sup>7</sup>Tabaauru ojaoneonjoai jana nalunacaauru jetaote, omarohane jana amurijiriin omaroha ajaenane jaun ohacoae. <sup>8</sup>Jana tabaauru atane caohacha choae nalunacaauru jetaote, caohachaaain omarohane jaun, ele ucuhecuro caje ele fashai ucuheneeinchuru nefae,” naain jetaote, acaauru rai tonijiaain: “Caa caitoonjoan coitucunaa jeriquichene aonacuche,” nae jetao Jesoso.

**Temule jaera *parabola* que acaauru relaa Jesosone bajaauruhane**  
(Mt 13.10-17; Mr 4.10-12)

<sup>9</sup>Niritiin temule jaera que cachaauru relaa Jesosone jaun jetaote:

“Chatohanai quena nii temule jaera que cuaain cachaauru rai aitoi,” naain Jesoso caje bajaauruha aina nerelana-caaurune jaun jetaote:

<sup>10</sup>“Inaraacha quete rai Cojoanonaa coitucuerate Cana Coaunera. Nena laen, nii canu esenetana jeriheichuru cachaauru rai carijieein erenaa *parabola* que cuaain acaauru rai beeun, nabana coaracuruhane nihanatiin coitucurenihane caina, niheichu aonacuruhane nihanatiin coitucuruhane coataa.

**Temule jaera *parabola* que cachaauru relaa biha Jesosone**  
(Mt 13.18-23; Mr 4.13-20)

<sup>11</sup>Nii temule ucuhe riaara que aitocooaunne jaan erenaa *parabolate*, Cana Coaunera beratenojoi rijijieein ne.

<sup>12</sup>Jana nii bero cuhane nalunaa nucuhe que caitoonjoante, Cana Coaunera beratenojoi aonaain inae esenetaain neeuruhane jana, nabana nichoteeuruhane coataa acaauru coritaa uha moconajaerane jaun suujua elonaain nenacaauru cachaauru rijijie.

<sup>13</sup>Jana nii ajeri choae nalunaa nucuhe que caitoonjoante, Cana Coaunera beratenojoin aonaain, coroajeein esenetaain neeuruhane nihanatiin, carajaelanaala basiinjiincha esenetaoriin, inae necairichanaa coaracuruhane que nererojoeaain jianeraauru rijijie.

<sup>14</sup>Jana nii ajaena jana nalunaa nucuhe que caitoonjoante, tonoraain aonacuruhane nihanatiin, jeraen jianejeein cuaajeein, jataain niicha lateicha que coacuhin, coriquiquiin raotojoein neeururichaainne coacuhin, itolere bana niicha jereeicha ichajeein, jeriha Cana Coaunerane rijijieein cha chana jerelanaala nitajerai nenacaauru rijijie.

<sup>15</sup>Jana nii atane caohacha choae nalunacaauru nucuhe que caitoon-

joante, nii jataain jereein aonaain, nii beratiha Cana Coaunerane rijijieein naitoonjoan ichajejin, itolere bana tonoraain laraajiin jianelanaala nenacaauru cachaauru rijijie,”

**Cono que cacha relaa Jesosone**  
(*Mr 4.21-25*)

<sup>16</sup>“Nihei chuni cono mocohin bujuaihu tera. Niheichu arana asae tenaa nainihei, nabana nocohenaanau turuuruha loreri asaae turunacaaurune coataa. Nitohaneein bujuaihu telanaa-late ecuun te, conohanau loreri asaae enooruha turunacaaurune caina. <sup>17</sup>Nii rijijieeintechu, ena caa inara relaanune jaan coitucuelanaala nenacaauru, rijieeori bana coitucuurueein.

<sup>18</sup>Aihane jaun, caohachaain aonacuche. Nii rijijieeintechu ena canuhacha tei raera jelai amuritoheriin rareein inae ecu tihane bana. Jana nii canuhacha tei latelanaala nenaate cha colane nedaareein inae ecu tihane bana,” naain acaauru rai be Jesoso.

**Rai neba aina Jesoso nejeraauru**  
(*Mt 12.46-50; Mr 3.31-35*)

<sup>19</sup>Niritiin cachaauru rai ereerejiha Jesosone jana jetaote, rene turuha uure neba aina rai nejeraauru. Ne jetaote, rohan turunaa nainecurene, jataain arajiin ecu turuuruha cachaaurune jaun. <sup>20</sup>Nii jana ecu nenacaauru tabaauru jetaote,

“Taute aerene neeure ii nejeraauru, ii neba aina. Jataainte ii coana jerecure,” naain Jesoso rai beeuruhane jana jetaote,

<sup>21</sup>“Aiha niqui. Nete Cana Coaunera beratenojoi esenetaain, rijijieein ichaohin, naintonjoa rijijieein ichara cachate, canu fojiara aina canu nejeraaurunera,” naain jetao tonorana-jaen Jesoso.

**Fichafichanaa aina cujuana suruaa Jesosone**  
(*Mt 8.23-27; Mr 4.35-41*)

<sup>22</sup>Nii baiha jetaote: “Amauchete caa nemuri jerau cunichaachera,” naain jetao, aina nerelanacaauru aina leinjiin bote cuhane fauhin cuhin jetao, <sup>23</sup>nemuri jera jaohajeeuruhane jana jetao, uhe cujuana tabai aina fichafichanaa. Nii jana, sinitoha Jesosone jana jetao, inae nemoha acaune jaun, caaun nalunaa jere nii cuurunaja bote. <sup>24</sup>Nii jaun jetaote nesoone caun

“Cacha relaera, cacha relaera, inae nalurichaacheje,” naain Jesoso nocoauruhane jaun jetao, nimichuin cujuana aina fichafichanaa suruha Jesosone jaun jetao, tonajelanaala cuujeeure.

<sup>25</sup>Nitohaneein cujuana aina fichafichanaa suruaain jetaote, nii aina nerelanacaauru rai jetao,

“Chanuna cha esenetaeneeiche,” naa acaauru rai Jesosone jana jetao, nesoonetiin cojoelatiin jetao, “Chaneeina ne caa cacha, nere tonoraain nesuruha cujuana aina fichafichanaane caina,” naain jetao nejesinajejin ita caje bajaature.

**Jerasa batane que nena coitucuchuhi siricha**  
(*Mt 8.28-34; Mr 5.1-20*)

<sup>26</sup>Nirijieein cuujeein jetaote, tabiicha nemuri jera jaohin, najauriaa cuure Calillea jeraniha nena Jerasau batane que.

<sup>27</sup>Inaen ecu turuhin najauriaain, atane choae iniha cuha Jesosone jana jetaote, nii nese caje cuhin que taca cue suujue cuhane coitucuchuhi siricha cacha. Nii cacha jetaote, nii chaabana cajione jiaain, niheichu loreri asae nihanatiin ichoaelanaala atane bana ichoaecha ichoae.

<sup>28</sup>Aca jetaote, Jesoso coariin nacatiha auhaquiin semojoaain tacaain jetao;

“Coa caniha nenoaain carerojoeacaara, acaihaniji nena Cana Coaunera Calaohi Jesoso,” nae jetao Jesoso rai, <sup>29</sup>caje mituha, nii suujua cuhane neein aasaera coitucuchuhi coina aitoha Jesosone jaun.

Nitohanihane jaun jetaote, arai saain *cadena* que caohatiin biji aina tija ichohacuruhane nihanatiin, rai molohin cacha nenajanihu amaauruha nii coitucuhuhicurune, ecu nii cacha arerero ne. <sup>30</sup>Nitohaneein rai irihane jana jetaote:

“Tonaa ichurujuata,” naain caje curuaa bajaa Jesosone jana jetao,

“Lejioon niha canu curuaara,” nae jetao nii cacha, jataain arajiin suujua cuhane neeuruha coitucuhuhicurune jaun. <sup>31</sup>Nii arajiin suujua cuhane nenacaauru jetaote, usi jana acaauru letoaa Jesosone coataa jetao, <sup>32-33</sup>ichatane ucuunno que arajiin lenoniha neeuruha coosichurune jaun jetao, nii coosichuru suujueniha enooruhane coina Jesoso caje bajaare. Nii jaun jetaote, nii jereein caje bajaauruhane rijijieein jeriha Jesosone jaun jetao, nii cacha caje mituhacoaain nii coosichuru suujueniha enooruhane jaun jetao, nemuri cuhane nichorohin acauhanau naluhin ohacoaare nii coosichuru.

<sup>34</sup>Nii coaraain jetaote, satiin jelai caje sorohin, nenaanajaaunru, neseuru, naaonjoaihunri naineein biha cuure nii coosi beraihurera cachaauru. <sup>35</sup>Nitohaneein beeuruhane jaun, cuhin coaraa cuuruha cachaaurune jana jetaote, Jesoso tija asae lauhaca coujurihu cacha neein necoreeteen nii suujua caje coitucuhuhichuru mitunaja cachane jaun jetao, coaraain coasichure nii cachaauru.

<sup>36</sup>Nii jana, nii cacha caje mituuruha coitucuhuhichurune jana coaraauru jetaote, esinae rauhijiriin nii nerautaane rijijieein beure leeochoauru cachaauru rai.

<sup>37</sup>Nitohaneein coaraain jetaote, satiin nii Jerasa batane que nenacaauru cachaauru jetao, jelai caje amuha Jesosone jerecure, jataain coasichuruhane jaun.

Nii jaun jetaote, bote cuhane fauhin, jelai caje amuha Jesosone jana jetao, <sup>38</sup>aina cunaa jere nii coitucuhuhichuru mitunaja cacha. Ne jetaote, aina cuhane jerelanaala:

<sup>39</sup>“Jiaohine. Chajaaincha jelaiha chenenajaun cauhin, ii rautaain niha Cana Coaunerane beebjenihun,” nae jetao rai Jesoso.

Nii jaun jetaote, ecu nedaaain, satiin nenaanajaaunru naineein cuhecujueein jetao, rautaain niha Jesosone beebjeein amuhemujuen nii cacha.

**Jairo cacunu. Chaen leinjiin ene Jesoso cajone dadaera**

(Mt 9.18-26; Mr 5.21-43)

<sup>40</sup>Nitohanihane baiha, jelaiha nemuri jerau cauha cuuruhane jana jetaote, jataain corojeein Jesoso raaure, turuhane cohajeeruhane jaun, satiin cachaauru. <sup>41</sup>Nii jana jetaote, turuha uhe leinjiin cacha- sinacoca curuaanaa neein nena Jaironeein niicha curuaateeri. Nii cacha jetaote, Jesoso tija asae neseeriaain jetao conujueein cotijiae, rai loreri asae turuha cuhane coina, <sup>42</sup>jataain ohane rai niha leinjiin rai cacunu- lechoonca coroata jaanacajine jaun.

Nii jaun cuha Jesosone jana jetaote, jataain arajiin sacuuruha cachaaurune jaun, sururucure cachaauru.

<sup>43</sup>Nii arajiin cunacaauru jana jetaote cue leinjiin ene- lechoonca coroata

jaanacaain nirijieein ichana jaohajeein cunaiteein nenea. Nii jetaote, jitariin niicha sirii coriqui jaohin nocoicharate niqui. Nejetaote, rautasihurene nii chuni coichaeraauru.

<sup>44</sup>Nii ene jetaote, Jesoso caajie cuhin, rohan nichuuntaain rai cajione auha dadae. Nii Jesoso cajione auha dadaane rijieoritiin jetaote, inae nesurue rai ichana.

<sup>45</sup>Nitohaneein dadaane jana jetaote:

“Chatoon canu dadae,” naain bajaa Jesosone jana, satiin dadaauruhane suujueeuruhane jaun jetaote,

“Cacha relaera jataain araacha cachane jaunte, ii sururucure jerane,” naa rai Fedorone jana jetaote:

<sup>46</sup>“Aihei bajiaa. Chunucohate jerihane canu dadae. Cacaje mituha cacha rautacaaunne jaan cajene coitucunra,” naain jetao bajae Jesoso.

<sup>47</sup>Niritoha Jesosone jaun, nesuujuenaa nainenihane jaun jetaote, rijijijianein Jesoso acatiha neseorihain: “Naaon-joaain cunaitichaaunne jaunne, nii caje nerautasinihanune jaun, ii dadaaunra. Nii ii dadaanune rijieoritiine inae nerautaaun canu cunai cajera,” naain satiin aonajera urichoo jitariin biha nii enene jana jetaote;

<sup>48</sup>“Aihachuhisi. Jataain ii rautaanune esenetaaine jaunte, ii cunai caje nerautaaicha ene. Chajaain chaque tonajelanaala chenenajaun caunihunra,” nae jetao rai Jesoso.

<sup>49</sup>Nitohaneein jaiti ereerejiha

Jesosone jana jetaote, turuhin jetao:

“Coo nenacaanein nii cacha relaera roeroecaa. Inae oha ii cacunura,” naain jetao biha uhe letoauruhane jaun leinjiin cacha, nii sinacoca curuaanaa Jairo rai.

<sup>50</sup>Niritoha nii cachane aonajeein jetaote,

“Coo tonajian. Raujiaaincha quesentaute nacoaanein ichanamiin oo caje ii cacunura,” nae jetao Jairo rai Jesoso.

<sup>51</sup>Niritiin cuhin jetaote, nii Jairo loreri asaa turuhin, Fedoro, Saantiaao, Joaan, chaen, nii ene fojiaraauru, naaonjoaihunriicha enoae jiniichain nii loreri asae. <sup>52</sup>Nitohanein inae loreri asae enooruhane jana jetaote, jataain satiin coinaderaain nii ene coisichuruha nii loreri asaa nenacaaurune jaun:

“Coo chanaache. Coatiha ohane jaun aihei caa ranuna. Sinihane jaunte aicha,” naa acaauru rai Jesosone jana jetaote, <sup>53</sup>satiin esenetaelanaala coenacure- nii ecu neein coarajeeurera cachaauru, esinaen rauhijiriin oha nii ranunane coaracuruhane jaun.

<sup>54</sup>Nii jana jetaote, biji que nii ranuna onaa mucuhin tonijiaain jetao: “Ranuna, chajaain nimichuura,” naa Jesosone rijieoritiin nimichuhin jetao, <sup>55</sup>nacoaanein raurononein oo caje ichanae nii ranuna. Nitohanein ichatein jetaote, corohateeuruhane coina aite Jesoso. <sup>56</sup>Nii jaun jetaote, jataain chojelatoorua rai fojiaraauru jana jetao: “Jiaonriha caa catoanein ichatein nihanune beeiche chuni rainera,” naain jetao suujuatenajaen Jesoso.

**Cana Coaunera Cojoanonaa biha cuuruhane coina aina nerelanacauru letoaa Jesosone**  
(Mt 10.5-15; Mr 6.7-13)

**9**<sup>1</sup>Jelai lechoonca coroatajai aina nerelanacauru taojiaain, acaauru aina neein cocoinanajaain jetaote, letoanajae Jesoso, cacha suujua kuhane nenacaauru itolere coitucuhichuru sitaain, cunaitenacaaurune maajeein rautauruhane coina. <sup>2</sup>Nitohanein jetaote, Cana Coaunera Cojoanonaa beein, cunaitenacaaurune maajeein rautauruhane coina acaauru letoae.

<sup>3</sup>Nitohanein letohanajaain jetaote:

“Coo inara biji achune, inara atora, inara achano, inara coriqui, necoreetei-

chene jaanu que inara cajione, naonjoainuri amaain cuhache. <sup>4</sup>Chunijihun loreri asae turuhichene ecu neeuche jelai caje amuhichene reentiaain. <sup>5</sup>Jana chunijihun nese que turuhichene jana, inara ranaa jerelaanaala inara aohana jerecure-nihane, jelai caje amuuche. Inara tijia batane faofaohin riariaain ratiriinte, ‘Coaraain cau neein nainacuche,’ naain ichaquichene coitucuumiin caje,” naain jetao letoanajae Jesoso.

<sup>6</sup>Nii jaun jetaote, nii letoanajaane rijijieein cuhin, neseeuu nainein cuhecujeein jetao, ichoteratenajaane jaa erenaa rauhi raotono beebejeein jetao, cunaitenacaaurune maajeein rautacoaare.

**Suujua auhacaa Erodesei**

(Mt 14.1-12; Mr 6.14-29)

<sup>7</sup>Nitohanein itolere ichaechajeein niha Jesusone coitucuhin jetaote, que suujua auhacaain nererojoecae Jorioocuru curuaanaa Erodesei. Tabaauru, “Joan jete oo caje ichanaain ai,” naauruhane jana, <sup>8</sup>leechoaauru, “Profeta Irihasi jiete, oo caje ichanae,” naaure. Jana tabaauru jetaote, “Cana Coaunera Ere bera inoansi tabaauru jete, oo caje ichanaain ai,” naaure.

<sup>9</sup>Ne jetaote, niritocurhane coitucuhin jetao: “Caraajenihanena nii Joaan uluno moloheratihanune jana moloorelura. Chaaquena jana, nii itolere ichaa been ereeure,” nae jetao Erodesei.

Nii jaun jetaote, jataain Jesoso coana jere Erodesei.

**Saoqui oharaancai cacha rai lenone tiha Jesusone**

(Mt 14.13-21; Mr 6.30-44; Jn 6.1-14)

<sup>10</sup>Inae nii letoanajaa Jesusone caje turuhin, jitariin acaauruhacha ichai beeuruha nii cocoainain niicha

letoaauri afosotoorune jana jetaote, jelai cachaauru caje acaauru amaain, leinjiin nese Betesaaidau amanajae niqui Jesoso. <sup>11</sup>Nejetaote, inae cuhane coitucuriin, sacuhin, rene turuha cuuruha cachaaurune jana jetao, raotojoeein acaauru raain, Cana Coaunera Cojoanona que acaauru rai ereerejeein, cunaitenacaaurune maajeein rautae.

<sup>12</sup>Nii jana inae sohane jaun jetaote, Jesoso rohan nichuuntaain:

“Chajaain caa cachaauru rai aitoote, taa ichuunucohacuru nenacaauru neseeuu cuhin, nesurunajaanu aina lenone ariha cuurumiincha. Coatiha nihei cau cacha caje lenone coreteein acaauru coroaatenaa jaanuta,” naauruha nii lechoonca coroatajai aina nerelanacaaurune jana jetaote:

<sup>13</sup>“Niriimiin. Atiin inara, acaauru coroaateeuuche,” naa acaauru rai Jesusone jana jetaote:

“Saoquijieeinchate neeje faan, chaen coroatajaain ate naajeeinchara. Coretiha cuhacaanune banaachate nena nainere lenone, satiin caa cachaauru raicha,” naaure jetao Jesoso rai, <sup>14</sup>itolereenein saoqui oharaancaain acaauru aina neeuruha cachaaurune jaun.

Ne jetaote aina nerelanacaauru rai jetao:

“Saoquichoona nanaain ita rohan teein acaauru lauriaauchera,” naa acaauru rai Jesusone jaun jetao, <sup>15</sup>nii aitohane rijijieein, ita rohan teein acaauru lauriaacoaare nii aina nerelanacaauru.

<sup>16</sup>Inae satiin nelauriaacoaauruhane jana jetaote, nii saoquii faan aina coroatajai ate mucuhin, coreniha dede coarajeein Cana Coaunera coroaecane baiha jetao, nii faan aina ate beeunebeeunein aina nerelanacaauru rai jetao te Jesoso, jitariin cachaauru rai chaluuruhane coina.

<sup>17</sup>Nitohaneein jetaote, inaeneeu-  
ruhane jaaun tiaaajoaain lenonecuruha  
satiin cachaaurune natiin jetao,  
lechoonca coroata omariin, omari  
nemoaure caute que.

**Esinae rauhijiriin Mesihasi  
niha Jesosone biha Fedorone**  
(Mt 16.13-19; Mr 8.27-29)

<sup>18</sup>Nii baiha jetaote, jelai aina  
nerelanacaauru aina cuhin Cana  
Coaunera bajaane jaun jetao:

“Tonacuruha canu que cachaauru.  
Chanichaaunchata,” naain acaauru caje  
bajaa Jesosone jana jetaote:

<sup>19</sup>“Tabaaurute, ‘Joaan Baotisita jete,  
oo caje ichanaain ai,’ naaurera. Jana  
tabaaurute, ‘Cana Coaunera Ere bera  
inoaensi Irihasite ai,’ naaure. Jana  
tabaaurute, ‘Cana Coaunera Ere bera  
inoaensi caje leinjiin jete, oo caje  
ichanaain ai,’ naaure,” naain  
beuruhane jaun jetaote:

<sup>20</sup>“Tonaquiche jana inara canu que.  
Cha nichaaun,” naain acaauru caje  
bajaane jana jetaote:

“Iite, Cana Coauneraacha letoai  
Mesihaseeicha,” naain jetao tonorae  
Fedoro.

**Orichaaaine biha Jesosone**  
(Mt 16.20-28; Mr 8.30-9.1)

<sup>21</sup>Ne jetaote, niritocuruha raine jana,  
nii acaneein nihane beeuruha chuni  
raine coataa, caohate Jesoso.

<sup>22</sup>Niritiin jetaote: “Nii inaraacha cohajei  
Cachaneein nejanohanune cairichaeriinte,  
caque jaolecoha cuurureein Jorioocuru  
bichauhenaauru aina saseredotecuru  
curuaanaacuru, chaen Cana Coaunera  
naitoonjoan que cacha relaaureraauru,  
naaonjoainuri. Acaaurute catinaa  
cuurureein niqui, nena nichata janohane  
cuhane ichanaa cureeunnicha,” nae jetao  
acaauru rai Jesoso.

<sup>23</sup>Nii baiha jetaote, nii satiin ecu aina  
nenacaauru rai jetao:

“Chunucoha canuhacha relainein  
canu ere tonoraeranein nenea jerihane,  
itolere suujua letono ichana jerihane  
jianeein, coroso que canu teein canu  
cairichaaaururichaaaine rijijieein necairi-  
chanaa abaataain caitoonjoan  
tonoraain, jerichaaunne rijijieein  
neeine. <sup>24</sup>Nitohanihane jaunte,

caoreniha nichao itajera, nichotiha  
cureein. Jana suujua letonohacha  
ichajeein, itolere bana rai caohacha-  
nuhacha coacuhin neite nitajereein.  
<sup>25</sup>Chaaquena nelatere caa chauratane  
que neein, itolere rai nelateeicha que  
coacuhin rai nichao itajihane cachane.

<sup>26</sup>Chunucoha, canu que coejeein  
caitoonjoa quene maajeein coejera  
quene necoejereeeunni canuhetonai,  
canu- inaraacha cohajei Cachanein  
nejanohanune, itolere ichana  
nainichaaunne coarateein, Canu Inaca  
necaohacha que necaohachaain rai  
letonocuru anjeraauru aina turuha  
uhanune bana. <sup>27</sup>Esinae rauhijiriin  
satiin cau nenacaauru tabaauru  
cachaauru oorurinaain, Cana Coaunera  
Cojoanonaa coaracuruhane reeintiaain,”  
nae jetao acaauru rai Jesoso.

**Nejelauneein nerotoha Jesosone**  
(Mt 17.1-8; Mr 9.2-8)

<sup>28</sup>Nii cachaauru rai irihane baiha, fosa  
janoneein catiaain, ichtatane ucuuno  
que cuhin Cana Coaunera bajaa cuha  
Jesosone jana jetaote, corihaniha cuure  
Fedoro, Saantiaao, Joaan,  
naaonjoaihuri. <sup>29</sup>Inae ecu turuhin Cana  
Coaunera bajaane jana, ecu neein  
coarajeuuruhane jana jetaote,  
itolereenein nejelauneein nerotoha  
nomerine jana jetao, rai cajione netonai  
jataain somajaain jiquihaquuin  
nerotohane jana, <sup>30</sup>ecu aina ococohin

aina ereure coroatajai cachaauru Moisesa, Irihasi, naonjoainuri.

<sup>31</sup>Nitohaneein jetaote, jataain cono caohacha que conaeraain neein jetao, Jerosaleun cairichanojoneein oha curichaaain Jesosone que jetao ereure.

<sup>32</sup>Nii jana jataain siniitooruhane sainejeein jetaote, nirijeein ichaojoein jetao, cono caohacha cataaun neein coroatajai cacha aina iriha Jesosone jana, coaraje rai corihacuru aina Fedoro.

<sup>33</sup>Inae Jesoso rohan neuru caje amuuruha nii coroatajai cachaaurune jana jetaote:

“Cacha relaera, jataainte caohate cau nihacachene. Coanete nichatajaain lohanari jaacache, leinjiin ii rai, leinjiin Moisesa rai, leinjiin Irihasi rai, naonjoaain,” nae jetao Fedoro. “Naonjoaane coinata catohanein coarate Cana Coaunera,” naain coitucuenihane jaun nirate Fedoro.

<sup>34</sup>Niritiin ereerejihane jana, acaauru conaacotaa dede sacarine jana jetaote, jataain nesooneooruhane jana jetao, <sup>35</sup>nii dede sacari jana toniin jetao: “Caate jataain jereein canuhacha cocoinaain quiicha letoai Canu Calaohinera. Nere tonoraain neeuchera,” naain jetao toni erena.

<sup>36</sup>Niritiin toniha erenaane aonajeeuruhane baiha, Jesoso coaracuruhane jana jetaote, inae jelai ecu ne. Ne jetaote, nii bana nii chuni rai nitohaniha Jesosone belanaala inauhe-neeche suujua cuhane coarajein nii chuni rai beeurene.

**Coitucuhuhi siricha leinjiin  
canaanai rautaa Jesosone  
(Mt 17.14-21; Mr 9.14-29)**

<sup>37</sup>Nii cojoanoo nii ichtatane ucuuno neuru caje jelaiha fauha cuuruhane jana jetaote, Jesoso que taca cuure

arajiin cachaauru. <sup>38</sup>Nii arajiin que taca cunacaauru cachaauru jana toniin jetaote:

“Cacha relaera, atiin nohane caa acaihanijin quiicha sirii canu calaohi coaraau. <sup>39</sup>Suujua cuhane coitucuhuhi sirihane jaunte, baasoneein tihane, auhaquiin tocojoaain tacaane, nujuuae caje lajane mitae. Jataainte, baasoneein jaberoco tein jianena jerene. <sup>40</sup>Nii jaauune niqui ii aina nerelanacaauru rai aitoon, caje nii coitucuhuhi sitaauruhane coina. Nete ichana nainesihurene,” naa tonijiaain ehequini, nii leinjiin cachane jaun jetaote:

<sup>41</sup>“Jataainachura cha esenetaenei-chete nitaje rai nenacaauru cachaauru. Inaonjoan saneina inara aina neein inara abaantareeun. Chajaain cajiha nii ii calaohi uhaaura,” naa Jesosone jaun, <sup>42</sup>rohan nichuuntaa nii cunaitenaa canaanaine jana jetaote, atane ichoae tacaain siheite nii suujua cuhane nena coitucuhuhi.

Nii jaun jetaote, nii suujua cuhane nena coitucuhuhi suruaain jetao, nii canaanai rautaa, rai inaca rai te Jesoso. <sup>43</sup>Satiin nii coaraain jetaote, itolere que nelateein, itolere ichana nainiha Cana Coaunerane coaraain cojoelatoore.

**Orichaainne biha coroata saain Jesosone  
(Mt 17.22-23; Mr 9.30-32)**

Nitohanein cojoaelanaacojoai ichaain, acaauru notaaca Jesosone cojoelatooruha satiin cachaaurune tonohanau jetaote:

<sup>44</sup>“Caohachaaain caa inara rai aitocooaunne aonacuche. Coa baitichache. Canu acaihaniji inaraacha cohajei Cachanein nejanohanaa nichaaunne, cocoinanacaihuru bijihu tenojoiniha cureunicha,” nae jetao aina nerelanacaauru rai Jesoso.

<sup>45</sup>Ne jetaote, acaauru que coitucuera-teniha Cana Coaunerane jaun, nii acaauru rai aithane coitucuurenihane sainejeein, acaauru rai biha Jesusone caina caje bajanaa nainecurene, bajaauruhane que nocoatocuruhane jaun.

**Chariji jataain nelateineein ne**

*(Mt 18.1-5; Mr 9.33-37)*

<sup>46</sup>Nii jana jetaote: “Charijina, caa cana jana, jataain leeochoauru amurijiriin nelatineein nere,” naauruha nejesinajeein ita rai aina nerelanacaaurune <sup>47</sup>aonajeein jetao, leinjiin canaanai mucuhin rohan tein jetao:

<sup>48</sup>“Canu coreniha, caa canaanai raerate, canu raane rijijieein aicheein. Jerichanejeein canu raain neitechu, caletoaera Ofa raa aicheein. Nitohanihane jaun, cau inara jana nelatihei rijijieein inaraacha coaraite, jataain nelatineein ne,” nae jetao acaauru rai Jesoso.

**Canaacha ichai icharate,  
cana lauri rijijieein nenacaauru ne.**

*(Mt 9.38-40)*

<sup>49</sup>Nii jana jetaote: “Cacha relaera, ii letononeein nena rijijieein coitucuchuhi que sujuqueuin nenacaauru rautaaan niha leinjiinne janane eruhin nii caohatihacaanu, cana aina nenaaneein ainihane jaun,” naa Joanne jaun jetaote:

<sup>50</sup>“Jiaonriha nitohanai ichara caohateein neeichene. Canaacha ichai ichaain nenaate cana lauri rijijieein nenacaauru ne,” nae jetao rai Jesoso.

**Joan aina Saantiaaocha ichana  
jerei caohatiha Jesusone**

<sup>51</sup>Inae jelaiha dedeu cuhane catainajeein jetaote, Jerosaleeun necairichanaa coaraane rai nihane saijieein, atiin nelararajaain, nii Jerosaleeun turuhane

caina ucuae cue Jesoso. <sup>52</sup>Nitohaneein cuhin jetaote, najiniha nere beraanuuru letoaelu, turuhane jaanu ariha cuuruha leinjiin nese Samariaune caina. <sup>53</sup>Ne jetaote, ecu ranaa jerecurenelu Samaria cocoaichacuru, rauhijiriin Jerosaleeun cuhane coitucuuruha raotojeeinne jaun.

<sup>54</sup>Nitohaneein, acaauru ranaa jerecurenihane jaun jetaote:

“Curuaanaa, jereune acaauru ichoae usi letoacaanute, satiin mocohin nitajeeuruhine,” naaure jetao Joaan aina Saantiaao. <sup>55</sup>Ne jetaote, acaauru rene nauriteriin jetao:

“Caohachaai nitohanai ichaain nihacachene,” naain jetao, acaauru cotaicha rijitiin caohate Jesoso.

<sup>56</sup>Niritohane baiha jetaote, leeochoa neseu jetao cuure.

**Jesoso aina cunaa  
jerecuruha cachaaurune**

*(Mt 8.19-22)*

<sup>57</sup>Inae bero cuhane cuujeeuruhane jana jetaote:

“Curuaanaa, cuhine jaaun niha natiine, itolere bana ii aina nena jereeeunra,” naa Jesoso rai leinjiin cachane jana jetaote:

<sup>58</sup>“Aonaun, arolarihuru niha natiinte, sininajaanu siriin naaonjoaarera. Jerichanejeeintechu, sininajaanu siriin ne tajaacurura. Nii jana canu inaraacha cohajei- Cachaneein nejanohanune, coatiha nihei chunijihun neloraain nesurucuaaunne jaanuta,” nae jetao rai Jesoso.

<sup>59</sup>Niritiin jetaote, leeochoa rai:

“Chajaau canihara,” naa Jesusone jana jetao:

“Curuaanaa, jauriaanejeein canu cohacune, oha canu inacane reentihain aina nenicha,” naane jana jetaote:

<sup>60</sup>“Niriimiin, caa chabana nitajenaachara quicha tei ichaonaa ranaa



jeriheichuru, ecu nejesinajeein ita coaracurumiincha. Ii caniha uute, Cana Coaunera Cojoanonaa beebjeeicha,” naa Jesusone jana jetaote, <sup>61</sup>leeocha netonai:

“Curuaanaa, ii ainane unaa jereun canuhetonai. Jauriaanejeein canu cohacune, canu nenajaun nenacaauru rai necoenicha,” naane jana jetao:

<sup>62</sup>“Nete, Cana Coaunera Cojoanonaa que nenea jeriha cachane, itolere bana niicha ichana jerei jianihane caohachae,” nae jetao Jesuso.

### Caainsi choonca coroatajai Jesoso letonocuru

**10** <sup>1</sup>Nitohanihane baiha jetaote, caaunsi choonca coroatajaain jetao aina nerelacaauru janijiin jetao, coroatajaanana coroatajaananaain najiniha letoanajae Cana Curuaanaa Jesocurisito, nii turuha curichaaanne jaau neseuru naineein cuuruhane caina.

<sup>2</sup>Nitohanein letoanajaain jetaote: “Esinae rauhijiriin arajiinte neeure Cana Coaunera coitucunaa jereraauru cachaaauru. Nete jataain coroatajaae-cure acaauru relaeranuurura. Aihane jaun Cana Coaunera bajaachete neeine acaauru relaeranuurura. <sup>3</sup>Nii nitohanihane jaunne ena inara letoaauru. Nete jataain alalacaraain nii curiquicheein, taebiaen mululune jana situha cuha irine rijijieein curiquicheeinne jaunra. <sup>4</sup>Jiaonriha inara coriqui, inara atora, inara safato, naonjoaihunri amaaïn cuhichenera. Coa chunijiun inacuhin, chuni rai caeneenejeein ereein cuhache. <sup>5</sup>Chaen chunijiun loreri asae turuhichene, ‘Raotojoein neeuche saain caa loreri asae neinequichenera,’ naauche inara turuneeicha. <sup>6</sup>Nii jana nii loreri asae niha caohachaain nenea jereraaurunete

nerausiajeein neeureeincha. Jana caohachaain raotojoein nenea jerecurenihane, coatiha nerausiaecururiaainta.

<sup>7</sup>Chaen chunijiun nese que turuhichene, leinjiin loreri asaecha neein, lenonecuruhane jaan que lenoneein, acau cohin, naonjoaanchera. Niha rauhi, coreteraauruha amihanenacaaurune jaanura. Jiaonriha lorerichuru naineein cajihanein amuhemuhequichenera.

<sup>8</sup>Chaen chunijiun nese que turuhichene jaau, caohachaain inara raain inara coroteeuruhane jaan que lenonecuchera. <sup>9</sup>Chaen ecu neeuruha cunaitenacaaurune, acaauru rautaaïn, ‘Inaen ichuunnijiha, inara caje Cana Coaunera Cojoanonaara,’ naain acaauru rai beechera. <sup>10</sup>Leinjiin neseu turuhichene jana, ecu inara coana jerecurenihane: <sup>11</sup>‘Cau inara neseu turuhacaanune jana canacaanu tijia que nitiririchana utoonena riariaain ratirihacaanu, “Coaraain cau neein nainaacuche,” naain ichacaanne que nainaquichene caina. Nete laen, inae ichuunnejeeorih inara caje Cana Coaunera Cojoanonaane saijjeein que jaolecohichene coitucuhichene caohachaera,’ naain acaauru rai beein, jelai caje amuuchera. <sup>12</sup>Nii inara coiinteraauru cachaaaurute, neecha aansaineein ichaonacaauru Sodoma cocoaichacuru amurijiriin jataain caseteco tabai coaraa cuurureeincha,” naain nii rai niicha letoanojoinunri rai be Jesuso.

### Erenaa tonoraaichuru cachaauru (Mt 11.20-24)

<sup>13</sup>Niritiin jetaote: “Cairichaaoojaaiche, Corasiin, Betesaaida, naonjoaain nese cocoaichacuru, jataain necairichanaa coariquicheeinne jaun. Bana inara rai cojoelanaacojoai ichacaanne rijijieein, Tiro, Sidoon, naonjoaihun cana lauri Israelitanelanaala ichaonacaauru rai

cojoelanaacojoai ichacaunne jana niha nete, acaauru ichoachaniha inae Cana Coaunera que suujua acatecuruhane coarateein, baaso ichajeein ichaoruhane jianein neuruhane coujunacane que inaderaain costaro siri caje nenea cajione jiaain, ajane que nerujuaain neeurure.

<sup>14</sup>Nitohaneechene jaunte, inae nii cojoanonaa que turuhane bana, Tiro, Sidoon, naonjoaihun cana lauri Isaraelitanelanaala ichaonacaauru amurijiriin, caseteco tabai coaraa curiquicheein. <sup>15</sup>Jana inara Caferenaaoon cocoaichaneinchene, inacojoein dedeeu cuha nocoetona jereein coaauquiche. Inarate, usi tabai cataaun jaonjoineein nitajija curiquicheein,” naain bihane baiha jetaote:

<sup>16</sup>“Nitohanihane jaun, caohachaain inara raerate, jerichanejeein caohachaain canu netonoai raa aicheein. Jana, inara que jaolequiin, inara ranaa jeriheichurute, jerichanejeein canu que jaolequiin canu ranaa jerenihane jaun aihurureein. Nii rijijieein techu, canu que jaolequiin, canu ranaa jeriheichuru, jerichanejeein caletoaera Cana Coaunera que jaolecoha aihurureein,” nae rai nii letonocuru rai Jesoso.

**Jelaiha cauha cuuruha caaunsi choonca coroatajai nii niicha letoanojoinurine**

<sup>17</sup>Nitohaneein letoanajaane jaaun cuhin jetaote, caje jelaiha rachoojoein turuhin jetao:

“Curuaanaa, ii letononeein nihacaunne jaunte irihacaunne, coitucuchuhichuru nihanatiin canacaanu ere tonoraain neeure,” naauruha nii caaunsi choonca coroatajai letonocurune jana jetaote:

<sup>18</sup>“Aihachuhisi. Jiaccane amuneein dede caje naluha uha Moconajaerane

janane coarajeeun. <sup>19</sup>Canune, nitohanein itolere que nelateein laraajiin cuhin, acanocuru, canaauru, naonjoaihunri ichoae situhin, itolere coitucuchuhicuru amuritohiche, nii necairichanaa coaraelaanaalane coina inara letoaaun. <sup>20</sup>Nete, nii nitohanein inara ere tonoraain neuruha coitucuchuhichurune nihanatiin que rachoojoein nenea naineneiche. Inae laenanohineein niha Cana Coaunera Quiricha cuhane dedeeu inara curuaa-curuneecha quete laen nainequiche rachoojoeichenera,” nae jetao acaauru rai Jesoso.

#### **Rachoojiha Jesosone**

*(Mt 11.25-27; 13.16-17)*

<sup>21</sup>Nitohanein turuhin itolere ichacuruhane beeuruha nii rai letonocurune jaun jetaote, rachoojoein Cana Coaunera Suujue que suujuequiin jetao:

“Ii, dede, chauratane, naonjoaain Coaunera neein, itolere Curuaanaa neein neeine coroaecaaunra Ofa. lite, nii itolere coitucutoha nocoetonacaauru que coitucueratelanaala, nii cha que nelatihei rijijieein nenacaauru que nii coitucueraelanaala nenea coitucuerateeicha. Aihara Ofa. Nitohanein jereine jaunte ichaacha,” naa Cana Coaunera raine baiha jetao:

<sup>22</sup>“Ofate caque itolere coitucuerateein ne, coitucuhin nihanune coina. Nihei chuni canu coitucunaa nainera, cacoitucuerateniha Ofane. Nii rijijieein chu canu, rai Calaoehinein, que coitucueratenihanune, nihei chuni Ofa coitucuera. Canu, rai Calaoehinein coitucueratenaa jerichaunne jaanruhachate Ofa coitucuurureein,” nae jetao rachoojoein Jesoso.

<sup>23</sup>Nii baiha jetaote, jelai teein aina nerelanacaauru rai jetao: “Neraasiajeeinte neeiche, caa ena inaraacha

coarai coaraain neeichene jaun. <sup>24</sup>Arajii *profetacuru*, chaen *reycuru*, naaonjoaihunru inoasihurute niqui, caa ena inaraacha coarai coaana jereein, caa inaraacha aonai aohana jerecurelu. Nete, nii coaraain, aonaain, naaonjaaun-renelu,” nae jetao acaauru rai Jesoso.

**Samaria cocoaicha que *parabola* que  
cuaain, leinjiin cache relaera  
relaa Jesosone**

<sup>25</sup>Niritoha Jesusone jana jetaote, rene turuhin jetao, “Tohanrihanicha,” naain nechu jataain coujuha jetao:

“Cache relaera, cha ichareeun chariji bana nitajenaachara ichaonaa que ichaonaa nainichaaunne coina,” naa rai leinjiin Moisesa naitoonjoan rauhi que cache relaerane jaun jetao:

<sup>26</sup>“Tonaainjia laenanohineein ne Moisesa aitoonjoan rauhi cuhane ereretaain coaraaine jana,” naa rai Jesosone jaun jetaote:

<sup>27</sup>“Jataain ishujua, ii suujue, ii coichana, naaonjoain aina cutaain, ii Curuaanaa ii Coaunera que ii suujua acateein, aca jerihane rijijieein coitucuhin naitoonjoan ichaain neeu. Chaen ijiabereeo belaaain coaraain neeine rijijieein, chamute cache belaaain neeu,’ naainte ne nii rauhi cuhane,” naain jetao tonorae nii Moisesa naitoonjoan rauhi que cache relaera.

<sup>28</sup>Nii jaun jetaote:

“Jataain caohatiinte aitohi. Nitohaneein neeinete, ichaonaa chariji bana nitajenaachara que niha curiquincha,” nae jetao rai Jesoso.

<sup>29</sup>Nii jaun jetaote, jaiti jitaain nii niicha coitucunaa jerei beniha raine que nainaa Jesusone coina jetao:

“Charijina camute cache neein belaaain ichaoreeun,” naa Jesoso raine jana jetao:

<sup>30</sup>“Aonaain. Coaraaunachuhinti, leinjiin cache jetao, Jerosaleen caje

Jericoo cuhane jana, bero cuhane eruhin, enuha que faofoaain sohin- rai cajione ruluhin- jitariin niicha siriine maajeein ruluhin- ateinane lalajeein ratiriin amuuruha necha aansainein ichaonacaauru cachaaurune.

<sup>31</sup>Nii jana jetao, nii jeelai bero cuhane cuujiha leinjiin Isaraelitanichaachene lauri caje nenea saseredotene jana, najiniha niha nii cachane coariin, comarohin rauhijiriicha situhin amue.

<sup>32</sup>Nii jana jetao coaiteen caaijie cuujiha, leeocho Isaraelitanichaachene lauri caje nenea Lebitane jaun, acaarentonai coariin, inauheneeicha coarajeein comarohin rauhijiriicha situhin amue.

<sup>33</sup>Nii jana jetao, acaauru caaijie cuujiha leinjiin cana lauri Isaraelitanelanaala nenea inara jaole Samaria cocoaichane jaun jetao, coariin, cairichaaajoaain coaraane jaun jetao, <sup>34</sup>rene nichuuntaain erene aina bino caje ichanohinein nenea coi que culejeein jetao, nii nocoasaja coichaain, cajione que conajaain jetao rai cabario ichoae lauriaain, coreteein turunaanaja leinjiin loreri asaae amaain ecu teein jetao berai.

<sup>35</sup>Nii cojoanoon jetaote, rai coriqui rocohin jetao nii nenaanaja erora corete jetao nii Samaria cocoaicha. Nitohaneein coreteein jetaote, ‘Atiin canu rai caa cache beraain coichaa. Caa cache coreniha ii coriqui jaohinene ii rai cainareeunni caaujiataain,’ nae jetao nii cache, nii nenaanaja erora rai.

<sup>36</sup>Nitohanihane jaun, chariji jana nii nichatajaihuri caje nii necha aansainein ichaonacaauru cachaauru sonojoi cache belaaain coarae, rai jaberoco belaihanerijijieein,” naa Jesusone jana jetaote:

<sup>37</sup>“Nii cairichaaajoaain coaraain belaaain coichaera,” naa nii Moisesa aitoonjoan que cache relaerane jaun jetaote:

“Inae laen coitucuhi. Nitohaneein iitonai ichaa,” nae jetao, rai Jesoso.

**Mariha aina Marata loreri  
asaae turuha Jesosone**

<sup>38</sup>Nii baiha jetaote, jelai caje amuhin leinjiin neseu turuhane jana jetao, rai loreri asaas rae leinjiin ene Marata.

<sup>39</sup>Nii Marata nejera Mariha jetaote, ecu turuhin ereerejiha Jesosone jaun jetao aonaane coina rai tija asaas nelauriiriin lauheque. <sup>40</sup>Nii jana jetaote jelai niicha ichanenu aina ratiriin aihane jaun jetao, Jesoso rohan nichuuntaain jetao:

“Curuaanaa, tana itolereneein camijianeon aina jelai caratiriin aihaa caa canejerane coaraanete rai aiteneei canu coroatajaniha uhane coina.” naa Maratane jaun jetaote:

<sup>41</sup>“Marata, aonaan. Jataain niha iicha ichanenune jaunna jataaain nererojoeaai. <sup>42</sup>Nete jataain leinjiincha ne cacha rai jataain nelatei. Caa Marihate nii jataain cacha rai nelateein nei janijiin rae. Nii jaun nerinaain chuni caje ruluera,” naain jetao tonorae Jesoso.

**Cana Coaunera bajanaa que aina  
nerelanacaauru relaa Jesosone**  
(Mt 6.9-15; 7.7-11)

**11** <sup>1</sup>Jelai cuhin Cana Coaunera bajaa cuha Jesosone jana jetaote, inae nainaane jana jetao:

“Curuaanaa, aina nerelanacaauru relaaloo Joanne rijijieein canacaanurelaau Cana Coaunera bajanaa quera,” naauruha aina nerelanacaaurune jana jetaote: <sup>2</sup>“Saan ai. Cana Coaunera bajaachene:

‘Cana Coaunera,  
ii acaihaniji Cana Coauneraneein  
neene coitucuhin neurumiin satiin  
cachaauru.

Nihei chuni ii baiha ii rijijieein nei. Dedeeu iicha jerei ichacuruhane rijijieein,  
cau chauratane que netonai ichacurumiin satiin chauratane que nenacaauru.

<sup>3</sup> Canacaanurelaau rai lenone teeute canacaanurelaau rai lanaeneene lenone.

<sup>4</sup> Baaso ichaachajeein nihacaanurelaau nihanatiin canacaanurelaau que ii suujua acateeu, canacaanurelaau rai baaso ichaain nenacaauru que canacaanurelaau suujua acateein nihacaanurelaau rijijieein.

Jiaonriha osa que nesaruhiin nihacaanurelaau nainatejeein neeine,’

naain Cana Coaunera bajaache bajaachenera,” naain jetao acaauru relaa Jesoso.

<sup>5</sup>Niritiin jetaote:

“Coaracuchenachuhinti inara tabaauru niha rai belaihana jana, janotiin dede cataaun rai loreri asaas turuhin: ‘Quiicha belaa, taa niha ii lenone cautene. <sup>6</sup>Ena canu loreri asaas turuha jataain quiicha belaaaine jaunne, que coroaatihanune coina aitoon, neniha rai canuhacha teeninune jaun. Ii raine jeelai que corereeeunni,’ naane janate nainere: <sup>7</sup>“Caa carerojoea. Inae canu bereecuruu aina nesurucuaaunne jaun nimichuhin tenaa nainihaaun,’ naainte nesurunajaun neein tonorana nainere nii belaiha. <sup>8</sup>Netechu nimichuhin tenaa jerenihane saijieein conujiha nii belaihana, atiin nimichuhin jitariin niicha latei tenaa nainere. <sup>9</sup>Nii rijijieein Cana Coaunera caje cha lateein bajaachene, inara rai inaraacha latei tereein. Cha lateein ariin bajaera raite, cha teein ne Cana Coaunera. <sup>10</sup>Satiin cha lateein ariin bajaerate, niicha latei eruhin ne.

Nitohaneente rohan nichuutaain cha baja cachane, rai cha tein naonjoareein Cana Coanera,” naan jetaote,

<sup>11</sup>“Coaracuchenachuhinti inara, inara caje ate bajaain niha inara calaohine jana, inara, inacaneein rai acano teriquiche. <sup>12</sup>Ainihane inara caje taje bajaane jana rai canau teriquiche.

<sup>13</sup>Coaracuchenachuhinti inara baasonein ichaohichene natiin, caohacha nejesina tein neeiche inara bereecuru raine. Nii amurijiriin techu lateein caje bajaain neeichene, rai Suujue que suujuequiin neeichene coina, nii bajaera rai Suujue tein nereein dedeeu nena Cana Inaca Cana Coanera,” nae jetao acaauru rai Jesoso.

**Moconajaera ichanohineein niicha ichai ichaa Jesoso beeuruhane**

(Mt 12.22-30; Mr 3.20-27)

<sup>14</sup>Nii baiha jetaote, suujua cuhane coitucuchuhi sirihihane jaun, caaun eresilanaala niha leinjiin cachane jana jetao, caje sitaain rautae Jesoso. Inae caje mituhin amuha nii moconajaera letono coitucuchuhine jana, inae iriha nii eresilanaala nena cachane coaraain jetaote, jataain cojoaelatoore nii ecu neein coarajeeurera cachauru. <sup>15</sup>Ne jetaote tabaauru: “Coitucuchuhichuru curuaanaa Beelseboote caa cache rai catohanai ichaane jaan tihane jaun, caa catohanai ichaera,” naaure jetao Jesoso coarajeein.

<sup>16</sup>Jana tabaauru jetaote, esinae rauhijiriin aina niha Cana Coanerane coaracuruhane coina nechu cojuha jetao, cojoelanaacojoai ichaane coina caje bajaure. <sup>17</sup>Ne jetaote, nechu cojuha aitocuruhane coitucuha raotojoeine jaun jetao:

“Inarate caa coitucuchuhi ichanohineein cunaitenaa cache

rautaanune jaun, Moconajaera letononiha canu beeiche. Nete inara coitucuhichene rijijieein, satiin caa atane que nenacaauru ita que nejeratein neein ita sooruhane, jiniiquiin ita ichao itajeeurureein. <sup>18</sup>Nii rijijieein techu, nii coauquichene rijijieein, nejesinajeein ita que nejeratein neeuruha rai letonocuru ainane, ita ichao itajeeurureein Moconajaera aina rai letonocuru. Nitohaniane jiniiquiin nii cha que nelatein neeururihei. ‘Nii coitucuhichuru curuaanaa Beelseboo caletoaane aina, coitucuchuhi ichanohineein cunaitenaa caa cache rautaa,’ canu beeichene jaunne caa inara rai aitoon.

<sup>19-20</sup>Inara tabaauru, chunocoha cache suujua caje coitucuchuhi sitanaa jerecuruhanete, ‘Cana Coaneraacha ichaneni ichaeraniha’ beriquiche. Jana laen canu, cache suujua caje coitucuchuhi rocohanune jaunte, ‘Moconajaeraacha ichai ichaeraniha’ canu beeiche. ‘Nete laen, Moconajaera letono coitucuchuhi rocohanu cajene jaun, canu, Cana Coaneraacha ichai ichaeranein, Moconajaeraacha ichai itajeranein nihanune coaraquichene saijieein aitocoiche.

<sup>21</sup>Nii rijijieein techu, jataain laraajiin nena cache, rai biji achune aina rai loreri beraihane, satiin rai loreri asaae nenacaauru rai rucuhele rulunaa nainene caje chuni. <sup>22</sup>Nete laen, jataain amurijiriin jataain laraajiin nena, turuhin caje nii rai rucuhele niicha berai ruluha uhane, enaacha caje nii biji achune ruluhin jitariin raine que nii rai rucuheleuru rulureein,’ naan jetao Moconajaera amurijiriin laraajiin itolere ichana nainihane,” be Jesoso.

<sup>23</sup>Niritiin jetaote: “Nitohaniane jaun canuhacha ichai rautaelanaala coarate, canu que nejeratenaa neein nihane jaun

ai. Jana canu aina Cana Coaunera rai cachaauru ranaa jeriheite, moconajaera aina nitajeeuruha cachaaurune jerihane jaun ai,” nae jetao Jesoso

**Jelaiha mitunaja rene cauha  
moconajaera letono coitucuhine**

*(Mt 12.43-45)*

<sup>24</sup>Niritiin jetaote: “Nitohanein leinjiin cacha caje mituhin amuha coitucuhinetete, enohane jaanu ariirijie cajianein joareein amuhemujueein. Nii jana erusinihanete, ‘Jelaiha taolu mituhanune jaa rene cauha cuhanunete caohachae,’ nae. <sup>25</sup>Niritiin nii mituhalune jaa cacha suujua cuhane turuhane, aiha leinjiin loreri coneraelanaala caohatiin lojinojoneein rucuhenojoneeine rijijieein nii cacha suujua eruhane, <sup>26</sup>nacoaanein jelaiha cauhin, caaunsinein amurijiriin jataain baasonein nenacaauru coitucuhicuru cotijiaain amaaain, nii cacha suujua cuhane enohin ichaauruha nii coitucuhichurune, jauriaanejeein aihalune amuritoheriin jataain baasonein ichoae nii cacha,” nae jetao acaauru rai Jesoso.

**Esinae rauhijiriin rausiaenojoneein  
niha cachane jaan esine**

<sup>27</sup>Niritiin jaiti acaauru rai ereerejiha Jesusone jana jetaote, nii cachaauru jana toniin jetao:

“Nerausiaaeca ene ii janoaain efojiaralura,” naa rai leinjiin ene ehequiine jaun jetaote:

<sup>28</sup>“Aiha chuhisi niqui. Nete Cana Coaunera aitoonjoan aonaain tonoraain nenacaauru nii amuritoheriin nerausiaaecure,” naain jetao tonorae Jesoso.

**Cojoelanaacojoai bajaauruha necha  
aansai cachaaurune**

*(Mt 12.38-42; Mr 8.12)*

<sup>29</sup>Nitohanein netaoijajeein, jataain arajiin turuuruha curuhacaain cachaau-

rune jaun jetaote, acaauru rai: “Caa Moconajaera cojoanonaa que nenacaauru cachaaurute, jataain necha aansainein ichaoruhane jaun, acaauru rai cojoelanaacojoai ichacaanne jerecure.

Nete Isaraelita neeurenihane saijieein, dede caje cojoelanaacojoai coaracuruhane latelanaala, acaauru rai Cana Coauneraacha beratei biha Jonasine jana esenetaaurelu Ninibe cocoaichacuru. <sup>30</sup>Nii rijijieeine canuhetonai inaraacha cohajei Cachanein nejanohanaa nichaanne, caa enene cojoanonaa que ichaonacaauru cachaauru rai Cana Coauneracha ichaneni beranein neeun.

<sup>31</sup>Nitohanihane jaunte, inae satiin cachaauru ichao coitucuhin rucuheca Cana Coaunerane Cojoanonaa que turuhane bana, nimichureein Egipto bujau nena atane curuaanaa enenein nena reina, caa enene neiniquichene coulurujiane coina. Acate coriaji atane caje uhin turuelu, niicha coitucui biha Salomoonne jana aonaane coina. Nitohanihalu natiinte, Salomoon amurijiriin neinichaaunne saijieein, canu ere aohana jereneeiche. <sup>32</sup>Nii rijijieein techu, inae enene cojoanonaa que ichaonacaauru cachaauru ichao coitucuhin rucuheca Cana Coaunerane jaan Cojoanonaa que turuhane bana, inara colurujueeuruhane coina nimichua cuurureein Ninibe cocoaichacuru. Aiha nii Ninibe cocoaichacuru, inae caseteco coaracuruhane rai neeuru jana acaauru rai Jonasi que beratihana Cana Coaunerane jana, cojoelanaacojoai coaracuruhane latelanaala esenetaain nichao coeereurhalune jaun. Nete laen, Jonasi amurijiriin nei nichaanne sainejeein canu esenetaeneeiche,” nae jetao acaauru rai Jesoso.

**Cacha cono niha cacha notane**

*(Mt 5.15; 6.22-23)*

<sup>33</sup>Niritoha acaauru raine baiha jetaote: “Charijieein teeinti, nene chuni

cono mocohin bujuaihu tera. Niheichu rori asae nii cono telanaala ecuun nii cono mocohin te, satiin nii loreri asaae turunacaauru conohanau neeuruhane coina. <sup>34</sup>Nii rijjijeein techu inara jaberoco cononeein ne inara nota. Aihane jaun, esinae rauhijiriin jataain caohachaaain cha coaraain coitucuhin neeichenete, satiin jianacoon niha cureein inara suujua. Nete laen caohachaaain cha coaraquichene nihanaatiin que jaolequiin joaenreein chachaquichene, jataain nocohena tabai jana niha cureein inara suujua. <sup>35</sup>Aihane jaun, cha coaraain coitucuhin caohachaaain nocohalajiin neeuche, nabana cha coaraquichene nihanatiin que jaolequiin neeichene, nocoheneein nerotoha nii inara conaerane coataa. <sup>36</sup>Aihute itolere inaraacha coarai coitucuhin ichaquichene, nocohena coaraelanaala satiin jianaacoon neeine inara suujua, raafariin conohanau cha coanaa rijjijeein, esinae rauhijiriin satiin itolere coaraain neeichene,” nae jetao acaauru rai Jesoso.

**Cacha relaaurera aina fariseeocuru  
colurujiha Jesosone**

*(Mt 23.1-36; Mr 12.38-40; Lc 20.45-47)*

<sup>37</sup>Inae niritiin cachaauru rai ereerejihane nainaa Jesosone jana jetaote, rai loreri asae lenoniha cuhane coina jetao cotijiae leinjiin fariseeo. <sup>38</sup>Nii jaun cuhin, rai loreri asae turuhin nitohaniha acaauru ichaone saijjjein biji culeje lanaanla rori ichoae nelauriaa Jesosone jaun jetaote, cojoaelate jetao nii cotihara fariseeo.

<sup>39</sup>Nii jaun jetaote:

“Inara fariseeo neeichenete jataain inara jaberoco culeena inaaiche niqui. Nete nii saijjjein jataain banjelanaala calanainein ne asijjauh, naosatein,

naaonjoaainchene coreniha inara suujua cuhanai. <sup>40</sup>Asoneeojooaichenaate. Tana nii jianacoon nenea inara jaberoco coaunera inara jaberoco cuhane nenea, inara suujua netonai coaunaane coitucuhichene. <sup>41</sup>Aihana jaun inara suujua coaraain inaraacha ichaneni ichaain neeuchete nuculocohin neeine inara suujua aina inara jaberoco,” naain jetaote acaauru rai,

<sup>42</sup>“Cairichaaajoaache fariseeocuru, cacha caohachaniha nocoetocoichene coaracuruha cachaaurune coina, biha inara rai rauhine rijjijeein nii lechoonca turinein inaraacha taojiai inara temule caje le turii teechene saijjjein jeriha Cana Coaunerane rijjijeein inara amute cachaauru belaaain, nii chuni que jaolequelanaala satiin ita rijjijeein cachaauru coaraain neneeichene jaun. Aihane jaun, nii cacha caohachaniha nocoetocoichene jianein inara amute cacha belaaain, nii choae tacaain aitoha inara rai rauhine rijjijeein ichaaoche.

<sup>43</sup>Cairichaaajoaache fariseeocuru, esinae rauhijiriin jataain nelatein nenea rijjijeein sinacoca asae rori caohacha janijiin nichoae nelauriaain, inara que suujua acatein, chunijiun inara eruuruhane inara rai ereein, naaonjoaainruha cachaaurune jeriquichene jaun.

<sup>44</sup>Cairichaaajoaache. Charijjjein teeinti atane bana shaquiin nichoae situhin amue cacha, asaaun niha calanaine coitucuelanaala. Nii rijjijeeinte ne, inara suujue cuhane calani neosateechene coreniha,” naa acaauru rai Jesosone jaun jetaote:

<sup>45</sup>“Cacha relaera, fariseeocuru que niritiin canacaanu quene maajeein ereeine jaunne, sanein rautaeniha-caanu,” naa acaauru caje leinjiin Cana Coaunera aitoonjoan que cacha relaerane jaun jetaote,

<sup>46</sup>“Cairichaaajoaiche inara netonai. Nitohaneein ichaohiche inarane que ainaan tocohaneein, ichaonaa anajiin teein, inara amute cachaauru cairichaaeriin neeichene jaun.

<sup>47-48</sup>Cairichaaajoaiche, Cana Coaunera ere bera *profetacuru* sohin jaoruhua inara foerateracurune coitucuhin, baaso ichacuruhane coitucuhichene saijieein inara netonai acaauru rijjijieein neeichene jaun.

<sup>49</sup>Nitohaneriquicheeine coitucuhinte: ‘Acaauru raine, *profetacuru*, afosotooru, naaonjoainuri letoareeunni. Nii janate, tabaauru sohin jaohin, tabaauru que nejerateein, acaauru que nererojoecaa curiquicheeincha,’ naain besilu Cana Coaunera, nitohaneichene coitucuhane jaun.

<sup>50</sup>Nii jaunte, cana rai chauratane coaunaalu Cana Coaunerane caje coauneein, nii inara foerateracuru aina nii inaraacha sohi inaraacha jaorilu *profetacuru* coichana core coaratihua cureein inara que Cana Coaunera.

<sup>51</sup>Nitohaneente nii Abeli sohin coichana jaohalune jaan caje coauneein, Cana Coaunera rai lenonecuru mocooruhua saseredotecuruhachane jaan rori aina *santuario* cataaun teein inara foerateracuruhacha atinailu Sacariasi que tiaaajoaain caa enene neiniquichene que nii core coaratihua cureein Cana Coaunera.

<sup>52</sup>Cairichaaajoaiche, Cana Coaunera ere bera Moisesa naitoonjoan que cacha relaaurera; Cana Coaunera naitoonjoan coitucuhin neeichene saijieein tonorana jerelanaala neein, coitucuhin tonoraauruhua cachaaaurune jerelanaalane maajeeine jaun,” nae caauru rai Jesuso.

<sup>53-54</sup>Niritoha acaauru raine jaun jetaote, aina obajeein, nechu jataain tonaane coulurujeeuruhane jaan lera ariha jetao, Jesuso rohecaure Cana Coaunera naitoonjoan que cacha relaaurera aina fariseeocuru.

**Baaso ichacuruhane nihanatiin caohacha ichaa nocoetocuruhane coataa cachaauru relaa Jesusone**

**12** <sup>1</sup>Nitohaneein araai oharaan-caain netaojiaauruhua cachaaaurune jaun jetaote, nejesinajeein ita sururucuruhane jana jetao, aina nerelanacaauru rai jetao: “Jiaonriha aihuruha fariseeocurune rijjijieein asinojoneein baaso ichaain caohacha ichaa nocoetiin nihache. <sup>2</sup>Nii asinojoneein coitucueraelanaala baaso ichaain caohacha ichaa nocoetocochene nihanatiinte inae ecu tihane bana coitucunojoinereein. <sup>3</sup>Nitohanihane jaunte, inae nii cojoanonaa que inae turuhane bana, nii coitucueraane coataa asiin ereeichene jaan coitucunojoinereein. Jana nii coaraa chunine coataa asiin inaraacha beite satiin aonajera urichoo coitucunojoinereein.

**Esinae rauhijiriin coasinacai**

<sup>4</sup>Nitohanihane jaunne, jataain canuhacha belaaineeichene rai aitoreeunni. Jiaonriha inara sohin inara jaonaa jerera que casiin neeichene, nii inara atinaaruhane baiha nii chatohaneein inara teein inara itajenaa nainecurenihane jaun. <sup>5</sup>Nena laen esinae rauhijiriin coasinacai que inara rai aitoreeunni. Nii ohin niha inara jaberocone baiha usi jana inara suujue itajeranu quete laen nainequiche casiin neeichene. Aiha laen, nitohaneein cana tenaa nainerate laen naine coasiin ichaohacane.

<sup>6</sup>Tana nii coitucuhichene rijjijieein jataain corelanaala nenea coroatajajei moneda coriqui coreniha saouqui tajae laooinaa que necoreteeichene. Nete nitohaneein cachaauru rai jataain cha que nelatenihane saijieein, nii leinjiin-niji acaauru baitene Cana Coaunera.



<sup>7</sup>Nii rijjijeein techu, leinjiana leinjianaain janiinojooinein ne inara couturijihuru. Aihana jaun, itolere tajaee laaoinaacuru amurijiriin nelateein neeiche Cana Coaunera raine jaun, jiaonriha casiin neeichene.

**Cachaauru que acaneein nihane coitucuerateeuruhane jeriha Jesocurisitone**  
(Mt 10.32-33; 12.32; 10.19-20)

<sup>8</sup>Chunocoha cacoitucuhin canu coreniha laraajiin cachaauru acatiha netiin ereein neine, inae Cana Coaunera Cojoanonaa que turuhane bana, Cana Coaunera aina letonocuru anjeraauru notaracaae netiin canu, acaihaniji inaraacha cohajei cachaneein nejanohanaa nichaaunne aca coreniha erereeeni. <sup>9</sup>Jana chunocoha, cachaauru que canu neein nihanune coitucueratelanaala nenaane, acaentonoai coitucuha cuhenereeeni canuhetonai, Cana Coaunera aina rai anjeraauru acatiha netiin.

<sup>10</sup>Canu acaihaniji inaraacha cohajei Cachaneein nejanohanune que baasoneein ereein nei que nihanatiinte suujua acatena nainereein ofa Cana Coaunera. Nete laen baaso neein Cana Coaunera Suujue que ereein nei que suujua acatenereein.

<sup>11</sup>Nitohanihane jaun inara colurujueein inara amaauruha sinacoca asae Joriocuru cocoainanacaihuri, joesiocuru, naaonjoainuri renene, jiaonriha chaque tonajeein cuhichene. Coa: 'Tonaainnera erereeeni,' naain nocoatiin ereeichene jaanu coacuhin cuhache. <sup>12</sup>Inae ereeichene coina neeichene janate, caohachaain ereeichene coina inara relaa cureein Cana Coaunera Suujue. Coatiha inara suujua caje rocohin ecu ererheicheein," nae jetao aina nerelana-caauru rai Jesoso.

**Jataain alalacaraa coriquihonacaauru ichaone**

<sup>13</sup>Nitohaneein cachaauru relaa Jesusone jana jetaote, nii arajii

cachaauru caje leinjiin cacha jetao Jesoso rai:

"Cacha relaera, canu nejera rai aitoote, canu rai canacaanu inaca amureecha ratirii rucuhele canacaanu rainein nenea leruhin teeine canu raicha," naa Jesoso raine jaun jetaote;

<sup>14</sup>"Chana jana chaen, cocoainana-cainein canu tein, nitohanai rucuhera-neein inara rene caletoe inara inaca amureecha sirii rucuhele leruhin tihanu inara raine coina," naain jetao,

<sup>15</sup>saain nii ecu neein aonajeeurera cachaauru rai jetao: "Jiaonriha itolere sirii necoriquijiaain nenea coaquiche inara netonaine. Coatiha coriqui siriiin nihacaneecha que nelateein nihei cana ichaota," naain jetaote;

<sup>16</sup>"Coaracuchenachuhinti niqui niha leinjiin cacha, jataain itolere siriiin coriquihonane. Nii jaun jetao, jelai teein atane siriiin, arajiiin ocoana sirihane jaun jataain arajiiin rai temulecuru taojiae.

<sup>17</sup>Nii jaun jetaote: 'Cha laen ichareeun canu temulecuru canuhacha taojiai ainata. Inae nihei rucuhecaaanne jaanuta,' naain jetao coacuhin; <sup>18</sup>'Saan. Inae canuhacha ichaneni coitucuhane. Jitariin canu temulecuru coloherihuru comaain jaohinne, nacoauneein leeochoaauru lorerichuru tabaihuri jareeun, jitariin catemuleeuru canuhacha taojiai rucujueein, jitariin carujueleeurune maajeein rucuhecaaan nasaee teeinne coina. <sup>19</sup>Nii baihane laen caraajenihane: Inae niha arai jaanacaneein ichaohin, tonajelanaala acau cohin, lenonein, rachojoeein naaonjoaanune jaanu,' naain suujua cuhane iriha nii coriqui coriquihonane jana jetaote; <sup>20</sup>'Asoneeojoaanaate, ena cojoanotiin cuhanete oriquincha. Nii ii rucuhele inacojoein arajiiin rucujueein chunaain iicha sirii, chaa rainein chaainti niha cureeinta,' nae jetao rai Cana Coaunera.

<sup>21</sup>Nitohaniane jaunte, nechu jataain rainein chaque namute cacha coroata-janelanaala rucuhele siriin nenea cacha, Cana Coaunera rai cairichainejeein ne, nitajihane rai nihane jaun,” naain jetao nii coriquihona cacha que erenea *parabola* que acaauru relae Jesoso.

**Nere tonoraain jerihane rijijieein  
ichaohin nenacaauru beraiha  
Cana Coaunerane  
(Mt 6.25-34)**

<sup>22</sup>Niritohane baiha jetaote, aina nerelanacaauru rai jetao: “Caa quene inara rai erenea jereeun. Jiaonriha lenoneein ichaohiche jaanu aina inara cajoneecha que nererojoecaaichene.

<sup>23</sup>Jataain nelateein niha lenonene amurijiriinte, jataain nelateein ne inara ichao. Jerichanejeein techu nelateein niha cajonene amurijiriin jataain nelateein ne inara jaberoco.

<sup>24</sup>Coaracuche nachuhinti temule jaain, niicha quiineuri rucuhecuruhane jaanu coloheri siriin, naonjoaain neururiha rohirihuru. Nete laen Cana Coaunera, lenoneein ichaauruhane caina acaauruhacha quiine teein ne. Inarate rohirihuru amurijiriin jataain nelateein neeiche.

<sup>25</sup>Inaonjoa saain nihanatiin itolere-neein suujua cuhane coaauca cachane nihanatiin, nichao cariaain ichaonaa nainihe. <sup>26</sup>Chanuna aansijiin laaojoiiri que coacuhin neeichene nihanatiin, ichana nainequichene coaalanaala itolere que nererojoecaaeriin neeiche.

<sup>27</sup>Coaracuche nachuhinti caohachae-nanaain omarohin neeuruha caa ajaena ujuanecuru amihanejeein neeuruhane que airijiinne. Nete aihuruha caa ajaena ujuanecurune tocohaneein jataain caohachaa inanaacanelu rey Salomoon, cajione caohacha que necoreetein nihalune saijieein.

<sup>28</sup>Nitohaneein mocohenineein niha caa ajaena ujuanecuru natiinte, caohachaa in omarohin neeuruhane jaanu teein ne Cana Coaunera. Tana nii amurijiriin inara- cachaneein neeichene cajione terichaa in Cana Coaunerane esenetaai-cheneta.

<sup>29</sup>Nitohaniane jaun, coa lenoneein, acau cohin, naonjoaaichene jaanuhacha que nererojoecaaeriin nihache.

<sup>30</sup>Satiin caa chauratane que Cana Coaunera coitucuelanaala nenacaauru cachaaurute, nechu jataain nitohaneein nererojoecaaeriin neeure. Nete laen, satiin inaraacha latei coitucuhin teraneein ne Cana Inaca Cana Coaunera.

<sup>31</sup>Nitohaniane jaun jeriha Cana Coaunerane rijijieein ichaauruha cachaaurune jaan Cojoanona que coacuhin neeichenete lanaenereein inaraacha latei,” nae jetao aina nerelanacaauru rai Jesoso.

**Dedeeu charijibana satonohelanaala  
ichaonaana jaan  
(Mt 6.19-21)**

<sup>32</sup>Niritiin jetaote: “Jiaonriha casiin neeichene, charijieein teeinti carenero beraain neeure irilaain sirichaauru, nii rijijieein inara beraain nerichaaunnine jaun. Inara Cana Coaunera coitucuhera-neeichenete, jataain coroatajajeein neeiche niqiu. Nete jataain inara belaihanee jaun rai Cojoanona que inara rareein Ofa Cana Coaunera.

<sup>33</sup>Aihane jaun, jitariin nii inaraacha siri rucuhele que necoreetein, cairichainejeein chaelai que latejiojiriin nenacaauru coroatajanecuche. Nitohaneein neeichenete, dedeeu charijibana satoelanaala nenea Cana Coauneraacha teeninu rariquicheein. Nerinaain inara caje nii dedeeu inara rainein nenea ruluera. Nii bana

asijiautooru nihanatiin ecu turuhin inara basijiahuna nainihe. Niheichu cojoano nihanatiin ecu enohin asaena nainihe.

<sup>34</sup>Nitohanihane jaun jauriaanejeein caohatiin, nii chabana satonoelanaala nena, nii ena nitaje rai nena inara ichao, naaonjoai que coaacuche.

#### **Letonoa jatoroaain neeuche**

<sup>35</sup>Letona jatoraa inara cajione jiaain neeuche, inara siricho mocohin conohanau. <sup>36</sup>Charijieein teeinti, nesirihatena beseta caje cauhin, acujua dadaa fatoroone jana, acujua joaracaain raure nii letonocuru. Nii rijijieein jatoraa in neeuche. <sup>37</sup>Raotojoeinte neurureein nii rai letonocuru, sinilanaala neeuruhane jana acaauru eruha nii acaauru fatoroone. Esinae rauhijiriinte raajenihane rori ichoae acaauru lauriaain lenone que acaauru coroaatiha cureein nii acaauru fatoroon. <sup>38</sup>Dede cataaun, janonaa nichae, naaonjoaain turuhane jana, sinilanaala cohacuruhanete, raotojoein neeureein.

<sup>39</sup>Caohachaa inara rai caitoonjoa aonacuchete coitucuhiche. Chunocoha loreri erora turuhin basijiauha uha asijiatone coitucuhane, coatiha nii acujua joracarihei, nabana enohin basijiauha nii asijiatone coataa. <sup>40</sup>Nii rijijieein inara netonai nainaa in jatoroaain neeuche, turuha urichaa in nacoaunein nii jauriaa acaihaniji inaraacha cohajei Cachanein nejanohanaa que,” nae jetao acaauru rai Jesoso.

**Letoera tonoraera aina letoera tonoraai**  
(Mt 24.45-51)

<sup>41</sup>Niritoha Jesusone jaun jetaote:  
“Leinjiin canacaanuhacha ii aina nerelanaanichaanune relanaa aitohi

Curuaanaa, ainihane satiin raine maajeeinna aitohi,” naain caje bajaa Fedorone jaun jetaote,

<sup>42</sup>“Tana coitucuhichene. Chariji jian, nii jataain nelatein nere tonoraeranein loreri beraichanu que ratiri rai fatoroon, turuhanereen tiaain nii rai cachaauru coroaatein acaauru sirihane coina. Tana satiin canuhacha cocoinai neeichene, canu cachaauru beraichanein neeichene coitucuhichene. <sup>43</sup>Jataain raotojoeinte nereein nii nere tonoraera, nii letoain ratirihane jaa ichaa jerihane rijijieeine jana, eruha nii fatoroone. <sup>44</sup>Nii banate, esinae rauhijiriin jerihane rijijieein ichaohin nere tonoraain nihane, aca cocoinaain itolere niicha sirii coaranu que terein rai fatoroon.

<sup>45</sup>Jana, ‘Jaitijiecha carajaain lanae turuha rai fatoroone’ naain coacuhin baasonein niicha beraihuri quichaauru, enecuru, naaonjoainuri que jaolequin acau cohin, lenonein, ajein, naaonjoane jana <sup>46</sup>eruhanete, rai cachaaurunelanaala rai nere tonoraachuru cairichaa curichaa in Cana Coaunerane rijijieein acaentonai cairichaa cureein nii rai fatoroon.

<sup>47</sup>Jana inae nitohanein coitucuhane saijieein, jatoroaain nelanaala nii letoaa rai fatoroonne tonoraelanaala, nenaate casetecareein jataain banejelanaala bisiin rai fatoroon. <sup>48</sup>Nete laen coitucuelanaala nena rai cacha, baaso ichaane nihanatiin coitucuruhanane saijieein baaso ichaeraauru fautaeriin cairichanojoiniha cureein. Nitohanihane jaun, quicha coitucui coitucuhaterihanune jaancuru cajene, jataain jelai amuritoheriin bajareeunni, canuhacha jerei ichacuruhanane coina.

**Jesoso coreniha ita que**  
**nejerateeuruha cachaaaurune**  
(Mt 10.34-36)

<sup>49</sup>Canune caa chauratane que usi mocoha uun. Bajaa nachuhinti chajaain

mocohane jana turueneenlu. <sup>50</sup>Jataain necairichanaa tabai abaantanunete ne. Nii jaunne, nii que turuhanereen tiaain, que nererojocaeriin neeun. <sup>51</sup>Inacojoein chachu, 'Caa cana rai chauratane que jecha raoti ichaonaanaja turuaa uun,' naaiche niqui. Aihei bajiaa. Raujiaain ita caje neleruhin niha cachane coinane turuunlu. <sup>52</sup>Nitohanihane jaunte, saouquin le lorerijieeincha ita aina ichaonacaauru, ena caje coauneen ita caje neleruhin, nii nichatajaihuri que nejeratiha cuurureein nii coroatajaihuri. Jana coroatajaihurite, nejeratiha cuurureein nichatajaihuri que. <sup>53</sup>Jana calaohi aina te nejeratereein rai inaca. Nii jana calaohite inaca que nejeratereein. Jana acaauru nebate, rai cacunu que nejeratihane jana, rai cacunu netonai que nejeratereein. Rai nacano que nejeratiha nebaenene janate, nebaene que nejeratereein rai nacano," naain jetao Fedoro tonorae Jesoso.

**Janonaa cojoinacaauru  
coitucuha cachane  
(Mt 16.1-4; Mr 8.11-13)**

<sup>54</sup>Nii baiha jetaote, leeochoaauru cachaauru rai jetao:

"Enoto soo nichajai que nijichorianaa coaraaichenete, 'Urichaain elo,' naain ereeichene, nii aitocoichene rijijieein esinae rauhijiriin uhe elo. <sup>55</sup>Jerichanejeein techu, enoto mitu coarajeein cana raotono nichajai caje uain jiatuha cujuanane, 'Ajaarotorichaain,' naaichene esinae rauhijiriin ajaarote. <sup>56</sup>Cha coitucunaa jeriheichuru casajeeuru. Nitohaneen dede, cana rai chauratane, naaonjoain caje coaraain cha coitucuhiche natiinte, canu coaraaiche natiin, 'Naaonjoaa ichaonaane coinane aicha,' naain canu coitucunaa jereneeiche.

**Aina nejeratenaa aina  
raotojoeein niha cachane  
(Mt 5.25-26)**

<sup>57</sup>Chanuna baaso ichaain neeichene niha natiin, baaso ichaquichene coitucuhi nenaajereneeiche. <sup>58</sup>Nitohanihane jaunte, inae ena caje coauneen colurujuenajoi ineriquicheein. Aihane jaun, joesio rene inara amaa inara colurujueranu ajiniha aina rucuecuche. Ainihanete, inae colurujuenajoi nequichene jaan cojoanonaa que turuhane bana, inara netonai colurujuiha nii nejerateeichene jaan jera joesio raine, inara tiha coaridiaauru bijihune, caresero cuhane inara enohaurureein. <sup>59</sup>Nii bana jelai caje mituriheeecheein nii baaso ichaquichene jaan core nainaaiche jitaain inara coriqui jaohinne reein tiaan," nae jetao cachaauru rai Jesoso.

**13** <sup>1</sup>Nii bana jetaote, turuha cuure cachaauru Jesoso rene. Nitohaneen rene turuhin jetaote, "Jerosaleen nena Teenforo asaae lenonecuru sohin mocohin, Cana Coanera coroaeca neeuruha Calileea cocoaichacuru tabaaurune janate, acaauru sohin jaonajaain, nii lenone acaauruhacha sohi coichana que acaauru coichana jasiite Filatora," naain jetao Jesoso rai beeuru nii cachaauru.

<sup>2</sup>Niritocuruhane jana jetaote: "'Jataain naraaichuru amurijiriin osaaocuruhane jaun jecha aihure nii Calileea cocoaichacuru' naaiche niqui. <sup>3</sup>Nete aine. Inara netonaite ohin nitajeriquicheein, inara ichao coreein jeriha Cana Coaunerane rijijieein neneeichene.

<sup>4</sup>Jerichanejeein techu jerihane, 'Nii leeochoaauru Jerosaleeun ichaonacaaurulu amurijiriin jecha osaaotooruhane jaun, nii le choonca fosaneeuri ichoae comoe nii ucuuneen ininaanaja nena Silohe,' naaiche niqui. <sup>5</sup>Nete aine. Nii aihuruhane rijijieein techu inara netonai ohin nitajeriquicheein, jeriha Cana

Coaunerane rijijieein inara ichao coreein ichaonaa jereneeichene,” nae jetao acaauru rai Jesoso.

**Inacaeniha temulene que *parabola* que  
cacha relaa Jesosone**

<sup>6</sup>Niritiin jetaote: “Leinjiin cacha nocoana jana leinjiin temule sirihane jaun jetaote, inaacane coaraa cue. Nii jana leinjiinniji inacaenihane jaun jetaote, <sup>7</sup>nii ocoana beraicha cacha rai jetao, ‘Aonaan. Nichata jaanaca naineinne niqi le jaanacaauru nainein turuhin caa temule coaraa unajacoon. Nena chabana inaacane jana coaraeneeun. Aihane jaun chajaain ena sauhin jaao. Cha inacojoeinte atane lanaaeca nere,’ naane jana jetaote:

<sup>8</sup>‘Aihachuhisi niqichica curuaanaa. Jauriaa nirijieein coarajeeune, ena ajaanaa cuhane rai nasaji retuhin ajaena setuuru te temurau. <sup>9</sup>Nitohaneein tihanune saijieein inacaenihanete laen nainere sauhin jaohine,’ naain jetao tonorae nii ocoana beraicha,” naain jetao cachaauru relae Jesoso.

**Nebetacanaa cojoanonaa bana leinjiin ene  
janori raroahaera rautaa Jesosone**

<sup>10</sup>Nii baiha jetaote, nebetacanaa cojoanonaa bana sinacoca asae enohin jetao, cachaauru relaa cue Jesoso. <sup>11</sup>Nii jana jetaote, ecu ne leinjiin ene- lechoonca fosa jaanacanihane caje coaunein baasoniha jaberocoone jaun caaun cunaiteein. Nitohaneein jetaote, suujua cuhane neein jaberoco asaeca coitucuchuhine jaun, nii chariji bana neraujiasilanaala janori raroahaain ne. <sup>12-13</sup>Nii ene coaraain jetaote, cotijiaain nichoae biji meracaain:

“Inaen ii cunai caje nerautaaicha ene,” naa Jesosone rijieeoritiin, cunai caje nerautaaain nichaauraain jetao, Cana Coaunera corojeein rachoojoe nii cunaitena ene.

<sup>14</sup>Nitohaneein nebetacanaa cojoanonaa bana cunaitena rautaa Jesosone coaraain jetaote,

obaje nii sinacoca curuaanaa. Nitohaneein obajein jetaote:

“Niha saota janoneein amihanenaana jaan cojoanonaa. Nii amihanenaana jaan cojoanonaa bana nerautaaeratiha uuchera. Coa nebetacanaa cojoanonaa bana nerautaaeratiha uhachera,” naa cachaauru raine jana jetaote:

<sup>15</sup>“Chanuna nebetacanaa janonaa bana cha ichaain neeiche inara netonaine saijieein, cha ichaain neeuruha leeochoaurune jereneeiche. Tana inara netonai nebetacanaa cojoanonaa bana, inara baca, inara boro, naaonjoinuri cosi batuhin amaaihe jesinaaeca cohane coinane. <sup>16</sup>Nii rijijieeiina caa ene Abaraan nefoerate-neein nena, lechoonca fosa jaanacanein Moconajaera ichanohinein caaun cunaitein nihane caje, nebetacanaa cojoanonaa bana rautaaun,” naa Jesosone jaun jetaote, <sup>17</sup>jataain nocoejeeure jetao, nii aina nejeratenacaauru. Ne jetaote jataain itolere que nelatein, itolere ichaa Jesosone coaraain jetao coroaecure satiin cachaauru.

**Mosatasa ucuhe que *parabola* que  
cuuuaain cacha relaa Jesosone  
(Mt 13.31-32; Mr 4.30-32)**

<sup>18-19</sup>Niritiin jetaote: “Coaracuchena- chuhinti aansijihan mosatasa ucuhe natiin, nocoana jana temuha cachane jana omarohin fohecane, rai nunecuru que nucuhateeuruha tajaecurune. Nii rijiiicha cacha inae Cana Coaunera Cojoanonaa canuhacha tei que ichaoha cachane,” nae jetao Jesoso.

**Faan jorerera que cuuuaain *parabola* que  
cacha relaa Jesosone  
(Mt 13.33)**

<sup>20-21</sup>Niritiin jetaote: “Coaracuchena- chuhinti faan ichacuruhane coina neleeriha tabaain nii colihane jaanu que jorerera teein, nichata sajeein

coujunaca que arina coujunacate leinjiin ene, inae neleerihia tabaain nii colihane jana caje arajiin faan jaane coina. Nii rijjijeeinte neleerihia tabaain colihane coina nenea jorerera rijjijeein, neruujihia cacha ichaone coina nenea ne Cana Coaunera Cojoanonaa,” naain jetao acaauru relae Jesoso.

**Acuujua jaratoelanaala nenea**  
(Mt 7.13-14, 21-23)

<sup>22</sup>Nii baiha jetaote, Jerosaleeun cuuruna jaan jetao, situuruna jaanru nenacaauru nenaanajaaunru, neseeuru, naaonjoainuri naineein cachaauru relajeein cuujue Jesoso. <sup>23</sup>Nii jana jetaote:

“Curuaanaa, jataainna coroatajaaecuruha caa nosa caje nichotenacaauru,” naain caje bajaa leinjiinne jaun jetaote:

<sup>24</sup>“Eenjeen. Nitohanihane jaun, nii acuujua jaratoelanaala nenea cuhane enooche. Arajiite niqui enonaa jerereein nete nainecurenereein.

<sup>25</sup>Inae ecu tihane bana nimichuhin acuujua fuha nii loreri erora nete, inara airiniha nedainequichene, ‘Curuaanaa, acuujua joaracaane enohacaanura,’ naaichene janate, ‘Inara coitucuhanune coalanaala, cha nequiche chaainti,’ naa inara rai nii loreri eroranete, <sup>26</sup>‘Ii ainane lenoneein, acau cohin, naaonjoarejetocaa-nulu. Iite canacaanu relarejetohi canacaanu berooru cuhanera,’ naaichene janate, <sup>27</sup>Inae inara rai aitocooaan, cha nequiche chaainti. Inara coitucuhaaun. Naain cacaje amuuche, baaso ichaechajeein ichaonacaauru,’ nareein. <sup>28</sup>Nii banate, inara airiniha nedainiquichene inara catu rihoneein chanaa curiquicheein, Cana Coaunera Cojoanonaa que neeuuha satiin *profetacuru*, Abaraaun, Isaca, Jacobo, naaonjoainurine coarajeeincha.

<sup>29</sup>Nitohaneeinte enoto mitu nichajai coarajeein cana jaabiji nichajai caje,

enoto mitu nichajai coarajeein cana raotono nichajai caje, enoto mitu nichajai caje, enoto soo nichajai caje, naaonjoainuri nichajai cajeeurute turuha uurureein cachaauru, Cana Coaunera aina rai Cojoanonaa que neein nelauriaain lenonecuruhane coina.

<sup>30</sup>Nitohanerichaaainne jaunte, nii ena jaolecooruhane jaanru nelatelanaala nenacaauru tabaaurute, ichoaichaniha ranojoneein niha cuurureein. Jana leeochoaauru amurijiriin nelaaetoha nocoetonacaauru tabaaurute, satononejeein ranojoiniha cuurureein,” nae jetao acaauru rai Jesoso.

**Jerosaleen cocoaichacuru coreniha chanaa Jesosone**  
(Mt 23.37-39)

<sup>31</sup>Niritohane jana jetaote:

“Chajaain ena caalai caje amuu. Ii sohinte ii jaonaa jere Erodesicha,” naauruha Jesoso rene turuhin fariseocuru tabaaurune jaun jetaote:

<sup>32</sup>“Aiha niqui. Chajaain nii ataibinae rai: ‘Enene, eresi, eresi cojoanoon, naaonjoaichurune coitucuhuhichuru sitaain, cunaitenacaauru rautaaain, naaonjoareeunni,’ naain benichuche.

<sup>33</sup>Nena laen enene, eresi, eresi cojoanoo, naaonjoaainchuru canuhacha ichaneni ichaaechajeein cuujuereunni, nii Jerosaleeun edaa onaa naineniha leinjiin *profetane* jaun, ecu turuhanune reentiaaincha,” naain Erodesi rai beratihane baiha jetaote:

<sup>34</sup>“Cairichaaajoaache nohane satiin Jerosaleen cocoaichacuru, inara rene Cana Coaunera letonocuru, chaen *profetacuru*, naaonjoainuri bodosiinj ajeri que sohin jaonajaaonquichene jaun. Araai saaine niqui nitaro asae calaohichuru sararaain siniha ataoharine rijjijeein, inara ranaa

jereeun, nete cacoitucunaa jereneeiche.  
<sup>35</sup>Aihane jaunte inaan jelai neriquicheein. Inae cacoharariheeicheein nacoauneein inara rene turuhanune reentiaaincha. Nii nacoauneein tururichaaunine cojoanona banate: ‘Raotojoeein turuhine Cana Coaunera-neein nena cana Curuaanaara,’ nariquicheein canu raicha,” nae jetao cachaauru rai Jesuso.

#### Laracaain cunaitenaa rautaa Jesusone

**14** <sup>1</sup>Nii baiha jetaote, nebetacanaa janonaa bana leinjiin curuaanaa fariseo loreri asae lenoniha cuha Jesusone jana jetao colurujueeuruhane jaanu leratihane coaracuruhane coina, “Chatohanaicha ichareein,” naauruhane jaun jetao ecu coarajeeure leeochoauru fariseocuru.

<sup>2</sup>Nii jana, niritiin coaacuruhane que nainaane jaun jetaote, ecu rohan niha leinjiin cacha laracaain cunaitenaane jaun jetao:

<sup>3</sup>“Nainihana nebetacanaa janonaa bana rautaeraa leinjiin cunaitenaane. Tonaquiche inara,” naain jetao Cana Coaunera aitoonjoa que cacha relaaurera, chaen fariseocuru, naonjoainuri caje jetao bajae Jesuso.

<sup>4</sup>Nii jana inauheneecha curuaequiin aonajeeruhane jaun jetaote, biji que nii cunaitenaa mucuhin rautaaain jetao letoae amuhane coina.

<sup>5</sup>Nitohanein cunaitenaa rautaaain jetaote:

“Chariji inara caje nebetacanaa janonaa bana naluha rai toro acau netaojianaja atane jachu ucuacaain nena cuhanene jana, inauheneecha rocoelanaala coarajere. Ainihane rai calaohi naluha acau netaojiana jaan atane jachu cuhanene, nirijieein rocoelanaala coarajere,” naain fariseocuru caje bajaa Jesusone jana jetaote,

<sup>6</sup>tonoraelanaala inauheneecha aonajeure.

#### Nesirihatenaa beseta que cotihanojoihuri

<sup>7</sup>Niritoha Jesusone jana, nelaurianaanaja rori caohacha janijiin nichoae nelauriaauruha nii cotihanojoihurine coaraain jetaote, acauru suujuatiha:

<sup>8</sup>“Chunocoha inara cotihaca nesiriatenaa beseta quene, jiaonriha rori caohacha janijiin nichoae nelauriaaichene. Nabana turuha uha inara amuritoheriin nelateein nena cotihanohinete, <sup>9</sup>Nii ii rori jianeute ecu nelauriamiin caa leeochoa,’ naa uha nii inara cotiharane, coejetiin rori baaso ichoae nelauriaa cunaa nainequiche.

<sup>10</sup>Aihane jaun nii ajiniha inara cotihara nihane, rori baasonejeein nena ichoae nelauriaauche. Nii banate turuhin, satiiin nii ii rohan rori ichoae nelaurianacaauru notaracaae, ‘Caa rori caohacha ichoae nelauriaa uura quiicha belaa,’ naa nii inara cotiharane, ichei caohachanere. <sup>11</sup>Nitohanein leeochoauru amurijiriin nelateein nena jerenacaaurute, necoeje chanunojoiniha cuurureein. Jana nii nelatecuruhane coaratelanaala nenacaaurute, raotojoeein ranojoi niha cuurureein,” naain jetao suujuatenajae Jesuso.

<sup>12</sup>Niritiin jetaote acauru cotihara cacha rai jetao:

“Cachaauru cotijiaain corootenaa jereeine, jiaonriha ii nejeraauru, charaachuru, iicha belaihuri, ii laurijiracuru coriquihonacaauru, naonjoainuri cotihaquine. Acauru cotijiaain acauru coroaateine jana, ii cotijiaain ii coroaateeruhanete, inae ii rai nii cainaenereein Cana Coaunera.

<sup>13</sup>Nitohanihane jaun beseta ichana jereeine, cairichaihuri, nelatelanaala nenacaauru, bacosacuru, maosacuru, naonjoainuri cachaauru cotihacu.

<sup>14</sup>Acaaurute laen ichei cainana nainecurenihane nihanatiin, Cana Coaunera ichei cainaa cureein, inae rai cachaneein nenacaauru ichtatiba oo caje Cana Coaunerane bana,” nae jetao nii cotihara fariseeo rai Jesoso.

**Cana Coaunera Cojoanona que  
cacha relaa Jesosone  
(Mt 22.1-10)**

<sup>15</sup>Niritoha Jesosone jana aonaain jetaote:

“Bajiaanachuhinti Cana Coaunera Cojoanona que neein lenonenihacache,” naa Jesoso rai leinjiin acaauru aina rori ichoae nenaane jaun jetaote:

<sup>16</sup>“Coaracuchena chuhinti leinjiin cacha jetao, lenone jaain arajiin cachaauru cotiharate. <sup>17</sup>Nitohaneein jetaote, inaan jatoroaa nii lenonene jana jetao rai letono letoae cotihana-jaane coina.

Nii jaun jetaote, cuhin acaauru rene turuhin: ‘Chajaauchejete lenone, inae jatoroaa lenonera,’ naain cotihanajaane jana jetaote: <sup>18</sup>‘Saan, naininaaun. Ena atane coretichaaunne jaun coaraa cuhanunete ne. Canu que ii suujua acateeu,’ naain jetao berate leinjiin. <sup>19</sup>Nii jana leeochoa jetaote: ‘Lechooncaain toro amihanenaa que nelatei coretichaaun enane jaunne, acaauru coujuhin coaraa cureeun, amihanenaa que nelatecuruhane coitucuhanune coina. Nii jaunne ichei aitoon caque ii suujua acateeine coina,’ naain beratihane jana jetaote, <sup>20</sup>leeochoa netonai: ‘Ena nesirihatihanune jaun nainihaaun uhanune,’ naain jetao satiin ita rijitiin beratihacoaaure, acaauru que suujua acatiba acaauru cotiharane coina.

<sup>21</sup>Nii jaun jetaote, jelaiha cauhin nii rai aitocuruhane rijitjoeein biha cue rai fatoroon rai nii letono. Nii jaun

jetaote obajein, ‘Chajaain soroneein nese sacutaain cuhin, cairichaihuri, cacha nelatelanaala nenacaauru, maosacuru, bacosacuru, naonjoainuri cotijaain caja uhanajaau,’ nae jetao rai fatoroon nii letono rai.

<sup>22</sup>Nii jaun jetaote, nii rai aitohane rijijieein satiin cachaauru chaque nelatelanaala nenacaauru cotijaain jetao: ‘Curuaanaa, inae nii carai aitohine jaa ichacaau. Nete jaiti caute nelaurihanajaaauru,’ naa nii letonone jaun jetaote: <sup>23</sup>‘Chajaain nenaanajaaauru naineein cuhin, unaa jereraauru leeochoaauru cachaauru cotihanihute nemomiin canu lorericha. <sup>24</sup>Coatiha inae canu loreri asaae lenonecururihaain nii jauriaanejeein cotihanoinunrita,’ nae jetao nii letono rai fatoroon,” naain jetao nii cacha tonorae Jesoso.

**Jesoso cacha nena jerichaane,  
necairichanaa abaantaacanete ne.  
(Mt 10.37-38)**

<sup>25</sup>Jelai caje amuha Jesosone jana, arajiin sacuuruha cachaaurune jaun jetaote, acaauru rai: <sup>26</sup>“Chunocoha canu esenetaain canu cachaneein nena jerihane, rai inaca, rai neba, rai comasai, rai bereecuru, rai nejeraauru, rai baihuru, rai jaberoco, naonjoainuri belaihane amurijiriin cacolaain quere tonoraain nihanete ne.

<sup>27</sup>Canuneein nihanune coitucuhin canu cachaneein nena jerera, coroso que airichaaunne rijijieein itolere necairichanaa abaantaain letohaanune jaan ichaain neeine. Jana ainihane, coatiha canu cachaneein nena nainihe chuni.

<sup>28</sup>Tana inara tabaaauru, leinjiin loreri janaa jerihane jauriaanejeein nelauriaain: ‘Necha besautiana nainerichaaunni,’ naain coaacane coitucuhi-



chene. <sup>29</sup>Nitohaneein coacuelanaala ichaain, nunuheniha nenea tihane baiha jianihanete, satiin ecu situhin coaraauru nainere. <sup>30</sup>Caa leinjiin cachate niqui caa loreri ichana jere.

Nete jauriaanejeein besautiaane jaanu que coacuhin ichaenhane jaun ninaelanaala ecu jiane, 'naain erenaa nainecurure que cachaauru. Aihane jaun jauriaa nejeein besautiana nainihane coitucuhane coina coaauca nii loreri ichara cachane rijijieein coaumiin canu cachaneein nenea jerera.

<sup>31</sup>Nii rijijieein techu jauriaanejeein nelauriaain coauna nainere leinjiin *rey*, leeochoa *rey* aina sonaana que nenea jerihane: 'Necha lechoonca oharaancani soondarooru aina caa coroata choonca oharaancani soodaroo aina nenea *rey* amuritonaa nainichaaun,' naain coaaucaane jana, <sup>32</sup>nainenihane coitucuhanete, jaiti coriaae niha nii nejeratihane jaa *rey*ne jana, raotojoeein jiniiquiiin ita aina rucujueein ichaauruhane coina jitariin nii leeochoa *rey* nejeratenajaacha bajai tihane coina aitiin nere beranu letoare.

<sup>33</sup>Nii rijijieein coacuelanaala, niicha sirii jianena jerelanaala nenea, coatiha canu cachaneein nenea nainihe.

**Cotebihane jianihane, nii chaque nelateniha tebene**

(Mt 5.13; Mr 9.50)

<sup>34</sup>Coaracuchena chuhinti jataain nelatiha niqui tebene. Nete nii cotebihane jianihane, inae chaque nelateein nenere. <sup>35</sup>Niheichu temule jaacane coina, atane jasiitihacane jaanu que nihanatiin nelaterihe. Nechu jataain joaereinte jaoleneein nere.

Nii rijijieein nii chaque nelaterihe, relaanune rijijieein ichaohane baiha, jianein niha canu cachane. Caa caitoonjoan aonacurumiin uricho nacaauru," nae jetao nii arajiin sacuurera cachaauru rai Jesoso.

**Rai nitajenaa carenero eruha carenero beraichane que cuaain nenea *parabola* que cacha relaa Jesosone**

(Mt 18.10-14)

**15** <sup>1</sup>Satiin naraaichuru Jorioocuru cairichaerriin Roma curuaanaa rai *impoestonu* que coriqui que cachaauru cobaraaurera, chaen leeochoauru cachaauru baasoneein ichaonacaauru, naonjoainuri jetaote, Jesoso rene turuure irihane aonacuruhane coina.

<sup>2</sup>Nii coaraain jetaote, "Caa cachate osaaonacaauru cachaauru raain nihanatiin acaauru aina lenonenajaque," naain jetao Jesoso necoeje chanuure Moisesa aitoonjoan que cacha relaaaurera aina fariseeocuru.

<sup>3-4</sup>Niritocuruhane jaun jetaote, acaauru rai: "Tana chunocoha inara caje lefashaaain carenero siriquichene jana, nitajiha leinjiine nii iscoonchoonca iscooni ratiiriin nii nitajenaa carenero ariha curiquiche eruhichenerein tiaaine. <sup>5</sup>Nitohaneein inae eruhichenete raotojoein baijiaain turuaain, <sup>6</sup>loreri asaae inaraacha belaihuri, inara laurijiracuru, naonjoainuri cotijiaain, 'Canu coroaecuche. Inae carai nitajenaa carenero eruhanu,' nanaa naineriquiche.

<sup>7</sup>Nii rijijieein techu osaaocuruhane coitucunaa jerelanaala neeuruha nii iscoonchoonca iscooneeurine jana, leinjiin cacha osaaocane coitucuhin, Cana Coanera lateein rene turuhane, nii iscoonchoonca iscooni corojelanaala, nii leinjiin turunaacha coroaecure dedeeu nenacaauru," naain jetao fariseeocuru tonorae Jesoso.

**Coretiin nenea moneda nitajenaa eruha enene que *parabola***

<sup>8</sup>Niritiin jetaote: "Nii rijijieeintechu, leinjiin ene, lechooncaain moneda jataain rai nelateineein nenea caje nitajiha leinjiinne, tana raafariin

mocohin, eruhanereen tihaain loreri asaji lojoiin caohatiin aririhane.

<sup>9</sup>Nitohaneeein ariin eruhane, tana niicha belaihuri, chaen rai laurijiracuru, naaonjoainuri cotijiaain, ‘Canu coroaecuche. Inaen canu rai nitajenaa jataain canu rai nelateineein nena moneda eruhanura,’ nariha nii ene ne.

<sup>10</sup>Nii rijijieein techu, ita corojeein neure Cana Coanera rai anjeraauro, nosa caje nichoteein niha leinjiin cachanera,” naain jetao acaauru relae Jesoso.

**Rai calaohi ocoala que suujua acatiha rai inacane que *parabola***

<sup>11</sup>Niritiin jetaote: “Niha jetao leinjiin cacha corootajaain calaojoiin. <sup>12</sup>Nii jana, nii rai calaohi ocoala jetaote: ‘Ofa, canu rai, ohine bana carainein neeninu iicha sirii irihuru, ii atane, ii rucuhele naaonjoaihunri leruu,’ naane jaun jetao, nii rai ninana aina acaauru nainein jetao lerne nii acaauru inaca.

<sup>13</sup>Nii jana rai nocoala jetaote, nii baiha neoriin jetao nii que banijiaai que jitariin necoreteein jetao nii coriqui aina coriajai atane cuhin, nechu jataain joareein jitariin rai coriqui jaohin nichao que ichoae.

<sup>14</sup>Inaen jitariin rai coriqui jaohane jana, nii nihane jaan neniha quinacaine jaun jetaote, ecu mijitena que necairichae.

<sup>15</sup>Nii jaun jetaote, nii nihane jaan nena leinjiin cacha caje amihanenaa ariha cuhane jaun, rai cosichuru beraihane coina jetao letoae nii cacha.

<sup>16</sup>Nii jaun jetaote, nii cosichuru lenone raain que lenonenee rijitocojoae. Nejetaote nene rai cha tera.

<sup>17</sup>Nii jaun jetaote: ‘Arajiin neeuruha ofa rai amihanenacaauru natiinte, itolere bana ne banejelanaala acaauru lenonenu, cau mijitenacaun ohajihanu

canune jana. <sup>18</sup>Jelaiha cauha cuhanunete ne ofa loreri asae. Chaenne inae ofa rene turuhanune: “Jataainine banejelanaala baaso ichaaun Cana Coanera aina, ii aina, naaonjoaaincha. <sup>19</sup>Aihane jaun jiaonriha inae ii calaohineein caeteenera. Raujiaain ichei amihanenacaauru rijijieein caeteera ofa,” nareunni ofa raicha,’ naain jetao suujua ere nii cacha calaohi ocoala.

<sup>20</sup>Niritiin suujua irihane baiha bero cuhane cuhin jelaiha cauha cuha rai inaca loreri asaene jana jetaote, jaiti nita nihane jana coariin cairichaojoaain coaraane jaun, soroneein coinetein jetao que baluunetiin, jataain belain rae nii rai inaca.

<sup>21</sup>Nii jana jetaote: ‘Jataain banejelanaalane baaso ichaaun Cana Coanera aina, ii aina, naaonjoaaincha ofa. Aihane jaun jiaonriha ii calaohineein caeteenera ofa,’ nae jetao nii calaohi, rai inaca rai. <sup>22</sup>Nejetaote niritohane jana: ‘Chajaain erojoein cajione enachasine uhaain, caa rai cajione coreeuche. Chaen rai biji couturi que leinjiin anicho teein, rai tijia quene maajeein safato curuhacuche. <sup>23</sup>Chaen leinjiin baca narejeen coereneti soochete, lenoneein beseta ichacaache, <sup>24</sup>ohin nitajihane rai ne caje turuha uha caa canu calaohine jaun,’ naain jetao rai cachaauru letoae nii inaca.

<sup>25</sup>Nii tonohanau jetaote, neeuruha irihurune jaun nihane caje cauha uhe nii calaohi inana. Nii jana jetaote, inaan nenaanaja cainaane jana jetao, auno toteein raansaauruhane jana erunajae.

<sup>26</sup>Nii jaun jetaote, nii leinjiin acaauru cacha cotijiaain jetao: ‘Chatohanai besetate ichaquicheta,’ naain caje bajaane jana jetao, <sup>27</sup>‘Ii nejerate jerichanejeein raurohin turuhane jaun, baca narejeen coereneti soeratein beseta

ichae ii inacara,' naain rai biha nii acaauru cacha, nii calaohi inana raine jaun jetaote, <sup>28</sup>jataain obajeein loreri asaae turunaa jerene. Nii jana jetaote, raajenihane coineteen raa cue nii rai inaca, acaauru aina nihane coina.

<sup>29</sup>Nii jana jetaote, jataain rautaela-naala jetao: 'Iite raotojoein araai jaanacaain ichei nelateen nihanune coitucuhi. Chaen nechu canu letoaaine chabana cointelanaala ichaain neun. Nii sainejeein chariji bana leinjiin niiji carenero tihee carai, canuhacha belaihuri aina sohin beseta ichacaane coinata. <sup>30</sup>Nii saijieeinte turuha caa ii calaohi, ene cojoaeloroeerihuru aina nechu joareein ii coriqui jaoinne janate, rai baca coereneti sohin teeicha,' naa coetaain rai inaca raine jaun jetaote,

<sup>31</sup>'Aiha chuhisicha cacalabi. Iite chuhisi itolere bana canu aina neeicha. Nitohanihane jaunte satiin quicha sirii icheineen nera. <sup>32</sup>Nete laen ena esinae rauhijiriin caohachae beseta ichaain rachoojoihacachene, ohin nitajihane rai ne caje nacoaauneen turuha ii ocoalane jaunra,' nae jetao rai inaca," naain jetao acaauru relae Jesoso.

**"Caohachaaïn jecha ichareein," naain loreri beraichaanu que cacha ratiriha rai fatoroonne que *parabola***

**16** <sup>1</sup>Niritiin jetaote, aina nerelana-caauru rai jetao: "Niha jetao leinjiin cacha jataain coriquihonaneen. Nii jetaote, rai loreri beraichaanu que leinjiin cacha ratiri jitariin rai rucuhelleuru, rai cachaauru, rai coriqui, naaonjoaihunri beraichanu que. Nii jana nii rai rucuhelleuru itajihacoaane jaun jetaote: 'Inae ichujeleuru itajeein, ii coriqui que niicha jerei ichaa taa ii cachara,' naain jetao biha cuure nii fatoroon rai. <sup>2</sup>Nii jaun jetaote cotihara-

teen: 'Chatohanai ichaaine jaunna, ii biha uure canu rai. Chajaain jitariin chamijianeecuru cocoirichaain uhane coitucue. Inaen nenacaen nainiheei canu loreri aina canu rucuhelleuru beraichanu que neeneta,' nae jetao nii rai fatoroon.

<sup>3</sup>Nii jaun jetaote: 'Chana nohane jana ichareeun, camijianeon caje canu sitaa canu fatoroone jana. Coatiha atane que chatohanai amihanena ichana que nelatejeecaanne coaalanaalata. Chaen nechu jataain nocoejeeun cacha caje chaaelai bajaanune quera,' naain coaucane baiha jetao <sup>4</sup>'Saan. Inae canuhacha ichaneni coitucuhanu, canu amihaneon colane nedaanune bana canu raa chunocoha loreri asaane coina,' naain jetao suujua ere nii loreri beraichanu que niicha ratirii.

<sup>5</sup>Niritiin jetaote, leinjiana leinjianaain jetao, nii rai fatoroon que rebeona-caauru cotijiaain: 'Inaonjoaain rebeoqui canu fatoroon queta,' naain bajaane jana jetaote; <sup>6</sup>'Lefasha bareranei erene que ne rebeconra,' naain jetao tonorae nii jauriaanejeein niicha cotijiai. Nii jaun jetaote: 'Saan, aihachuhisi. Nocoa nii rebeoquine jaan, ninu nelauriaain saquichoonca bareranejeeicha laenaaura,' naane baiha jetao, <sup>7</sup>Leeocha cacha rai jetao: 'Inaonjoaain jana rebeoqui ii, canu fatoroon queta,' naain bajaane jana jetaote: 'Lefashai costaronei tirico quene rebeconra,' naain tonoraane jaun jetaote: 'Saan, aihachuhisi. Nocoa nii ii rebe. Fosachoona costaronejeeicha cau teen laenaunra,' nae jetao rai.

<sup>8</sup>Nitohaneen jetaote, jataain nainaan rai caohachanuhacha que coacuhin ichaa nii rai loreri beraichane que nainae nii rai fatoroon.

Nitohaneente Cana Coanera Cojoanona que neenihuru amurijiriin,

jataain nainain rai caohachanuhacha que coacuhin neeure Cana Coaunera coitucuhichuru,” naane baiha jetaote:

<sup>9</sup>“Inara netonoaite nii rijijieein Cana Coaunera tenojoi beraichaneein neeiche. Aihane jaun nii itolere inara rai Cana Coauneraacha teei que, aca jerihane rijijieein niicha jerei ichaain neeuche, inae ohichene bana niha raotojoein inara raeranune coina.

<sup>10</sup>Nitohanihane jaun, aansijiin laojoiri raa cachane niha natiin caohachaaain nii rai teraacha jerei icharate, arajiin cha raane jerichanejeein caohachaaain ichareein.

<sup>11</sup>Nitohanihane jaun, caa nitajerai nena chauratane que cha siriin neeichene nihanatiin caohachaaain ichaeneeichene coatilha nerinaai inara rai esinaen rauhijiriin chabana nitajenaacharanejeein nena tera.

<sup>12</sup>Aihane jaun, inara rai eroraqui tenojoi que caohachaaain cha ichaain neneeichene, coatilha nerihaaain inara rainein neeninu tera.

<sup>13</sup>Nihei chuni coroatajai fatoroon rai niicha latei icharanein nena nainei, nabana leeocha que jaolecuhin, leeochaacha ere tonorana nainihane jaun. Nitohanihane jaun Cana Coauneraacha ere tonoraain nena jerichaane, nii canaacha jerei que coauna nainihaaca,” nae jetao aina nerelanacaauru rai Jesoso.

<sup>14</sup>Niritoha Jesosone jana aonajeein jetaote, Jesoso necoeje chanuure fariseecuru, acaauru jataain coriquiicha que coacuhin neeuruhane jaun. <sup>15</sup>Nii jaun jetaote, “Inarate caohacha ichaa nocoetiin neeiche itolere bana cachaauru notaracaa. Nete inara suujua cuhane inaraacha coacui coitucue Cana Coaunera. Nitohanein jataain nelateineein cachaauruhacha coarai que te jaoleque Cana Coaunera.

**Cana Coaunera rai rauhi inoaensi aina  
Jesosohacha tei rai cojoanonaa**

<sup>16</sup>Moisesa, chaen *profetacuru*, naaonjoainuri cojoanonaate turuha

Joaan Baotisitane que tiaaajoaain nelu. Nii caje coauneeinte beebejenojoneein nelu Cana Coaunera cojoanonaa canuhacha turuai. Nii quete necounujueure nii canuhacha teei Cojoanonaa sirichuruhane coina.

<sup>17</sup>Canu Cojoanonaa que neeichene nihanatiin satiin Cana Coaunera rai rauhi inoaensi tonoraain neeichenete caohachae.

**Comasai joaera que cacha relaa Jesosone  
(Mt 19.1-12; Mr 10.1-12)**

<sup>18</sup>Leinjiin cacha rai comasai jaohin leeocha ene raanete jataain osa que nesaruha aicheein. Jerichanejeein techu, lana joaera ene raain niha cachane osa que nesauruha aicheein.

**Jataain coriquihona aina oha  
cairichanein nena Lasarone**

<sup>19</sup>Niha jetao leinjiin cacha jataain coriquihonanein. Nitohanein coriquihocane jaun jetaote, itolere bana jataain cajione caohacha que necoreetein, lenone caohacha nejesina que beseta ichanajaque. <sup>20</sup>Nii jana jetaote, ecu ne jaberoco nainecojoaain abero siriin leinjiin cairicheinejeein nena Lasaro. Aca jetaote, nii coriquihona loreri chajeniha lauheque nejesinane atanichoae. <sup>21</sup>Nitohanein cairicheinejeein nihane jaun jetaote, nii coriquihona rori caje nalunaa rai lenone coniraain que lenonena jere nii cairichei. Nii jana remaaecuru jetaote, rohan turuhacoaain nii rai nabero lojoihure.

<sup>22</sup>Nitohaneinne baiha inae oha nii cairicheinejeein nena- nii Lasarone jana jetaote, amaaure anjeraauru Abaraaun aina dedeeu nihane coina. Nii jana jetaote, nii coriquihona netonai inae ohane jaun conautecure.

<sup>23</sup>Nitohanein ohin necairichaauruha onacaaurune jaan netiin necairichajeein, nita icharajeriin neein Abaraaun

coaraa nii coriquihonane jana jetaote, Abaraaun rohan ne nii jaiti jiniiquiin ichaauruhane bana niicha cairichaerii Lasaro. <sup>24</sup>Nii jaun jetaote: auhaquiin: ‘Cairichaaajoaain cacoharaaura ofa Abaraaun. Atiin nii Lasaro rai aitoote, esinaeca que biji coturi macohin setejiaain calele jelaroaa uhinera. Caune jataain necairichajeeun usi tabai janara,’ naane jana jetaote: <sup>25</sup>‘Aiha chuhisi niqui. Nete jiniiquiin inara jaberoconeein ichaohichene bana, jataain raotojoei ichaonaa que ichaore-jetohilura cacalabi. Nii jana caa Lasarote, jataain ichaonaa baaso que ichaohin cairicheinejeein nerejetelu. Nii jaunte nii coacuhin, necairichaaequi iine jana, aca caohachaain ranojoneein nera. <sup>26</sup>Nii choae tacaain techu, cana cataaun ne jataain ucuacaain ucuha jachu satonoelanaalara. Nii jaun nii inara nichae situnaa nainecuruhi cajicheique nenacaauru. Niheichu inara niha natiin nii cajicheique turunaa nainiheicheta,’ nae jetao Abaraaun, nii coriquihona onaa rai.

<sup>27</sup>Niritoha raine jaun jetaote: ‘Nii jaunne ichi aitoon, canu inaca loreri asaae <sup>28</sup>nii neeuruha saoquii canu nejeraaurune jaaun Lasaro letohaine, acaauru rai iriha cuhane coina. Nabana caa necairichaecaanne jaaun acaauru netonai uuruhane coataara, ofa Abaraaun,’ naa nii coriquihonane jana jetaote; <sup>29</sup>‘Nete Moisesa aina *profetacuruhacha* laenanohin siriin neure, nii tonoraain neuruhinera,’ naa Abaraaunne jana jetaote; <sup>30</sup>‘Aiha chuhisicha ofa Abaraaun. Nete acaauru rene ichanaain turuhin biha leinjiin onaane, acaauru netonai nii esenetana nainecururera,’ naa nii coriquihonane jana jetaote; <sup>31</sup>‘Aiha chuhisi niqui. Nete Moisesa, chaen *profetacuru*, naaonjoainuri esenetaaurenihalune

rijijieein, acaauru rene ichanaain tururuha onacaaurune nihanatiin, esenetana nainecururera,’ naain tonorae Abaraaun,” naain jetao fariseo-curu suujuate Jesoso.

**Jataain necohalajiine osa que namute cache saruera**  
(Mt 18.6-7, 21-22; Mr 9.42)

**17** <sup>1</sup>Niritiin jetaote: “Itolere banate nereein osa que inara sarueranu. Nete laen jataain necairichanaa coareein nii osa que leeochoauru saruera cache. <sup>2</sup>Nitohaneein caa ena Cana Coaunera coitucuhajeraauru sarueratiha osa quene ajinihate caohachare nulunoque ajeri tijichaain cucuana cuhane joeratenojoi nihane. Aihane jaun nii que necohalajiin neeuche.

<sup>3</sup>Chatohaneein baaso ichaain niha ii nejerane suujua teeu. Suujua teeine jana ii ere tonoraain caohachaain nichao coreein cuhane que ii suujua acateeu. <sup>4</sup>Lejiichoo nihane caaunsi saneein ichi baaso ichaain nihane nihanatiin, caaunsi saneein turuhin, ‘Inae laen coaiterihaaunnita,’ naa uhane, que ii suujua acateeu,” nae jetao Jesoso.

**Esinae rauhijiriin esenetaacane itolere ichana nainichaane**

<sup>5</sup>Nii jana jetaote: “Jataain itolere ichana nainiha Cana Coaunerane esenetaain nihacaunne jaanu teeu canacaanu raicha,” naauruha Jesoso rai niicha cocoainaauri afosotoorune jaun jetaote:

<sup>6</sup>“Mosatasa uchu laojiori jataain aansijieein nenea rijijieein aasaeriin esinae rauhijiriin esenetaachenete caa shabeento rai: ‘Niilai caje nerocohin caa cucuana cuhane omaronihunra,’ naaiche caa shabeento raine inara ere tonoraain aiche caa shabeentora,” naain jetao acaauru tonorae Jesoso.

### Letononeein nenaacha ichaneni

<sup>7</sup>Niritiin jetaote: “Inara leinjiin cachaaquichene jana, inara ocoana jana temule jaane jaanu que atane retuhin, baca beraain, naonjoanne caje cauhane janate rai: ‘Nelauriaaute lenoneei,’ nanaa coacuhelanaala: <sup>8</sup>‘Chajaain ena canu lenonenu jaain, ena uhaaune lenoneein acau coe. Nii baihate ii netonai lenoneein acau coriquincha,’ nariquiche. <sup>9</sup>Nii choae tacaain techu, ‘Narihara,’ nanaa coitucuneeiche nii inara cacha rai, letoaain neeichene jaan ichaain nihane coreniha. <sup>10</sup>Nii rijijieein inara letoaain niha Cana Coaunerane jaan nainaaain neeichene bana, nainiheeiche: ‘Jataain cacha caohacha neeine nihacaanura’ naain erena nainiheeiche. Raujiaain: ‘Canacaanu letoaain nihalune jaanchane inae nainacaanura,’ naauche,” nae jetao acaauru rai Jesoso.

### Lechoocaaain cosibi aonaain caun cunaitenacaauru rautaa Jesosone

<sup>11</sup>Jerosaleeun cuhane jaun jetaote, Calileea, Samaria, naonjoainuri batane cataaun situhin cue Jesoso. <sup>12</sup>Nii jana jetaote, leinjiin neseu turuhane jana jetao, nii nese caje que taca cuure lechooncaain cosibi caun cunaitenacaauru cachaauru. Nitohaneein cuhin jetaote, cocoaeraa cacha rohan turuha nitohanai cunai aonaera cachane jaun jetao, Jesoso caje coriaae netiin:

<sup>13</sup>“Cairichaojoaain nohane canacaanu coaraaura cacha relaera Jesoso,” naaunre jetao Jesoso rai ehequiin. <sup>14</sup>Niritocuruha raine jana jetaote:

“Chajaaincha saseredotecuru rene turunichuchete inara coaracurumiincha,” naa acaauru rai Jesosone jaun, cuujueeuruhane jana jetaote,

inaen cosibi caje nerautaaain somaraain neeure, acaauru dadaelanaala aitoha Jesosone saijieein. <sup>15</sup>Inae nitohaneein nerautaaauruha acaauru cosibi cajene coaraain jetaote, jelaiha nejenohin cuhin, tonijiaain ereein Cana Coaunera coroaajeein jetao, <sup>16</sup>Jesoso acatiha rai tijia asae atanichoae neseoriaain jetao, rachoojoe leinjiin cacha Samaria cocoaicha Jorionelanaana nena. <sup>17</sup>Nii jaun jetaote:

“Tajian lechooncaauruhani caa cosibi caje nerautanacaaurune. Aancaauru chaen leeochoauru iscoon neeurita.

<sup>18</sup>Leinjiin caa Jorionelanaala nena cacha estaraajerohachate jelaiha nejenohin Cana Coaunera coroaeca uhe rautaanune corenihara,” naain

<sup>19</sup>“Esinae rauhijiriin esenetaaine jaunte, ii cunai caje nerautaa, chajaain nimichuhin caunihura,” nae jetao rai Jesoso.

### Naonjoaain tururichaaain quiicha tei Cana Coaunera Cojoanonaane

(Mt 24.23-28, 36-41)

<sup>20</sup>Nii baiha jetaote, “Chabana turureein Cana Coaunera cojononaa,” naain jetao Jesoso caje bajaure fariseecuru.

<sup>21</sup>Nii jaun jetaote: “Coatiha inanacaain tururinaain Cana Coaunera cojoanona. Niheichu, ‘Caute ne. Tajihate ne,’ naain coitucurieeicheein. Inaen inara jana niha quiicha tei Cana Coaunera Cojoanona,” nae jetao acaauru rai Jesoso.

<sup>22</sup>Niritohane baiha jetaote, aina nerelanacaauru rai jetao: “Inae amuhane baihate jaiti nacoauneein turuenihanune ajiniha le janojoeinniji ena caa canuhacha tei janonaa coarana jereriquicheein niqui, nete coaraeneriquicheein. <sup>23</sup>Nii jana tabaaurute inara rai, ‘Caute ne. Tajihate ne,’ naaurureein.

Nete nelatene, niritocuruhane jana acaauru esenetaain acaauru sacuhichene. <sup>24</sup>Nacoauneein turuha urichaaunni acaihaniji cachaneein nejanohanaane Cojoanona que turuhane banate, charijijeein teeinti jeraneejoaain dede conaa jiacanone, saain coanojoneein ne. Nii rijijieeinte saain coanojoneein coitunojoiniha cureein inae nacoauneein turuhanune bana. <sup>25</sup>Nete amuhanune ajiniha jauriaanejeein jataain canu que nererojoecaain canu que jaolecooru-reein, caa ena cojoanona que nenacaauru cachaauru.

<sup>26</sup>Charijieein teeinte nihalu Nohene bana ailu, nii rijijieeinte jerichanejeein aiha cureein nacoauneein turuha uhanu canu acaihaniji Cachaneein nejanohanune Cojoanona que tihane bana.

<sup>27</sup>Coaracuche nachuhinti nii chaque nererojoecaeriin nelanaala, nisiriha-teen, lenoneein, acau cohin, naaonjoaauruhalu cachaauru bote kuhane enohin nichotiha Nohene cojoanona que turuhanereein tiaaine. Nii jana uha elo tabaine jaunte satiin ohacoaurelu.

<sup>28</sup>Nii rijijieein techu cha coacuelanaala raotojoein neein, acau cohin, lenoneein, netemulijiaain, namihaaneeo que necoreteein, niicha latei coreteein, neloheriteein, naaonjoaurelu cachaauru nihalu Lotone bana. <sup>29</sup>Nii jana, Sodoma neseu ichaohane caje amuha Lotone janate, usi aina naluha asofere dede cajene jaun caaun satiin oorelu cachaauru. <sup>30</sup>Nii rijijieeinte jerichanejeein aiha cureein nacoauneein turuha uhanu acaihaniji cachaneein nejanohanaa nichaaunne Cojoanona que turuhane bana,” naain jetaote,

<sup>31</sup>“Nii cojoanona bana inara loreri janori ichoae neeichene, jiaonriha

jelaiha fauhin inara loreri caje inara rucuhele ranaa coaaquichene. Niheichu inara ocoana jana neeichene jana aihane, inara loreri asaa caunaa coacuelanaala rauhijiriincha sorooche. <sup>32</sup>Nitohanihane jaun, niicha ratirii coaucane jaun aihalu Loto comasaine coacuhin nainaan ichaaoche. <sup>33</sup>Aihane jaun rai rucuheleuru queecha coacuhin neite rai nichao itajereein. Jana nii rucuhele que coacuelanaala nichao rainuhachaque coacuhin neite nichote-reein,” naain jetaote,

<sup>34</sup>“Nii airichaaainne cojoanotiin banate, leinjiin eruhari kuhane niha cuurureein coroatajai cachaauru. Nii jana leinjiin amanojoinihane janate, ecu nedaa cureein leeocho. <sup>35</sup>Jana coroatajai enecurute, ederi que chaelai tutuurureein. Nii jana leinjiin amanojoinihane janate ecu nedareein leeocho.

<sup>36</sup>Nii jana coroatajai quichaaurute nocohana jana neurureein. Leinjiinte amanojoinereein, leeochoate ratirino-joinereein,” naane jana jetaote:

<sup>37</sup>“Chatoanai bana, chucha nitohane-reeinte Curuaanaa,” naain caje bajaauruhane jaun jetaote:

“Inae ecu tihane banate coitucuno-joinereein, canii setu que fauha uha ichtarine jana caje coaraain coitucuno-joinihane rijijieein,” nae jetao aina nerelanacaauru rai Jesoso.

**Joesio necha ansaineein nenea rai cachacoulurujia autanane que parabola**

**18** <sup>1</sup>Coiinteerilanaala Cana Coaunera bajaauruhane, Cana Coaunera bajaauruhane caina *parabola* que cuaain acaauru relaa Jesosone.

<sup>2</sup>Niritiin jetaote: “Coaracuchena-chuhinti leinjiin neseu nihalu jetao leinjiin joesio cachaauru que suujua acatelanaala, niheichu Cana Coaunera batohane que casilanaala nenea ne. <sup>3</sup>Nii

jana jetao, nii neseu ichoae leinjiin autana. Nii autana jetaote, nii joesio rai leinjiin cache nejeratenaja colurujiha cue. <sup>4</sup>Nii jana jetaote, carajaain nirijieein nere tonorana jerelanaala ne nii joesio. Nejetaote nii baiha: ‘Cachaauru que nihanatiin casuujua acateein, niheichu Cana Coaunera batocooaunne que casiin nihaaun niqui. <sup>5</sup>Nena raotojoeein nihanune rohecaain, casuujua rohecaain sacuha caa autanane coataa naitoonjoa tonoraain ichareeun caihanihane caina,’ nae nii joesio. <sup>6</sup>Coaracuchenachuhinti, jataain necha aansainein nihane saijieein suujua coaraa nii joesione. <sup>7</sup>Nii jaunte nii amurijiriin, nii janijiin nii raauri, janotiinetojoein, jiichoonetojoein, naonjoaain bajaabajaeraauro cocooaeratenaa nainereein Cana Coaunera. <sup>8</sup>Nitohaneeinte carajaain cohacuruhane latelanaala enaacha acaauru cocooaerater. Nena laen inara caje bajaauru, canu inaraacha cohajei cachanein nejanohanaa nichaaunne, nacoaunein turuhanune reeintiaainacha canunein nihanune esenetaain caitoonjoa ichaaechajeein neeururichaain cachaauru,” naain jetao acaauru relae Jesoso.

**Roma rai coriqui bajaaurera aina fariseeocuru que *parabola* que cuaain cache relae Jesosone**

<sup>9</sup>Nii baiha jetaote, nii acaauruhacha caohachaain niha nocoetiin leeochoaauru que jaoleconacaauru rai jetao, acaauru ichaohacha que *parabola* que cuaain jetao: <sup>10</sup>“Coroatajai cache jetaote, Teenforo asae cuhin Cana Coaunera baja cuure. Leinjiin jetaote, nechu jataain naraaichuru cairichaa Roma rai *impoestonu* que coriqui bajaerane. Jana leeochoa jetaote fariseeone. <sup>11</sup>Nii fariseeo jetaote, ‘Narihara Cana Coaunera

ichoreniha ainacaauru tocohanein asijaautoneein, necha aansainein ichaohin, joareein ene canu sinijeranelanaala nenea aina ichaohin, naonjoaain nenihanu canune coreniha. Chaen nechu, naraaichuru cairichaa Roma rai *impoestonu* que coriqui bajaaurera rijijieein neneun. <sup>12</sup>Chaen nechu, jataain ii coitucuhanune esenetaaine caina, le semanacuru cuhane coroata saain casuri couu lenone lanaala neein ii bajaee bajajeein, lechooncaain chaaelai raanu camijiane corenihane, rai lechoocani teein neein ii raicha,’ naain jetao Cana Coaunera bajaee chujuhequii. <sup>13</sup>Nii jana nii naraaichuru cairichaeriin coriqui bajaera jetaote, caje icharaain neein necoeje caaun najabaracaain dede coaraelanaala jetao: ‘Cairichaaajoaain cacoaraau osaaotohanune jaaura Cana Coaunera,’ nae nalariija faone faoneein. <sup>14</sup>Niritiin bajaane jaunte, inae que suujua acatiha Cana Coaunerae jana jelaiha nenajaun cauha cue nii naraaichuru cairichaa coriqui bajaera. Nete laen nii fariseeo que suujua acatene Cana Coaunera.

Nitohaneeinte nii leeochoaauru amurijiriin Cana Coaunera coitucutiin, itolere que nelaetoha nocoetiin nenacaaurute chaque nelatelanaala jaoleneein neeurureein. Jana rai nichao coitucuhin leeochoaauru amurijiriin nenea coacuelanaala nenacaaurute nelatein ranojoinecurureein,” nae.

**Canaanaihuru belaiha Jesosone**  
(Mt 19.13-15; Mr 10.13-16)

<sup>15</sup>Jesoso rene canaanaihuru turuaa uuruha acaauru mucuhane coinane jana jetaote, Jesoso rene turuanajaauruhane caohateure aina nerelanacaauru. <sup>16</sup>Nii jaun jetaote, nii aina nerelanacaauru cotijaain jetao:



“Coa rohecanajaachete canu rene turuuruhe nii canaanainuru. Jiaonriha canu rene turuuruha canaanaihurune caohateechenera. Cana Coaunera Cojoanonaate, aihuruha caa canaanaihurune rijijieein nenacaauru rainein nenea nera. <sup>17</sup>Esinaen rauhijiriine inara rai aitoreeunni. Aihuruha caa canaanaaihurune rijijieein canu raain neniha chunine, coatiha Cana Coaunera Cojoanona que nerihaain,” nae jetao aina nerelana-caauru rai Jesuso.

**Jesoso aina iriha leinjiin  
cacha coriquihonane  
(Mt 19.16-30; Mr 10.17-31)**

<sup>18</sup>Leinjiin cocoinanacai jetaote, Jesoso aina iriha uhe. Nitohaneein rene turuhin jetaote:

“Caohachanejei cacha relaera, cha ichareeun chariji bana nitajenaachara ichaonaa caohacha que ichaonaa nainichaauinne coina,” naain Jesoso caje bajaane jana jetaote;

<sup>19</sup>“Chanuna ‘caohachanejei cacha relaera,’ naain cacurujuateei. Leinjiin Cana Coauneraachate caohachanejeein ne,” naain jetaote: <sup>20</sup>“Inae raotojoein Moisesa aitoonjoan coitucuhi: ‘Jiaonriha nejelau ene ii sinijeranelanaala nenea aina ichaohin neeine. Coa sonajain jaoha. Coa asijiauha. Coa chamute cacha cairichanaa jerenacaun chuni cacha coacuhin, casaje que ereein niha. Chaen efojiaraauru que ii suujua acateein acaauru coitucuhin neeun,’ naane coitucuhi,” naa rai Jesusone jaun jetaote:

<sup>21</sup>“Aihanu chujian. Canu enamanaca caje coauneeinne jitariin nii naitoonjoan tonoraain neeun,” naain tonoraa nii cocoinanacaine jaun jetaote:

<sup>22</sup>“Aihachuhisi niqui. Nete jaiti lanajejen leinjiin tonoraain ichaaine

coina. Jitariin nii iicha sirii rucuhele que necoreteein, cairicheihuru rai jitariin nii coriqui chaluu. Nii banate dedeeu ichaonaa caohacha que ichaonaa naineriquiin. Nitohaneein ichaaine baiha canu aina uu,” nae jetao rai Jesuso.

<sup>23</sup>Nejetaote niritoha rai Jesusone jaun, jataain inaderae nii cacha jataain coriquihocane jaun.

<sup>24</sup>Nii jaun jetaote:

“Jataainte caaintate Cana Coaunera Cojoanona que ichaoo leinjiin coriquihonane. <sup>25</sup>Nii Cana Coaunera Cojoanona que ichaauru coriquihonacaaurune coina caaintaane fautaain caaintarihei leinjiin camecho rai oco jachu cuhane situhane coina,” nae jetao inaderaa nii coriquihonane coaraain Jesoso.

<sup>26</sup>Nii jaun jetaote:

“Nitohanihane nichotena nainerinaain chuni,” naain caje bajaauruha ecu neein aonajeunrerane jaun jetaote,

<sup>27</sup>“Nii caaintatiin cachaauruhacha coarai, coatiha Cana Coaunera rai caaintajiehita,” naa Jesusone jaun jetaote,

<sup>28</sup>“Canacaanune jitariin canacaanuhacha sirii ratiriin ii sacuhacaanulu,” naa Fedorone jaun jetaote:

<sup>29</sup>“Esinae rauhijiriin chunocoha, Cana Coaunera Cojoanona que ichaohane coina, rai loreri, rai sinijera, rai bereecuru, rai nejeraauru, rai fojiaraauru, naaonjoin ratirichate, <sup>30</sup>jataain nii amuritoheriin caa chauratane que siriiin, nii choae tacaain nii turuha uheni Cana Coaunera Cojoanona que chariji bana nitajenaachara ichaonaa siricheeincha,” naain jetao Fedoro tonorae Jesuso.

**Orichaaianne bihane  
nichatasatiha Jesusone  
(Mt 20.17-19; Mr 10.32-34)**

<sup>31</sup>Nii baiha jetaote, jelai nii lechoonca coroatajaain niicha cocoinaauri

cotijiaain jetao: “Enate laen Jerosaleeun cuhacache, cuu nii acaihaniji Cachaneein nejanohanaa nichaaunne que aitiin laenacuruhalu satiin *profetacurune* nainaanune coina.

<sup>32</sup>Nitohaneente nejelau ataneu nenacaauru estaraanjerooru bijihu canu teeurureein nechu jataain cacotaiha baasoneein caeteen, canu nocoeje chanuhin, canu coluneein, naaonjoaauruhane coina. <sup>33</sup>Nitohaneein canu teeinte, enuha que canu faohacuruhane baiha canu ateinaa cuurureein. Nena nichata janohane cuhane nacoauneein ichanaareunni,” nae jetao niicha cocoinaauri rai Jesoso.

<sup>34</sup>Nii niritoha acaauru raine jana jetaote, nii naitoonjoan aonacuruhane saijieein esenetana nainecurene.

#### **Jericoo leinjiin maosa rautaa Jesosone**

(Mt 20.29-34; Mr 10.46-52)

<sup>35</sup>Niritohane baiha jelai caje amuhin Jericoo turue lalajeein cuujiha Jesosone jana jetaote, bero cuhane lauhequiin coriqui bajaa niha leinjiin maosane jaun jetao, <sup>36</sup>arajiin situha cachane aonaain jetao: “Chaaauruna toon situha cue,” naain bajaane jana jetaote: <sup>37</sup>“Nasarete cocoaicha Jesusote sacuureraaura cachaauru aina situha cuera,” naain beeuruhane jaun jetao: <sup>38</sup>“Atiin nohane cairichaaajoaain cacoharaaura Rabiri nefoerate Jesoso,” naa ehequiin nii maosane jaun jetao, <sup>39</sup>niritohane caohateeure sitonaane coina nii ichohai-chaniha cunacaauru. Nejetaote, acaauru ere tonoraelanaala jeelai amuritoheriin ehequiin jetao:

“Atiin nohane cairichaaajoaain cacoharaaura Rabiri nefoerate Jesoso,” nae jetao nii maosa.

<sup>40</sup>Nii jaun jetaote, ecu inacuhin raerateen jetao inae rohan nichuutaane jana jetao:

<sup>41</sup>“Chate jereeita,” naain caje bajaa Jesosone jana jetao:

“Canota rautainene jereeurra Curuaanaa,” naain tonorraa nii maosane jaun jetaote,

<sup>42</sup>“Saana ai. Esinae rauhijiriin quesene-taine jaunte inae maosaneeine caje nerautaaiha,” nae jetao rai Jesoso.

<sup>43</sup>Niritoha rai Jesosone rijieeoritiin maosanihane caje inae conoha rai notane jaun jetaote, Cana Coaunera corojeein Jesoso sacue nii maosa.

Nitohanein nii maosa rautaane jana, ecu neein coarajeeurera cachaaauru netonai jetaote, satiin Cana Coaunera corojeein rachoojoeure.

#### **Saqueeo loreri asae cuha Jesosone**

**19** <sup>1</sup>Jericoo turuhin jetaote, nii Jerico nese cataaun situha cue jetao Jesoso. <sup>2</sup>Nii jana jetaote, ecu ichoae leinjiin cache, naraichuru Jorioocuru cairichaeriin nena, Roma curuaanaa rai *impoestonu* que coriqui bajaaurera curuaanaaneein nena coriquihona Saqueeo. <sup>3</sup>Aca jetaote, jataain Jesoso coitucunaa jerihane jaun coana jere niqui. Nejetaote, jataain araaicha cachane jaun coana nainesine Saqueeo, leeochoauru fautaain ecoainijihane jaun. <sup>4</sup>Nii jaun jetaote, coana nainihane coina soroneein najiniha cuhin jetao situha curichaaain nii Jesosone jaaun nena leinjiin enuha que iniin jetao cohaca cue. <sup>5</sup>Nii jana jetaote, nii iniin cohacane jaan nena enuha asae situha cuhane jaun, jabatoroain coaraain jetao:

“Saqueeo, chajaain soroneein niilai caje fauha uu. Enenene ii loreri asae nesurureunni,” naa rai Jesosone jaun jetaote, <sup>6</sup>soroneein nii enuha caje fauhin jetao, corojeein rai loreri asae Jesoso amae jetao nii Saqueeo. <sup>7</sup>Nii coaraain jetaote: “Chanuna jataain

osaaona niha taa cachane coitucuhane saijieein rai loreri asae aina nesuruha cue,” naain jetao Jesoso que ereeure ecu satiin neein coarajeeurera cachaauru.

<sup>8</sup>Niritiin Jesoso que ereeuruhane jana jetaote, nichaauraaain jetao:

“Aonaaun Curuaanaa. Jitariin quicha sirii rucuhelene leruhin tereeeunni cairichaaihuru rai. Chaen nechu chaaelai que chuni basijiauhin nihanune, jena saain jelai amuritoheriin cainareeunnicha,” nae jetao Jesoso rai nii Saqueeo.

<sup>9</sup>Nii jaun jetaote:

“Caa cache netonai inara rijijieein, Abaraauun nefoerateneein nihane jaunte, enene caa rai loreri asae turue jianacoon osa caje mitaeranura. <sup>10</sup>Nii acaihaniji cachaneein nejanohanaa nichaaunnena, caa chauratane que turuun, nii jaolecohichene jaan cachaauru nitajenaa neein nenacaauru ariin, acaauru ichoterateein raanune coina,” nae jetao rai Jesoso.

**Coriqui raaurera cachaauru que *parabola* que cuaain cachaauru relaa Jesosone (Mt 25.14-30)**

<sup>11</sup>Niritoha Jesosone jana, ecu neein aonajeeuruha cachaaaurune jaun jetaote, acaauru relae *parabola* que. Inae Jerosaleen rohan nichuuntaauruhane jaun, “Inae jerihane turuhelalajihia Cana Coaunera Cojoanonaara,” naain coaacuruhane jaun jetao acaauru rai:

<sup>12</sup>“Coaracuche jetao nihalu leinjiin cache *rey* araainein nenaane. Nii cache jetaote, *rey* ineen cocoinaauruhane coina jetao coriaji atane cue, inae *rey* ineen cocoinaauruhane jana jelaiha natane que cauha uhanne coina.

<sup>13</sup>Inae amuhane rai jetaote, lechooncaain rai letonocuru cotijiae, acaauru nainein jequiiin coriqui chaluhane coina. Nitohaneein acaauru cotijiaain

coriqui chaluhin jetaote: ‘Caa coriqui aina amihaneeuhe turuhanune reeintiaaincha,’ naain ratirinajae.

<sup>14</sup>Nejetaote, jataain que nerererojoe-caaure nii natane que nenacaauru cachaauru. Nii jaun jetaote, caaijie acaauru ere beranu que leinjiin letoaaure ‘Coatiha canacaanu curuaanaa *rey* ineen niha caa cachane jerihacaanuta,’ naa cuhane coina.

<sup>15</sup>Nejetaote nitohaneein nere bera letoaauruha caaijiene sajieein, *rey* ineen cocoinaauruhane jaun, *rey* ineen jelaiha natane que turuha uhe.

Inae nenajaun turuhin jetaote, nii letonocuru coriqui teein ratirihane jaaunru cotiharate, ‘Inaonjoaaincha canu coriqui joooure le cache cachaauruta,’ naain coitucuhane coina.

<sup>16</sup>Nii jana nii niicha cotiharatei ichoaichaniha rene turunaa jetaote: ‘Curuaanaa lechoonca saneeinte nefae ii coriqui,’ naa turuhinne jaun jetaote; <sup>17</sup>“Saan. Aihane jaun iite jataain caohati canu cachanein neei. Inae acaihaniji que caohacha ichaa caa coroatajaji coriqui ainane jaunne, lechooncai nese coaarunu que coberenadoroneein chetereeeunnicha,’ nae rai nii *rey*. <sup>18</sup>Nii jana leeochoa jetaote: ‘Curuaanaa, saoquii saainte nefae ii coriqui,’ naa turuhinne jana jetaote, <sup>19</sup>jerichanetojoeein: ‘Saan. Aihane jaun saoquii nese coaarunu que coberenadoroneeinte neriquiincha,’ nae jetao rai.

<sup>20-21</sup>Nii jana leeochoa jetaote: ‘Curuaanaa, nocoia ii coriqui. Jataain necha aansai cache neeine jaunne ii coasiha, cajione que conajaain cau rucujueun. Chaen chaelai teneeine nihanatiin, enaacha temunojoi taain raain, naonjoain neeine coitucuhanune jaun,’ naane jaun jetaote; <sup>22</sup>‘Ichaajenihanete ii ereecha que necouluruhequi canu cache baaso. Chanuna chaen, nii

chaelai tihanune que airijiin, enaacha temunojoi taain, raain, naaonjoaanune coitucuhi raotojoein inatiin, <sup>23</sup>baanco cuhane nii canu coriqui tiha cueneei, canu loreri asae turuhanune, jelai amuritoheriin carai cainaainerichaae, 'naain jetao, <sup>24</sup>nii ecu nenacaauru rai: 'Caje nii coriqui ruluhin, nii lechoonca saneein faera rai teuchera, 'naane jana jetaote: <sup>25</sup>'Curuaanaa, chanuna inae lechoonca saneein jelai amurijiriin sirihana natiin nacoaanein tenacare raita, 'naaunruha raine jaun jetaote: <sup>26</sup>'Inae inara rai aitocooaun, jataain siricha raite jeelai amuritoeriin terareein. Jana sirihai cajete, coroataja-jeein sirihane nihanatiin jitariin caje ruluherareein, 'naain jetaote: <sup>27</sup>'Chajaain chaen nii *rey* ineein nihanune jerelanaala caque nejeratena-caaauru uhaain cau canotaracaae teein sohin jaonajaauche, 'nae jetao nii *rey*, 'naain jetao cachaauru relae Jesuso.

#### Jerosaleen cuha Jesusone

(Mt 21.1-11; Mr 11.1-11; Jn 12.12-19)

<sup>28</sup>Niritohane baiha jetaote, Jerosaleen cunajaun, <sup>29</sup>nii Jerosaleen rohan ichuunejeein nenea ichatane ucuuno Olibo neeonjoain neein niicha curuateeuri rohan nenea Betafajee, Betania, naaonjoainu turuhin jetaote, coroatajaain aina nerelanacaauru rai:

<sup>30</sup>'Chajaain taa cana ajiniha nenea neseu cunichuche. Ecute cositeno-joinein teequi leinjiin boro chabana catcha amunajaniheine eruriquicheein. Chaen cajiha carai cosi rutuhin uhaauche. <sup>31</sup>Inae uhaaichene jana, 'Chanuna nii boro cosi rutuhin amaaiche, 'naa chunine, 'Cana Curuaanaate latihane jaun raeratera, 'naauche, 'naain jetao letoanajae Jesuso.

<sup>32</sup>Niritiin acaauru letoaa Jesusone jana, nii neseu cuuruhane jaun jetaote,

nii acaauru rai aitohane rijjijeein nii boro eruha cuure nii aina nerelana-caaauru. <sup>33</sup>Nitohaneein ecu turuhin, nii boro cosi rutuhajeeuruhane jana jetaote:

"Chanute nii boro cosi rutuhicheta, 'naa acaauru rai nerorane jaun jetao:

<sup>34</sup>"Cana Curuaanaate latihane jaun raeratera, 'naaure jetao rai.

<sup>35</sup>Nitohaneein cosi rutuhin jetaote, nii boro ichoae rai cajione teein jetao, Jesuso rene amaaure nichoae nelauriaain cuhane coina. <sup>36</sup>Nitohaneein nii boro amaaain Jesuso rene turuaauruhane jana jetaote, nichoae nelauriaain raotojoein cuujiha Jesusone jana jetao, najiniha bero cuhane rai cajione marirjiacoaure cachaauru.

<sup>37</sup>Inae Olibo neeonjoain bichatane ucuuno fauque cuujiha Jesusone jana jetaote, itolere cojoaelanaacojoai ichanajaaoncane coaranajaaoncuruhane jaun jetao, cojioriin Cana Coaunera coroaecure satiin nii sacuurera cachaauru.

<sup>38</sup>"Raotojoein turuhine aca neein nenea rijjijeein cocoinaain Cana Coaunera letono *Reycha*. Dedeeu raotojoein nihacachene coina icharanein nihane coitucuhin Cana Coaunera coroaecuruhine cachaauru, 'naauruha cachaaurune jana jetaote:

<sup>39</sup>"Cacha relaera, toon ii sacuurera cachaauru rai aitoote, toritocuruhane jianecurumiincha, 'naauruha nii cachaauru jana cunacaauru fariseeocuru tabaaurune jaun jetaote:

<sup>40</sup>"Esinae rauhijiriine aitoonra. Toritocuruhane caje inauheneecha neeuruhanete, cojiorichurureein caa ajerichurura, 'naain jetao tonoranajae Jesuso.

<sup>41</sup>Inae Jerosaleen rohan nichuutane jaun, inae inanacaa nii Jerosaleenne coaraane jaun jetaote, ecu nenacaauru

cachaauru coreniha chanaain jetao:

<sup>42</sup>“Bajjaana chuhinti caa janonaa cuhane jianacoon inara mitaeraanu que cau turuhanune coitucuhin neneeiche.

Nete quesenetaain canuneein nihanune coitucuhin coarana naineneeiche.

<sup>43</sup>Nitohaneeeichene jaunte, inaen nereein itolere neein inara curuhacaain inara corihateein, inara mucuhin niha nii nejerateein neeiche jaa cojoanonaara.

<sup>44</sup>Caa inara nese fejeainte itajein, inara cocoaichucuru soaajeein jaoha cuurureeincha. Coatiha nerinaain leinjiiniji ajeri ita choae teein ichanohita. Inara ichoterateein, jianacoon inara mitaeraanu que turuha uhanu inara Coauneraneinne jana canu esenetaain cacoitucunaa jereneeichene corenihara,” nae jetao inaderaain Jesoso.

#### Teenforo couluuoca Jesosone

(Mt 21.12-17; Mr 11.15-19; Jn 2.13-22)

<sup>45</sup>Inae Jerosaleen turuhin jetaote, Teenforo asae enohin, ecu necoretiha nenacaauru sitaain jetao:

<sup>46</sup>“Cana Coaunera Quiricha inoaensii cuhanete aite: ‘Canu lorerite nasae neein canu bajae bajaecuruhane jaan colohetine,’ naain. Nete necha aansai asijiautooru ucuhaneein teeiche inarara,” nae jetao nii cachaauru rai Jesoso.

<sup>47</sup>Nitohaneein cojoanoonetojoein Teenforo asae cuhin cachaauru relaa Jesosone jana jetaote, nechu jataain sohin jaaoruhane jaa lera ariha jetao, cuhin coaracure saseredote curuanaacuru, Cana Coaunera naitoonjoa que cache relaaureraauru, nii nese curuanaacuru, naaonjoainuri. <sup>48</sup>Nejetaote, nii chatohaneein teeuruhane jaan lera erusichurene, satiiin cachaauru jataain nii acaauru relaane jaa rautatiin aonajeunruhane jaun.

#### Nitohanai ichaane coina cocoainaain letononiha Jesosone (Mt 21.23-27; Mr 11.27-33)

**20** <sup>1</sup>Teenforo asae nosa caje nichoteeururichaain cachaaurune beebejeein, acaauru relaa Jesosone jana jetaote, turuha cuure saseredotecuru curuanaacuru, Cana Coaunera naitoonjoa que cache relaaureraauru, Joriocuru rai nelatein nenacaauru ichauhenaauru, naaonjoainuri. <sup>2</sup>Nitohaneein turuhin jetaote:

“Chatohanai cocoainanacaineina neei catohanai ichaaine coina. Chate catohanai ichaaine coina ii cocoainaain ii letoaaain neta,” naauruhane jaun jetaote:

<sup>3</sup>“Saan. Canuhetonaina inara caje leinjiin erenaa bajareeun catoonraaichene coina. <sup>4</sup>Cha Joaan letoaaain nelu cachaauru baotisaain cachaauru coujunacatiha uhane coina. Cana Coaunera letoaenihanena, cachaauruhanana letoaaain nihalu,” naain acaauru caje bajaa Jesosone jana jetaote, <sup>5</sup>ecu inauheneeicha aonajein jetao: “‘Cana Coaunera letononeeinte ailu,’ naacachenete: ‘Chanuna jana esenetaain tonoraain neneeichelu,’ nareein.

<sup>6</sup>Niheichu, ‘Cachaauru letononeeinte ailu,’ nanaa nainihaacache. Niritocoaachenete ajeri que cana bodoosiin cana sohin cana atinaaurureein cachaauru, satiiin Cana Coaunera letononeein aihalu Joanne esenetaauruhane jaun,” naain jetao, ecu nejesinajein ita rai ereerejeuruhane baiha jetao: <sup>7</sup>“Coatiha coitucuhaacaanu. Chachaainti cache baotisaain coujunacatiha Joanne coina letoaaain neluta,” naaure jetao.

<sup>8</sup>Nii jaun jetaote:

“Niheichu canuhetonai nihanatiin ‘Naaonjoainte canu cocoainaain nihane ainane, caa catohanai ichaauru,’ naain

benaa nainihaaun inara raita,” naain jetao acaauru tonorae Jesoso.

**Necha aansainein ichaonacaauru ocoana beraichacuru que *parabola* que cuaain cachaauru relaa Jesosone**  
(Mt 21.33-44; Mr 12.1-11)

<sup>9</sup>Niritohane baiha jetaote, necha aansainein ichaonacaauru ocoana beraihurera que *parabola* que cuaain jetao: “Leinjiin cacha jetaote, leinjiin ocoana sirihane jaun jetao, que amihanenacaauru rai tein ratiriin jetao, coriajai ataneu cue,latihane nainein rainein nenea letoaauruha raine coina.

<sup>10</sup>Nitohanein tein ratiriin jetaote, inaen tainaca que tihane jana jetao, leinjiin letono letoae, nii amihanenacaauru caje rainein niha nii ocoanane coreniha que banihatein niicha taihuri bajaa cuhane coina. Ne jetaote, nii cha telanaala faojaain sohin jelaiha letoaare. <sup>11</sup>Nii jaun jetaote, nacoaunein leeocho letono letoaa nii ocoana erorane jana jetao, nocoeje chanuhin faojaain sohin, cha colane acaentonai letoaare. <sup>12</sup>Nii jana coaiten leeocho letono letoaane jana jetaote, jataain cunaitaain jelai caje acaentonai sitaure nii ocoana que amihanenacaauru.

<sup>13</sup>Nii jaun jetaote: ‘Cha laen ichareeun. Satononejeein caa jataain jereein canuhacha belaa canu calaohi letoaanunete ne. Quete laen acaneein nihane coitucuhin raotojoein raain nere tonoraaururein,’ nae nii atane erora.

<sup>14</sup>Nejetaote niritiin nii rai calaohi letoaane jana jetao, cuujihane jana coariin: ‘Taate caa atane erora calaohi ne. Acate inae oha rai inacane bana, caa itolere que banijiaain nenea rareeincha. Coanete mucuhin sohin jaohacachete cana rainein nedaaine caa iolere que banijiaain nenaara,’ naain ita caje

bajaacoaain jetao, <sup>15</sup>nii ocoana caje amaain sohin jaaore nii ocoana que amihanenacaauru.

Nitohanihane jaun, tonaquiche jana nii que inara. Chatohaneeicha acaauru terein nii ocoana erora, nii rai calaohi mucuhin sohin jaaoruhane jaun.

<sup>16</sup>Raajenihane uhin inacha nii ocoana que amihanenacaauru sohin jaohin, leeochoaauru rai nii ocoana teriha nii ocoana erora,” naain jetao *parabola* que cuaain cachaauru rai ereerejeein relanajaen Jesoso.

Nii jana jetaote:

“Jiaonriha icharaa nitohaninera,” naaure jetao nii cachaauru.

<sup>17</sup>Nii jana jetaote, acaauru coarajeein jetao:

“Chaquena jana chaen, Cana Coaunera Quiricha inoaensi cuhane: ‘Nii jaolecooruha loreri icharaaurune jaan ajerite jauriaanejeein loreri nunuhenein ichanohinein niha cureeincha,’ nae.

<sup>18</sup>Aihana jaun chunocoha nii ajeri ichoae comoite, nichaluchaluriha cureein. Jana chunucoha ichoae comoha nii ajerinete jitohitorein,” naain jetao be cachaauru rai Jesoso.

<sup>19</sup>Niritiin acaauru que cuaain, cachaauru relaa Jesosone que nainacuruhane jaun jetaote, nii rijieoritiiin mucueratenea jerecure saseredotecuru curuaanaacuru aina Cana Coaunera aitoonjoan que cacha relaaaureraauru. Nejetaote chatohanein tenaa nainecurere cachaauru coasichuruhane jaun.

**Jesoso mucuuruhane jaan lera ariha Roma curuaanaa rai coriqui teeuruhane bajaauruhane**

(Mt 22.15-22; Mr 12.13-17)

<sup>20</sup>Nitohanein sohin jaonaa jerecuruhane jaun jetaote, acaauru letono letoaare, belaicha cacha

rijijieein turuhin Jesoso caje chaelai erenaa bajaauruhane jana, tonaain acaauru tonoraane nohaneein colurujueeuruha coberenadoro raine caina. <sup>21</sup>Nii jaun jetaote, rene turuhin:

“Cacha relaera, nii aitiin cachaauru relaaine jaane esinae rauhijiriin chuni que suujuelanaala, satiin cachaauru rai jerichanetojoeein aitohine coitucuhacaanu. Ite esinae rauhijiriin jeriha Cana Coaunerane rijijieein ichaoha cachane caina aitiin cachaauru relaai. <sup>22</sup>Nitohanihane jaunne ii caje bajaa uhacaanu. Caohachaana Romanocuru curuaanaa enferadoro rai *impoestonu* que coriqui tihacaanune,” naain jetao Jesoso caje bajaature.

<sup>23</sup>Nii jaun jetaote, nechujataain baasoneein coacuhin que iriha aitocuruhane que nainaane jaun jetao:

<sup>24</sup>“Saan. Canu que leinjiin nii coretequichene jaan coriqui coarateeeuche,” naane jana, que nii coriqui coarateeuruhane jana coaraain jetaote: “Cha cojunaca caa, ecu laenanohineein curuaa siriin,” naa Jesosone jaun jetaote: “Enferadoro rai,” naauruhane jaun jetao: <sup>25</sup>“Aihane jaun chujian- caa enferadoro rainein nena teeuche enferadoro raicha. Jana Cana Coaunera rainein nena teeuche Cana Coaunera raicha,” nae jetao nii cachaauru rai Jesoso.

<sup>26</sup>Niritoha satiin cachaauru notara-cae Jesosone jaun jetaote, nii chatohanein mucuhin teeuruhane jaa lera eruurenihane jaun jetao, ecuhacha cojoelatiin inauheneecha neure nii saseredotecuru letonocuru, niritiini acaauru tonoraane jaun.

**Chatohaniha cacha inae  
oo caje ichanaane**

(Mt 22.23-33; Mr 12.18-27)

<sup>27</sup>Nii baiha jetaote, Jesoso coaraa cuure nii ohane baiha jerichanejeein

jaberoco rijijieein niha cacha suujuene esenetaauruhi sadosseeocuru. Nitohanein cuhin rene turuhin jetaote:

<sup>28</sup>“Cacha relaera, Moisesate canacaanu rai laenaain ratirilu, oha leinjiin cacha nesiriateein nii comasai aina canaanai sirilanaalane, nii autana raain aina canaanai siriha rai ocoalane caina. Nitohanein nii autana aina canaanai siriha rai ocoalane caina. Nitohanein nii onaa calaohineein niha nii canaanaine caina. <sup>29</sup>Nii janate ita nejera nejesinaneein caaunsineein neure cachaauru. Jauriaanejeein acaauru inanate, leinjiin ene aina nesirihatein, nii leinjiin niji canaanai sirilanaala ohe. <sup>30-31</sup>Nii janate neeuruha coroatajaain rai nejeraaurune jaun, oha coaiten nii nihanane jaun nii ene rae nii rai nejera. Nii rijijieein techu satiin nii ene raure acaauru ocoalacuru itolere bana ooruh acaauru inanacurune jaun. Nete leinjiin niji canaanai sirilanaala oore nii caaunsineeuri ita nejeraauru. <sup>32</sup>Nii janate inae oohe nii ene netonai.

<sup>33</sup>Aihane jaun chariji comasainein jana nereein nii ene, inae Cana Coaunera Cojoanonaa que ichaauruhane bana, caaunsineeuri ita nejeraauru aina nisiriathalune jaun,” naain jetao Jesoso caje bajaature nii sadosseeocuru.

<sup>34</sup>Niritiini caje bajaauruhane jaun jetaote:

“Caa chauratane que nenacaauru quichaauru, enecuru, naaonjoainurite nisiriateein naaonjoaunre. <sup>35</sup>Nete laen inae ooruhane baiha oo caje ichanaain Cana Coaunera rene turuhenhuru quichaauru, enecuru, naaonjoainuri inae oo caje ichanacuruhane nisirihateeureneerein, <sup>36</sup>onaa inaaurenihana anjeraaurune rijijieein neeururichaainne jaun. Chaen techu Cana Coaunera Calahineein neeurureein acaauru ichatein nerichaaain Cana Coaunerane jaun. <sup>37</sup>Jerichanejeein

techu ohane baiha ichanaain neeuruha onacaaurune que laenaain coitucuerateein nelu cana que Moisesa, nii nuna laaojiri ihani netiin Cana Coaunera aina irihane bana, ‘Canune, Abaraaun, Isaca, Jacobo, naaonjoainuri Coaunera, inara Coaunera neein neeun,’ naalu Cana Coaunera Moisesa raine jaun. <sup>38</sup>Aihane jaun coatiha ichaonacaauruhacha Coaunera neein nihei Cana Coaunera, onacaauru nihanatiin rai ichaohin neeuruhane jaun,” naain jetao sadoseeocuru tonorae Jesuso.

<sup>39</sup>Niritoha sadoseeocuru rai Jesusone jana jetaote:

“Jataain caohatiinte acaauru rai aithicha cacha relaera,” naure jetao Cana Coaunera aitoonjoa que cacha relaaureaauru tabaauru, acaauru laen oo caje ichanaa cachane esenetaauruhane jaun.

<sup>40</sup>Niritoha acaauru rai Jesusone jaun jetaote, inae nenacaaen caje chatohanai bajaanaa nainecurene.

**“Cha caje nefoeratenaane Mesihasi,”  
naain bajaa Jesusone**

*(Mt 22.41-46; Mr 12.35-37)*

<sup>41</sup>Nii jana jetaote:

“Chanuna Rabiri caje nefoeratenaaniha canaacha cohajei Mesihazine jaun, Rabiri amurijiriin nena nainenihai beeiche. <sup>42</sup>Inasiina raajenhane, quiricha Salmo cuhane:

‘Cana Coaunerate,  
Canu Curuaana Mesihasi rai:  
“Cau carohan

canu raotono nichajai que  
nelauriaain coarajeuna,

<sup>43</sup>nii iniha nejeratenacaauru  
amuritiin,

ii bijihu tenajaanune reeintiaaicha,”  
naa Cana Coaunera, Canu Curuaana  
Mesihasi raicha,’ naain raajenhane Salmo  
cuhane bihalu Rabiri inatiin. Chanuna Rabiri  
amurijiriin nena nainenere Mesihasi.

<sup>44</sup>Inasiinna jana chaen amurijiriin nena

nainenihai Mesihazine saijjein nii Rabiri netonai, ‘Canu Curuaana,’ naain Mesihasi nichaaurune curuaatihalu natiin,” naain jetao bajae Jesuso.

**Cana Coaunera aitoonjoa que cacha  
relaaurea biha Jesusone**

*(Mt 23.1-36; Mr 12.38-40; Lc 11.37-54)*

<sup>45</sup>Niritohane jana satiin ecu neein aonajeuruha cachaaurune jana jetaote, aina nerelanacaauru rai jetao: <sup>46</sup>“Caohachaa inecohalajiin neeuche, caa Cana Coaunera aitoonjoa que cacha relaaureaauru que. Acaaurute acaauru que suujua acatena nainihai cachane jaan cocoajione jiaain, itolere coitucueraneein, caohachaa inihai nocoetocuruhane jaun, chunijihu nenaanaja cataaun nihanatiin, acaauru que suujua acatein niha satiin cachaaurune jereein neeure. Chaen techu, sinacoca asae nelauriaauruha jataain nelatenacaaurune jaan rori caohacha janijiin, nichoae ichoachaniha nelauriaaure. Chaen techu ichoachaniha nelaurianana jaan janijijin, lenone rohan nelaurihaain lenonecure. <sup>47</sup>Chaen techu cairichei autanaauru caje acaauru lorerichuru nihanatiin ruluhin naaonjoaauru. Nii choae tacaain techu nitohaneeuruhane jaun, jataain nohaniha Cana Coaunera coitucueraniha nocoetocuruha itolere amurijiriine jaun, satiin notaracaae Cana Coaunera bajaauruhane carajaain bajaure. Nitohaneeuruhane jaunte leeochoaauru osaaonacaauru cachaauru amurijiriin, jataain caseteco tabai coaraa cuurureein,” nae jetao aina nerelanacaauru rai Jesuso.

**Acaihaniji ichaaojihane jaanu  
coriqui tiha cairichei autanane**

*(Mr 12.41-44)*

**21** <sup>1</sup>Niritiin Teenforo asae coriqui coreniha Cana Coauneraacha icharatenohi amihananaa ichacuruhane



coina curu cuhane coriqui teeuruha cachaaaurune jana, ecu coarajenajaa Jesusone jana jetaote, <sup>2</sup>leinjiin autana jataain cairicheinejeein nenea netonai coroatajajein jataain coretelanaala nenea coriqui te, <sup>3</sup>jataain teeuruha leeochoaurune fautaaine jaun jetaote:

“Esinae rauhijiriine aitoon inara rai. Caa cairichei autanate, leeochoauru amuritoheriin coriqui te. <sup>4</sup>Satiin caa leeochoaurute nechu jataain inae acaauru rai cautecha teure. Jana caa autanate, jataain cairicheinejiha natiin jitariin acaihaniji ichaajojihane jaanu te,” nae jetao Jesoso.

**Nitajerichaain Teenforone biha Jesusone**  
(Mt 24.1-2; Mr 13.1-2)

<sup>5</sup>Nii jana jetaote, caohatiin ajeri caje ichanohiniha Teenforone coaraain, jataain caohatiin inanacaane coina, nasaae itolere niicha teuri coaraain jetao que ereerejeure cachaauru. Nii jana jetaote acaauru rai:

<sup>6</sup>“Caa ena ajeri caje caohatiin ichanohinein inaraacha coarajeite, inae ecu tihane bana fejeein itajenojoineerein,” nae jetao acaauru rai Jesoso.

**Nerichaain cojoelanaacojoaine biha Jesusone**

(Mt 24.3-28; Mr 13.3-23)

<sup>7</sup>Niritohane jaun jetaote:

“Cacha relaera, chabanacha aicheein nii chaitoonjoan. Chatohanai cojoelanaacojoaicha inae que turuhelalajihane jana coararichaanuhin,” naain jetao caje bajaure.

<sup>8</sup>Nii jaun jetaote: “Caohachaain nainaan necohalajiin neeuiche, inara coritaa chunine coataara. Inae nerichaain arajii canu niha nocoetiin inara coritaeraanuurura. Tabaaaurute: ‘Canune acaneeunra,’ naaureein. Jana tabaaaurute: ‘Inae taolu caitoonjoa

cojoanonaa que nihacachera,’ naauruha inara raine, jiaonriha esenetaain sacuna-jaaichenera. <sup>9</sup>Jiaonrihachu nejesina-neein ita sohin neeuruha satiin chauratane que nenacaauru cachaaaurune coitucuhin neeichene nihanatiin nesoonetohichenera. Nitohaneeinte jaiti nii cojoanonaa que turuenihane ajiniha aicheeincha. Nete nitohanihane nihanaatiin jaiti cana janonaa satono que turuheneereincha,” nae jetao Jesoso.

<sup>10</sup>Niritiin jetaote: “Leeocha atane que ichaonacaauru cachaaaurute, lauriu ichaonacaauru cachaauru aina ita cotaiha cuurureein. Jana leinjiin atane que ichaonacaauru cachaaaurute, leeocho atane que ichaonacaauru aina ita soorureein. <sup>11</sup>Nii janate itolere cana rai chauratane sacuritaain niha cureein jataain mijiaaaineein carora, mijitena, cunai, naajoainuri. Nii jana dede quete jataain coasinaacojoai coaraain, cojoelanaacojoai coaraa cuurureein cachaaaurura.

<sup>12</sup>Nete nii cojoanonaa que turuenihane ajiniha, inara rohecaain inara mucuhin sinacoca asae inara amaain, curuaanaacuru, chaen coberenadorocuru, naaonjoainuri acatiha inara tein inara cairichaain caresero cuhane inara enohaa cuurureein canu ere tonoraera neeichene corenihara. <sup>13</sup>Nitohaneein inara teeuruhane banate, canu nichaaunne coitucuerateriquicheein cachaauru quera. <sup>14</sup>Jiaonriha, ‘Tonaainera erereunta,’ naain inara jabereco coreniha ereeichene jaanu que coacuhin cuhiche inara amaauruhanene. <sup>15</sup>Canune jataain nainaan ecu ereeichene jaanu tereeeunni inara raicha. Nii bana nii tonaain inara tonoracuruhane jaanu coitucuhin neeururihaain nii inara aina nejeratenacaauruta. <sup>16-17</sup>Nete laen inara cairichaeriin inara

cotaairiin nenacaauru coroatajaniha cuurureein nechu jataain inara cairichaa, inara inacaauru, inara nejeraauru, inara araaichuru, inaraacha belaihuri, naaonjoainuricha. Nitohaneeinte inara tabaauru sohin jaoha cuurureein. Satiin caa chauratane que nenacaauru cachaurute Canu ere tonoraera neeichene coreniha inara que nererojoecaeriin, inara cairichaeriin, inara cotaairiin, naaonjoain neeureeinha. <sup>18</sup>Nete nii leinjiiniji inara couturiji nihanatiin nitajenereein. <sup>19</sup>Nii jaun caohachaain laraajiin nii inara suujua corelanaala, raotojoein neeuchete nii caje nichotenaa nainequiche.

<sup>20</sup>Inae Jerosaleen curuhacaain neeuruha soondaroorune coaraquichene, inae nitajerichaainne cojoanona que turuhane que nainacuche. <sup>21</sup>Inae nitohaneeuruhane coaraquichene, Jodea nenacaauru naain ichtatane ucuuno cuhin sorooruhine. Jana Jerosaleen nenacaauru, nii nese caje coriaae amuurumiiincha. Jana chunocoha rai nocoana jana nihane jana nitohanihane, jiaonriha jelaiha nii neseu turuha cunaa coaaucaanera.

<sup>22</sup>Inaen nitohanihane coina, niritiin inoalenlu quiricha inoansi cuhane satiin laenacuruhane jaa cojoanona nainaane coina jataain caseteco tabai niha curichaaaine jaunra. <sup>23</sup>Jataainte cairichaaajoaa cuurureein nii cojoanona bana ausirineein nenacaauru enecurua, chaen sisiajeein canaanai siriin nenacaauru, naaonjoainuricha. Nitohaneeinte caseteco tabai coaraa cuurureein nii Jodea batane que nena aina Jerosaleen ichaonacaauru cachaurura. <sup>24</sup>Tabaaurute sabere que sohin jaonjoiniha cuureeinha. Jana tabaaurute mucunojoinnein corihaji ataneeuru amanojoi-

niha cuurureein. Nitohaneeinte Cana Coanera coitucuhichuru, nii Jerosaleen nenacaauru itajihua cuurureein caohate-nojoiniha nitohanei ichacuruhane jaan que turuhanereein tihaincha,” nae jetao aina nerelanacaauru rai Jesoso.

**Nacooauneein turuha urichaaunni Canu cachaneein nejanohanaa nichaaunne**  
(Mt 24.29-35, 42-44; Mr 13.24-37)

<sup>25</sup>Niritiin jetaote “Enoto, atene, arasijie, naaonjoainuri quete cojunacatein coaratenojoinereeinha. Nii jana satiin caa chauratane que nenacaauru cachaurute, nesooniha cuurureein, ‘Naaonjoanne jaunte caa aicha’ naain coitucuuurenihane jana jataain tonihaca coasinacaain fichafichanaa cucuanane coaraaincha. <sup>26</sup>Nitohanihane janate inae nitajerichaain cana rai chauratanene coaracuruhane jaun, coasinacaun acunoha cuurureein cachauru. Dedeu nenacaauru netonaite jataain nerurujuaa cuurureein. <sup>27</sup>Nii janate jataain nelatein itolere ichana nainichaaunne coaratein turuha uuhanu Canu Cachaneein nejanohanaaneein dede sacari jana uuhinne coaraa cuurureein cachauru. <sup>28</sup>Inae nitohanihane nunuhetihane jana, nii chaque tonajelanaala neeuche, inae inara que nejerenacaauru caje nichoteriquicheeinine coitucuhichene jaun,” nae jetao acaauru rai Jesoso.

<sup>29</sup>Acaauru rai niritiin jetaote, nechu jataain nainacuruhane jaanu que jetao: “Coaracuchena chuhinti *iquera* aina joanreein enuhacuru, satiin neroeeca nalone baiha <sup>30</sup>nacooauneein omaroha nalone, inae elohena que turunaa jerihane que nainaquichene. <sup>31</sup>Nii rijijieein techu inae caa caitoonjoan cojoanona que tihane bana, inae coaraquichene, nichuuntaa Cana Coanera Cojoanonaane que nainariquicheeinha.

<sup>32</sup>Esinae rauhijiriinte jaiti ooreniha caa ena nenacaauru cachaaaurune jana, satiin situha cureein caa caitoonjoan.

<sup>33</sup>Dede, chauratane, naaonjoainurite nitajiha cuurureein. Nete laen caa caitoonjoan leinjiini nitajelanaala satiin aitocoaaunne rijijieein aihane rai ne.

<sup>34</sup>Aihane jaun caohachaaain necohalajjiin, nii cajihaneein inara suujua coacuelanaala, nii ajelanaala, nii inara ichaohacha que nererojoeaeriin neeichene jianein neeuche, inae nii cojoanonaa que tihane bana, ujua cuhane foroaa chaelaine rijijieein inara foratiaa nii cojoanonaane coataa.

<sup>35</sup>Itolere sacuritaain caa chauratane que nenacaauru cachaauru ichoaate naluha cureein nitohanai. <sup>36</sup>Aihane jaun letona jatoroaain itolere cojoanonaa bana Cana Coanera bajaebajajeein neeuche. Aihate caa caitoonjoan tocoanein situhane bana, caje nichoteein, nii acaihaniji Cachaneein nejanohanaa nichaaunne acatiha raotojoeein turunaa nainequiche inara,” nae jetao caje bajaauruhane jaun aina nerelanacaauru rai Jesoso.

<sup>37</sup>Nitohaneein jetaote, jiichoonihane Teenforo asae cachaauru relain, inae nocohecane jana Oliboneein niicha curuaateuri ichatane ucuuno cuhin nihane nesururejetelu Jesoso. <sup>38</sup>Nitohaneein jetaote, janohetiin Teenforo asae cuhin, acaauru relaa Jesusone aonaa curejetucurelu satiin cachaauru.

**Jesoso mucuuruhane coina  
ita suujua tacaaauruhane**

*(Mt 26.1-5, 14-16; Mr 14.1-2, 10-11;  
Jn 11.45-53)*

**22** <sup>1</sup>Inae jorerera colane faan quihuruhane jaa cojoanonaa Fasocoo beseta catainaane jana jetaote, <sup>2</sup>Jesoso sohin joerateeuruhane coina

jetao, “Chatohaneein ichanaareta,” naain coaacure saseredotecuru curuaanaacuru aina Cana Coanera aitoonjoa que cache relaaureraauru. Nabana raajenihane mucuhin sohin jaauruhane, chatohaneein acaauru teeuruha cachaaaurune que necasacuruhane jaun.

<sup>3</sup>Nitohaneein inae sohin jaauruhane coina que nocousuujuaruhane jana jetaote, nii aina nerelanacaauru lechoonca coroataja Jodasi Isacariote neein niicha curuaateuri suujua saruha Moconajaerane jaun jetao, <sup>4</sup>batirichuru curuaanaacuru, Teenforo curuaanaacuru, naaonjoainuri coaraa cue: “Canune naaonjoaain inara rai naineeun, nii Jesoso mucuhinchene coina ecu inara turuaanunera,” naa acaauru raine coina.

<sup>5</sup>Inae niritoha acaauru raine jaun jetaote, jataain corojeein coretena jerecure. <sup>6</sup>Nii jaun jetaote, acaauru suujua rijitoejin cachaauru colane niha Jesusone cojoae, ecu Jorioocuru bijihu Jesoso tihane coina Jodasi.

**Cana Curuaanaa aina  
lenonecuruha afosotoorune**

*(Mt 26.17-29; Mr 14.12-25; Jn 13.21-30;  
Co I 11.23-26)*

<sup>7</sup>Nii jana inae jorerera colane ichanohin faan quini carenero narejeen sooruhane jaan beseta cojoanonaa Fasocoo que turuhane jaun jetaote, <sup>8</sup>Fedoro aina Joaan rai jetao:

“Chajaain Fasocoo beseta cosonaina que canaacha quine ichanihuchete que lenonichaachera,” naain jetao acaauru letoae Jesoso.

<sup>9</sup>Nii jaun jetaote:

“Chujian ichacaaunne jereeita,” naain jetao caje bajaare.

<sup>10</sup>Nii jaun jetaote:

“Inaen cuhin nii neseu turuhichene janate, baichaje cuhane acau baaiibaai-

chaain cuujiha leinjiin cachane jana eruriquicheein. Chaen loreri asae enohane reentiaain sacuuchera. <sup>11</sup>Chaen inae nii loreri asaae turuhichene, nii loreri erora rai: “Taa cana relaelate, Chariji loreri asae nena ecuha cuhane, Fasocoo beseta cosonaina que lenonereeeunni canu aina nerelana-caauru ainata, naain ii caje bajaeratera,’ naauche. <sup>12</sup>Niritocoichene janate, nii loreri coroata coarana ecuha seonjoa siricha coaratereein inara que. Chaen inae nitohaneein inara que coaratihane baiha, ecu sonaina lenonichaachene jaanu jelai rucuhечuchera,” naain jetao letoanajaen Jesoso.

<sup>13</sup>Nii jaun jetaote cuhin, nii acaauru rai aitoha Jesosone rijijieein eruuruhane jaun jetao, ecu teein Fasocoo beseta bitoaaain, cosonaina que lenonecuruhane jaanu jelai rucuhечure.

<sup>14</sup>Inae nitohaneein enoalauruhane jana jetaote turuhin, inae que lenonecuruhane jaan rijju tihane jana, rai afosotooru aina rori ichoae nelauriaa lenonecuruhane coina Jesoso.

<sup>15</sup>Nitohaneein rori ichoae nelauriaaain jetaote: “Jataaine inara aina carijieein caa Fasocoo beseta bitoaaain, cosonaina que lenonena jerenajacoon osichaaunne ajiniha. <sup>16</sup>Coatiha laen caa baiha, inae caa Fasocoo beseta bitoaaain inara aina lenonerihaaunni Cana Coaunera Cojoanonaa que turuhanune reentiaaain,” naain jetao, <sup>17</sup>curu cuhane, oba caje ichanohin bino teberiaaain Cana Coaunera bajaane baiha jetao, acaauru rai teein:

“Nocoo, inara nejesinajeein caa leruune leruuneein cooche. <sup>18</sup>Inae caa baiha nacoaaunnein caa oba caje ichanohin bino corihaaunni Cana Coaunera Cojoanonaa que turuhanunereen tiaain,” <sup>19</sup>naane baiha jetaote, faan mucuhin Cana Coaunera bajaain,

cataaun nii faan tatuhin beeeune beeeunein acaauru rai teein jetao:

“Caa inara rai canuhacha teite cajabe-reeeonein ne. Acate jianacoon neeichene coina, inara coreniha cairichanojoneein atinanohinereein. Aihane jaun, itolere bana canuneein nihanune coacuhin que lenonecuche,” nae jetao acaauru rai faan teruhin teein Jesoso.

<sup>20</sup>Niritoha acaauru rai Jesosone jana lenonecuruhane baiha jetaote, nii faan que aithane rijitoejein, acaauruhacha coheni teein jetao;

“Caa oba caje ichanohin binote, inara caohachanu que cacoichana jaohin canuhacha ichaneni icharihanuhinne cojunaca nera. <sup>21</sup>Nitohaneein caque nejeratenacaauru rai caeteraanute ena cau cana aina lenoniha ne. <sup>22</sup>Nitohaneein acaihaniiji Cachaneein nejanohanaa nichaaunne cairichaeriin neeuruhane coina, aitiin neeuruhane rijijieein aihanete ne. Nete jataain cairichaaajoaa cureein, nii caque nerotohin cacairichaerateranu,” naain jetao bino teberiaaain Cana Coaunera bajaane baiha afosotooru rai te Jesoso.

<sup>23</sup>Nii jaun jetaote, “Charijinachara toon tothaneein que nerotohin aina nejeratenacaauru rai coulurujueein cairichaeratiha cureein,” naain jetao ita caje bajaacooaure aina nerelanacaauru.

#### **Charijina jataaain nelateineein ne**

<sup>24</sup>Niritiin jetaote nejesinajeein: “Charijina caa cana caje jataaain nelateineein coanojoneein ne,” naain jetao ita caje bajaacooaure aina nerelanacaauru. <sup>25</sup>Nii jaun jetaote acaauru rai: “Cana Coaunera coitucuelanaala nenacaauru curuaanaacurute, itolere amurijiriin nena jereein cachaauru cairichaeriin neure. Niite acaauru cairichaauruhane coitucuu-

ruhane nihanatin coroaacure caohacha ichaa benajaain. <sup>26</sup>Nete laen inara naineneeiche nitohaneein neeichene. Nitohaneein nenea coacuelanaala, leeochoaauru amurijiriin nelateein nenea jeriha chuni inara cajene, leeochoaauru ere tonoraain, letoaauruhane jaan ichaain neeine. Jana chunocoha leeochoaauru letoeraneein nenea jerihane satiin rai, chachaeraneein neeine.

<sup>27</sup>Nitohanihane jaun chariji jataain nelateineein nere, nii lenonihane caina rori ichoae nelaurianaana. Ainihane nii lenone chaluherana nelateein nerihane. Aihei jerihane. Nii rori ichoae lenonihane caina nelaurianaate nii lenone chaluera amurijiriin nelateein niha nocoete.

Nena laen canu nitohanelanaala, inara letono rijijieein ena cau inara aina inaraacha latei icharaneein neeun.

<sup>28</sup>Inarate cajiniichaain necarichanaa coaraain nenajaaonquiche. <sup>29</sup>Nii jaunne itolere Curuaanaa neein nelateein nihanune caina canu cocoaain caetein niha Ofane rijijieein, inara netonai cocoaain nereunni. <sup>30</sup>Nii banate inae nii cojoananaa que turuhane bana, cajiniichaain rorihuru ichoae nelauriaain acau cohin, lenoneein, naaonjoanriquicheein. Chaen techu baaso ichacurenihane, caohacha ichacuruha lechoonca coroata laurii Isaraeli cocoaichacurune coaraain coitucuhichene caina cajiniichaain nii caina banijiaain nenea rori ichoae nelauriariquicheein, inae nii cojoananaa que tihane bana,” nae jetao aina nerelana-caaauru rai Jesoso.

#### Coitucuha nocoetenerichaain

##### Fedorone biha Jesosone

(Mt 26.31-35; Mr 14.27-31; Jn 13.36-38)

<sup>31</sup>Niritiin jetaote: “Simoon, inae Canu sacueraneein neeichene bajaa mocona-

jaera inara raane caina. <sup>32</sup>Nena ii coreniha Cana Coaunera bajaun, canu esetaaine jianeeine nihanatiin nacoauneein nelalararajiaain Canu esenetaain neeine caina. Aihana jaun, inae nacoauneein canu esenetaaine bana, inejeraaauru corootajanecuhin caohachaain laraajiin, canu esenetaauruhane jianelanaala raotojoein rachoojoein neeuruhane caina,” nae jetao Simoon rai Jesoso.

<sup>33</sup>Niritoha raine jaun jetaote:

“Curuaanaa, canune ijiniichaain caresero cuhane enohin nihanatiin ii coreniha onaa naineen,” nae jetao rai Simoon.

<sup>34</sup>Nii jaun jetaote:

“Fedoro, enene janotiin cuhanete, iriha janonaa rai ataohari curuaanaane ajiniha, nichata saain canu coitucuha nocoeteneriquin,” nae jetao Fedoro rai Jesoso.

#### Inae nichuutaa coujunojoiniha Jesosone

<sup>35</sup>Niritiin jetaote:

“Inara letoaain nihanulu coriqui curu, inara safato, inara atora, naaonjoain colane janana lanaain nihalu inara rai cha,” naain acaauru caje bajaa Jesosone jaun jetaote,

“Aihei. Coatiha nii lanaailu canacaanuu rai chata,” naain jetao tonoraare.

<sup>36</sup>Niritocuruhane jaun jetaote:

“Nete laen ena chateeinti coriqui curu siriin, natora siri, nii amaain cuhane caohachae. Chateeinti sabere sirine nii jelaronaa bana niicha jiai cajione burique necoreteein leinjiin sabere coretemiin.

<sup>37</sup>Inara raine aitoon, inae caque aitiin Quiricha inoasesi cuhane: ‘Naaonjoaain cairichaaeriinte necha aansai caseteco coaraane rai nenea ichara rijijieeinte teeurureeinha,’ naain itolereenein niritiin caque aitiin laenacuruhlune

ríjijíeein situhane rai te ne,” naa  
 acaauru raine jaun jetaote:

<sup>38</sup>“Curuaanaa, caute ne corotajaain  
 sabere,” naauruhane jaun jetaote:

“Inae nainejerichaaain niriimiin,” nae  
 jetao acaauru rai Jesoso.

**Olibo neeonjoaihu Cana Coaunera  
 bajaa Jesosone**

(Mt 26.36-56; Mr 14.32-42)

<sup>39</sup>Niritoha acaauru raine baiha  
 jetaote, ecu nesurunajaaoncane jaun,  
 Oliboneein niicha curuaateeri ichtatane  
 ucuuno cuha Jesosone jana jetao, caaijie  
 cuure aina nerelanacaauru. <sup>40</sup>Nitoha-  
 neein cuhin, inae nii Olibo neeonjoaihu  
 turuhin jetaote:

“Cana Coaunera bajaauche nabana  
 osa que nesaruquichene coataara,” nae  
 jetao acaauru rai.

<sup>41</sup>Acaauru rai niritiin jetaote, nita  
 acaauru aonajein cuhin neseeonrariin  
 jetao; <sup>42</sup>“Ofa, ii jereeine caa jataain  
 necairichanaa tabai caje canu mitaaura.  
 Nena canu jerichaaunne ríjijíeein  
 ichaaaine jereneenra. Ii jereeine  
 ríjijíeein ichaaura,” naain jetao Cana  
 Coaunera bajae Jesoso.

<sup>43</sup>Niritohane jana jetaote, dede caje  
 ecocohin lararajiaa leinjiin anjerane  
 jaun jetaote, aina suujua nunaaajoae.

<sup>44</sup>Nii aina jataain nesoonenaa cataau  
 neein jelai rutaain, Cana Coaunera  
 bajaabajaaeca Jesosone jana jetaote,  
 atanichoae tabaanaain nalue rai  
 dorooana ichananeein.

<sup>45</sup>Nitohanein inae Cana Coaunera  
 bajaane nainaan, aina nerelanacaauru  
 coaraa cuhane jana jetaote, jataain  
 cotaanaa aina inaderanaa caaun  
 sinihure. <sup>46</sup>Nii jaun jetaote acaauru rai:

“Chanuna siniiche. Chajaain  
 nimichuhin Cana Coaunera bajaauche  
 nabana osa que nesaruquichene  
 coataara,” nae jetao acaauru rai Jesoso.

**Jesosone mucuuruhane**

(Mt 26.47-56; Mr 14.43-50; Jn 18.2-11)

<sup>47</sup>Niritiin jaiti acaauru rai ereerejiha  
 Jesosone jana jetaote, turuha cuure  
 arajii cachaauru. Nii aina nerelana-  
 caauru lechoonca coroataja neein nena  
 Jodasi jetaote, acaauru ichoaichaniha  
 acaauru amaeranein cue. Aca jetaote,  
 Jesoso rohan nichuuntaain nechu  
 jataain belaicha ríjijíeein jetao rai  
 nomeri lioracae. <sup>48</sup>Nii jaun jetaote:  
 “Jodasi, belaicha ríjijíeeina nomeri  
 lioracaain nii acaihaniji cache  
 Calahineein nena teei aina nejeratee-  
 riin nenacaauru bijihute,” nae jetao  
 Jesoso.

<sup>49</sup>Inae inooneeuruhane coaraain  
 jetaote:

“Curuaanaa, coanene ii cocoaeratiha-  
 caanu sabere quera,” naaure jetao nii  
 Jesoso aina nerelanacaauru.

<sup>50</sup>Niritiin jetaote, leinjiin saseredote-  
 cucu curuaanaa letono uricho beuhite,  
 rai raotono nichajai que tacaain sabere  
 que, leinjiin nii Jesoso aina nerelanaa.

<sup>51</sup>Nii jaun jetaote:

“Inae niriimiin, coa cunaitaa,” naain  
 jetao jelaiha nii saseredotecuru  
 curuaanaa letono uricho tirichaain jetao  
 rautae Jesoso. <sup>52</sup>Nitohanein rautaane  
 baiha jetaote, saseredotecuru curuaa-  
 naacuru, Teenforo beraihurera, chaen  
 Joriocuru bichauhenaauru, Joriocuru  
 rai nelatein nenacaauru, naaonjoainuri  
 rai jetao:

“Chanuna leinjiin necha ansai  
 ausijiautoneein sonajaain joeranein  
 nihanune que airijiin sabereuru aina  
 enuhacuru uhaain canu mucuha uhiche.  
<sup>53</sup>Itolere cojoanona banara, inara aina  
 Teenforo asae nenajacoonna. Nii jana  
 nii chatohanein coatihua canu dadana-  
 jaaohiiche. Nete inae nitohanein  
 nocohena tabai osa que nesaruhin

namuritocohichene chojoanona que tihane jaun aiiche inarara,” nae jetao acaauru rai Jesoso.

**Jesoso coitucuha nocoeniha Fedorone**  
(Mt 26.57-58, 69-74; Mr 14.53-54, 66-72;  
Jn 18.12-18, 25-27)

<sup>54</sup>Nitohanein jetaote, Jesoso mucuhin saseredotecuru curuaanaa loreri asae amaauruhane jana jetao, nita caajie coarajeein jetao cuujue Fedoro. <sup>55</sup>Cuu turuhin jetaote, jelarotokane jaun, nenaanaja cataaun tein usi mocohin, curuhacaain nichaatiha neeuruhane jana jetao, Fedoro netonai cuu turuhin acaauru aina nichaatiha usi rohan lauheque. <sup>56</sup>Nii jana saseredotecuru curuaanaa coseenra-neein nena leinjiin ene jetaote, cuu usi rohan lauhequiin nichaatiha Fedorone jana, cuu coarajihane baiha jetao coujueluhin:

“Caa netonaite aina nenaane,” naane jaun jetao:

<sup>57</sup>“Ainaaunchenaate. Coatihana Jesoso coitucuhaaunche canute,” naain jetao suujue Fedoro.

<sup>58</sup>Nii baiha neeoriin jetaote, leeochoa netonai:

“Caa netonaite acaauru aina nenaanera,” naane jaun jetaote;  
“Ainaaunnaate, coatihana aca nihaaunte,” naain jetao nii cacha tonorae Fedoro.

<sup>59</sup>Nii baiha carajaojoaain jetaote, coaiteen leeochoa netonai;

“Esinae rauhijiriin caa cacha netonaite, aina nenaane. Nii choae tacaain techu Calileea cocoaichanera,” naane jana jetao:

<sup>60</sup>“Coatihana nii carai chaitoonjoan cacha coitucuhaaunte,” nae jetao nii cacha rai Fedoro. Niritiin jaiti ereerejiha Fedorone jana, nii rijieeoritiin iriha ataohari curuaanaane jana, <sup>61</sup>jaotoroaaain Fedoro coaraa Jesosone aina jetaote: “Enene chojanotiin cuhanete, nichata saain

cacoitucuha nocoetelanaala nesuujueeine jana ererein ataoharicha,” naa Jesoso raine coacuhin nainaain jetao, <sup>62</sup>nii neeurunaja loreri caje mituhin jetao jataain obajeein chanae Fedoro.

**Jesoso que ninichaajeeuruhane**  
(Mt 26.67-68; Mr 14.65)

<sup>63</sup>Nitohanein nii Jesoso mucuu-ruhane jana beraiha nenacaauru cachaauru jetaote, que ninichaajeein faohacure. <sup>64</sup>Nitohanein faojoaain jetaote, nota conajaain:

“Aihane esinae rauhijiriin *profetaneine* caa ii soera coitucura,” naainchuru jetao sohin, <sup>65</sup>jataain que ereinchuru nocoje chanuure.

**Jataain Jorioocuru rai nelateein nenacaauru *Junta Suprema* acatiha niha Jesosone**  
(Mt 26.59-66; Mr 14.55-64; Jn 18.19-24)

<sup>66</sup>Nitohanein tein jetaote, inae janohane jana, ita taojiaaure Jorioocuru coaraneein nenacaauru bichauhenaauru, chaen saseredotecuru curuaanaacuru, Cana Coanera aitoonjoa que cacha relaaure-raauru, naaonjoainuri, jataain Jorioocuru rai nelateein nenacaauru *Junta Suprema* acatiha amaauruhane coina. Nitohanein amaain inae cuu turuhaain jetaote:

<sup>67</sup>“Esinae rauhijiriin Mesihasi neeine canacaanu rai beeune coitucuhaca-nura,” naaunruhane jaun jetaote:

“‘Aca nichaaunchujian,’ naanune nihanatiin, nii quesenetareeichene coalanaalata. <sup>68</sup>Nii inara caje erenaajanaanune nihanatiinchu catoonrariquichene coalanaalata. <sup>69</sup>Nena laen inae, enene caje coaanein, itolere Coaneraneein nelateein nena Cana Coanera raotono nichajai que nelauriaa cureeinni, canu acaihaniji cachanein nejanohanaa nichaaunnera,” nae jetao acaauru rai Jesoso.

<sup>70</sup>Niritoha acaauru raine jaun jetaote, satiin:

“Aihane jaunna, ii Cana Coaunera Calaoherinei,” naauruhane jaun jetao:

“Esinae rauhijiriinte acanichaaunne que aitocoichera,” nae jetao acaauru rai Jesoso.

<sup>71</sup>Niritoha acaauru raine jaun jetaote: “Cha nenacaaneenin cana rai berana laterihacache, inae raajenhane nujuuae caje acanihane que aithane aonacaache natiin,” naaure jetao.

#### Jesoso coulurejeeuruha Filato raine

(Mt 27.1-2, 11-14; Mr 15.1-5; Jn 18.28-38)

**23** <sup>1</sup>Niritiiti jetaote, satiin nimichucutaain coineteen mucuhin jetao, Filato rene Jesoso amaaure. <sup>2</sup>Ecu turuaain jetaote, Filato acatiha teein Jesoso coulurujeere:

“Caa cachane eruhacaanu, caa cana atane que nenacaauru cachaauru suujua rohecaain, cana curuaanaa Romano-curu curuaanaa enferadoro rai coriqui tihacache caohatein, ‘Aca jete nii canaacha cohajei Rey Mesihasi ne,’ naain cachaauru suujua auhacaane jana,” naain jetao coulurujeere.

<sup>3</sup>Niritiiti coulurujeeruhane jaun jetaote, “Tina chuhisi Jorioocuru Curuaanaa Rey ineei,” naain caje bajaa Filatone jaun jetaote: “Esinae rauhijiriin acanichaaunne quiete aithicha,” nae jetao rai Jesoso.

<sup>4</sup>Niritohane jaun jetaote, saseredotecuru curuaanaacuru, chaen ecu neein aonajeeurera cachaauru, naonjoainuri rai jetao:

“Coatiha chatohanein baaso ichaa caa cachane coarahaan canuta,” naa acaauru rai Filatone jaun jetaote:

<sup>5</sup>“Nete cachaauru relaane aina cuaain satiin cachaauru suujua auhacae. Nitohaneinte Calileea batane caje nunuhetein, caa Jodea batane netonai que jerichanejein ichana jerera,” naain jetao jataain acaauru esenetaa Filatone jerein counujeere.

#### Erodesi rene Jesoso letoaa Filatone

<sup>6</sup>Niritocuruhane aonaain jetaote: “Calileea cajena nenaana caa cachate,” naain jetao acaauru caje bajae Filato.

<sup>7</sup>Niritiiti acaauru caje bajaane jana, “Aca chujianrana,” naauruhane jaun jetaote, Calileea coberenadoroneein bana niha Erodesine jaun rene letoae Filato, nii bana nii Jerosaleeun turuhin niha nii Erodesine jaun. <sup>8</sup>Nitohanein Jesoso letoaa Filatone jana coaraain jetaote, jataain rachoojoe Erodesi, cojoelanaacojoai ichaane coitucuhin, acaentonai Jesoso coarana jeretohane jana rene letoaaauruhane jaun.

<sup>9</sup>Nii jaun jetaote, arai saain niqui, “Chatohanein nena neein,” naain caje bajae Erodesi. Nejetaote, nere tonorana jerene Jesoso. <sup>10</sup>Nii nainiha jetaote, ecu neeure saseredotecuru curuaanaacuru, chaen Cana Coaunera aitoonjoa que cacha relaaureraauru, naaonjoainuri, jataain acaauru esenetaain, Jesoso cairichaa Erodisine coina counujein coulurujiha neeure. <sup>11</sup>Nitohanein nere tonorana jereniha Jesusone jaun jetaote, coetaain rai soodarooru aina jiniinquin nocoeje chanuhin jetao cairichaa, nocoreeteeruha *rey*churune jaan tocohanai cajione que jetao Jesoso cajione corerate Erodesi. Nitohanein tein jetaote, nacoaanein Filato rene letoae Erodesi. <sup>12</sup>Nitohanein Jesoso cairichaaauruhane bana caje coaanein jetaote, ita que nejerateeriin neeuruhane baiha jetao, ita belaihaneein neeure Filato aina Erodesihuru.

#### Jesoso atinaauruhane coina rucuhecuruhane

(Mt 27.15-26; Mr 15.6-15; Jn 18.39-19.16)

<sup>13</sup>Nitohanein Filato rene letoaa Erodesine jana jetaote, saseredotecuru curuaanaacuru, chaen cocoaainacaihuru, satiin ecu nenacaauru cachaauru, naonjoainuri taojiaain jetao:



<sup>14</sup>“Inarate canu rene caa cache turuaa uhiche, ‘Cachaauru suujua roeroacaain jete, cachaauru suujua auhacae,’ naain coulurujeein. Nena caraajenhane inara acatiha tein caje bajaunune janate, nii chatohaneein cotainacai ichaain, nii coulurujeechene jaa lera coitucue-neeun. <sup>15</sup>Niheichu caa cana rene jelaiha letoera Erodesi nihanatiin, nii chatoanai ichaane jaa lera coitucui. Aihane jaun inae coarquiche inara, nihei nii chatoaneein cairichaain ateinaacachene jaan lera. <sup>16</sup>Raujiaainchane casetecaain nii baiha jianereunni, <sup>17</sup>Fasocoa beseta naineein niha coulurujuenojoine, nirijieein jianenajaoncaanne rijijieein,” naa acaauru rai Filatone jana jetaote, <sup>18</sup>satiin ita rijitiin jachaatorohaain jetao:

“Jiaohine. Jiaonriha nii Jesoso jianeeinera. Nii Barabasi jianeeujian laenra,” naure jetao Filato rai Jorioocuru.

<sup>19</sup>Nii Barabasi jetaote, caresero cuhane enohaaure, nii neseu Romano-curu que nejerateein, acaauru aina sonaana que neein leinjiin cache sohin jaohane coreniha. <sup>20</sup>Nitohaneein nii chatohaneein Jesoso cairichanaa jerenihane jaun jetaote, nirijieein jianihane coina jetao niqui, nacoaau-neein acaauru rai ere Filato.

<sup>21</sup>Nejetaote, jataain tonijiaain jeelai rutaain jachaatoroaain jetao:

“Letonanocoriin coroso que teute ecu neein ohinera,” naure jetao ita rijitiin.

<sup>22</sup>Niritocuruhane jaun jetaote:

“Chatohanai baasonajian ichae. Coatiha cairichaain atinaanune coina chatohaneein baaso ichaain nihane coarahaan canuta. Raujiaainchane casetecaain, nii baiha nirijieein jianereunnicha,” nae jetao acaauru rai Filato nichata saain.

<sup>23</sup>Niritoha acaauru raine jana jetaote, jachaatoraaain ehequiin jetao, “Coroso que tihachaaura,” naauruha araai saaine cotabeniha jetaote, <sup>24</sup>nii aitocuruhane rijijieein jetao ichae Filato. <sup>25</sup>Nitohaneein jetaote, nii Romanocuru que nejerateein sonaana que neein sonajaain joaera caresero cuhane nena, acaauruhacha jianeratei cache mitaain jetao acaauruhacha jerei rijijieein jetao, acaauru bijihu Jesoso te Filato.

#### Coroso que Jesoso teeuruhane

(Mt 27.32-44; Mr 15.21-32; Jn 19.17-27)

<sup>26</sup>Nii jaun jetaote, coroso que Jesoso teeuruhane coina, amauruhane jana, situujiha cuha leinjiin cache Sirene caje unaa Simoonne jaun jetaote, cotijiaain que nii Jesoso teeuruhane jaanu coroso baijiaeratecure. Nii jaun jetaote Jesoso caaijie, nii coroso teeuruhane jaanu amae. <sup>27</sup>Nitohaneein amauruhane jana jetaote, arajii enecuru, quichaauru, naaonjoainuri jetao, caaijie cuure. Nii caaijie cunacaauru jana cunacaauru enecuru jetaote, cojioriin chanaaure Jesoso coinadera. <sup>28</sup>Nii chanaauruhane jana acaauru coaraain jetaote:

“Jiaonriha cacoreniha chanaaichenera Jerosaleen benecuru. Inara bereecuru, inara jaberoco, naaonjoain coreniha chanaauchera. <sup>29</sup>Inae nerichaain inara cairichaauruhane jaan cojoanonaa. Nii banate: ‘Caohatoriha canaanai sirilanaala nihacachene niqui,’ nariquicheein. <sup>30</sup>Nii banate ichtatane ecuunooru rai, ‘Canacaanu ichoae neranu,’ naa cuurureein cachaauru. Jana atane rarorooru raite, ‘Canacaanu asihu,’ naaurureein. <sup>31</sup>Coaracuche nachuhinti chatohanai baaso ichaain nenihanune sainejeein catohaneein caetecuruhane. Nii jaun chatohaneein teinti inara teurureein inae amuhanune baiha,” nae jetao acaauru rai Jesoso.

<sup>32</sup>Nii Jesoso jiniichaain jetaote, coroatajaain necha aansai baaso icharaauru cachaauru amaaure, sohin ateinanajaauruhane coina. <sup>33</sup>Inae nii “Couturi Bejero” neein acaauruhacha curuaateihu turuhin jetaote, coroso que Jesoso aina jiniiquiin nii coroatajai necha aansai baaso icharaauru teeure. Leinjiin jetaote, Jesoso najaabiji nichajai que teeure. Jana leeochoa jetaote, raotono nichajai que teeure. <sup>34</sup>Nitohaneein coroso que teeuruhane jana jetaote:

“Caa catohaneein caetecuruhane coreniha, acaauru que ii suujua acateura Ofa, cha coitucuurenihane jaunte aihurera,” nae jetao Jesoso. Nii jana jetaote, ecu nejesinajejin ita rai Jesoso cajione chaluure soodarooru. <sup>35</sup>Nitohaneein teeuruhane jana jetaote, ecu neein coarajejeure cachaauru. Nii nainiha jetaote, cocoinanacaaihuri netonai:

“Chajaain aihane ena esinae rauhijiriin Cana Coaunera tenojoi Mesiha-sineein niicha janijineein nihane, raajenihane rai jaberoco ichoteratemiin leeochoaauru ichoteratihane rijijieeinte coaracaachera,” naaure jetao nechu jataain cairichaa que ninichaajia.

<sup>36</sup>Nii jana soodarooru netonai jetaote, Jesoso que ninichaajejin nechu jataain cairichaa rohan nichuutaacoaain jetao, bino elorajiojoaain nena que jetao cocoaain:

<sup>37</sup>“Aihane esinae rauhijiriin Jorioocuru rai Rey neeine, ichaajenihane ijiabereeo ichoterateeune coaracaanura,” naaure jetao rai.

<sup>38</sup>Nitohaneein coroso que teein jetaote, rai bichoeniha tein jetao: “Caate Jorioocuru rai Reyneein ne,” naain laenacure.

<sup>39</sup>Nii jana nii necha aansainein coroso que nena cacha coroataja

jetaote, nechu jataain cairichaa cotaiha jetao:

“Aihane esinae rauhijiriin Mesiha-sineeine, ichaajenihane ijiabereeo ichoterateeute coaracurumiin, chaen canacaanune maajejin ichoterateeune coaracaanura,” naane jana jetaote: <sup>40</sup>“Coo niritoha. Tana ichasetecari-chaain Cana Coaunera coasiine. Itonai rijijieein caseteconeein neeinatinachura aitohite. <sup>41</sup>Canatejian esinae rauhijiriin itolerenein baaso ichacaane coreniha necairichaecaa cau. Jana caa cacha, nii chatohanai baaso ichaain nihane coreniha caa aihei,” <sup>42</sup>naane baiha jetao:

“Canu coaacuhin ii Cojoanonaa que neeine banara Jesoso,” naa nii baaso icharaauru coroso que nena leeochoane jana jetaote:

<sup>43</sup>“Eneete esinae rauhijiriin raotojoejin ichaonaana jaun caniha neriquincha,” nae jetao rai Jesoso.

#### Oha Jesusone

(Mt 27.45-56; Mr 15.33-41; Jn 19.28-30)

<sup>44</sup>Nitohaneein inae ohane rai niha Jesusone jana jetaote, enoto chujutora caje coaunejin jetao, caohachanainejejin nocoananejin nedae satiin chauratane, nuna macohi ichoae teejija enotoneretiain.

<sup>45</sup>Nitohanihane jana jetaote, neleruhin nesoaihacoe nii Teenforo leruera cajione, ecu bujuanejin nena.

<sup>46</sup>Nii jana jetaote, jataain tonijiaain auhaqiin jetao:

“Ti bijihune canu suujue teunra Ofa,” naain jetao inae ohe Jesoso.

<sup>47</sup>Nii jana ecu beraiha nenacaauru Roma rai sondarooru cafitaain jetaote, Cana Coaunera coroajejin jetao:

“Esinae rauhijiriinte, nii chatoanai baaso ichaain nenecaiha caa cachara,” nae jetao.

<sup>48</sup>Nitohanihane jana ecu satiin neein coarajeeurera cachaauru jetaote, nesoone caaun rai nalarijia faojaain jelai caje cauhacoaure. <sup>49</sup>Nejetaote, satiin nii Jesoso coitucuureraauru, chaen Calileea caje coauneein sacuurera enecuru, naaonjoainuri jetao ecu neein coarajeeure jelai caje amuelanaala nita netiin.

**Ajeri jachu cuhane Jesoso jaberoco rucuhecuruhane**

(Mt 27.57-61; Mr 15.42-47; Jn 19.38-42)

<sup>50-51</sup>Nii jana jetaote, ecu ne leinjiin cacha Jodea batane que nena Arimatea cocoaichanein nena Jose. Aca jetaote, caohacha cachanein, satiin Jorioocuru rai nelatein Jorioocuru coaranein nenacaauru- *Junta Suprema* tabanein nihane sainejeen, turuha uha Cana Coaunerane Cojoanonaane cohajihane jaun jetao, nitohanein nii Jesoso teeuruha nii rai leeochoaauru *Junta Supremacurune* rautaain coaraene. <sup>52</sup>Nii Jose jetaote, Filato caje Jesoso jaberoco bajaa cue, rucuhacane caina. <sup>53</sup>Nitohanein bajaain jetaote, coroso caje fauhin jetao, shojoera que conajaain jetao, jaiti chuni onaa teurenihane jaan ichtatane ramara que nena ajeri jachu cuhane jetao rucuhaca cuure. <sup>54</sup>Nitohanein jetaote, inae nunuheneelalajihane nebetacanaa cojoanonaane jaun, inae niicha ichanenu ichana nainecuruhane nainejeen jetao, luhecaain nii Jesoso rucuhacure.

<sup>55</sup>Nitohanein Jesoso jaberoco rucuhaca cuuruhane jana jetaote, acaauru aina cuure Calileea caje coaunein jiniichain unacaauru enecuru. Nitohanein cuhin jetaote, caohachaaain rai jaberoco rucuhacuruha ajeri jachu cuhanene coaracure.

<sup>56</sup>Nitohanein ajeri jachu cuhane rai jaberoco rucuhacuruha jana

caohachaaain coaracuruha baiha jetaote, nenajaun cauhin jetao, meetoon rijijieen jujuaain nena ichacuruha nainaain jetao, Quiricha inoensi cuhane aitoha Cana Coaunerane rijijieen, nebetacanaa cojoanonaa bana nebetacaure nii enecuru.

**Oo caje ichanaa Jesosone**

(Mt 28.1-10; Mr 16.1-8; Jn 20.1-10)

**24** <sup>1</sup>Nitohanein nebetacaauruhane cojoanoo janohetiin jetaote, nii teeuruhane jaan ajeri jachu coaraa cuure nii acaauruhacha ichai jujui amaain nii enecuru. <sup>2</sup>Ecu turuhin coaracuruha jana jetaote, elonanohi ne nii ajeri jachu fuuruhane jaa ajeri jaberoco. <sup>3</sup>Nii jana enohin coaracuruha jana jetaote, inae ecu Cana Curuaanaa Jesoso jaberoco eruurene.

<sup>4</sup>Nii jaun jetaote, niicha ichanenu coitucuelanaala nesooneetooruhane jana jetao, somaratohanai que cajionequini, ecu luhecotariin acaauru aina ecocohin temeenete coroatajai cacha. <sup>5</sup>Nii coaraain jetaote, nesoone caaun, suujua acatecuruhane coaratihane nenoracaauruhane jana jetao:

“Chanuna onacaauru jana, ichaohin nena ariiche inara. <sup>6</sup>Inae ichanaane jaun, coatihane cau nihei. Tana Calileea inara aina nihane bana inara rai: <sup>7</sup>Acaihaniji cachanein nejanohanaanein nenaate, necha aansainein ichaonacaauru rai tenojoinein niha cureein. Nii janate coroso que tein ateinaa cuururein. Nete nichata janohane cuhane ichanarein, narejeto inara raine que nainaquichene-neta,” naaure jetao ecu eoonacaauru cachaauru.

<sup>8</sup>Niritocuruha acaauru raine que nainaain jetaote, acaauru rai aitoroetoha Jesosone coaacure. <sup>9</sup>Nitohanein inae nainaain, nii atane bana caje jelaiha cauhin jetaote, jitariin nii acaauruhacha

coarai biha jetao cuure lechoonca leinjiin afosotooru rai, chaen satiiin acaauru aina nenacaauru cachaauru, naaonjoainuri rai. <sup>10</sup>Nitohaneein coaraain afosotooru rai biha cunacaauru jetaote, Maadala bene Mariha, chaen Joana, chaen Saantiaao neba Mariha, chaen leeochoauru enecuru acaauru aina cunacaauru, naaonjoainurine. <sup>11</sup>Nitohaneein turuhin beeuruhane jana jetaote, acaauru esenetana jerecurene afosotooru. <sup>12</sup>Nejetaote, nii acaauru esenetaaurenihane sainejeein soroneein jeluhariin cuhin turuhin, nii atane bana cuhanai coaraa Fedorone jana jetao, nii conaacuruhane jaa shojoeraacha ecu codoheque. Nitohaneein shojoeraacha eruhane jaun jetaote, jataain cojoelatiin jelaiha nenaanajaun cauha cue Fedoro.

**Emaoso nese coero cuhane cuuruhane**  
(Mr 16.12-13)

<sup>13</sup>Nii bananeein jetaote, enoto chujutora rijiu fautaain amunaanaja itaanejeein nii Jerosaleen caje nena Emaoso neseu jetao, cuure coroatajai Jesoso aina nerelana-caauru. <sup>14</sup>Nitohaneein Jesoso ateinaaauruhane que ereerejeein bero cuhane cuujeeuruhane jana jetaote, <sup>15</sup>jaiti que ereerejeeuruhane jana, acaauru rohan nichuutaain jetao, acaauru aina bero cuhane cuujue Jesoso. <sup>16</sup>Nejetaote, acanihanane coitucurene, acanihanane coitucuuruhane jereniha Jesosone jaun. <sup>17</sup>Nitohaneein jetaote, acaauru rai:

“Chaaquena bero cuhane ereerejeein cuujueeiche,” naa acaauru rai Jesosone jaun jetaote, ecu inaderatonanaain inacuhin jetao:

<sup>18</sup>“Ii netonai Jerosaleeun neeinatiinna: ‘Naaonjoain ichacuruha caa janonaacha cuhanera,’ naain coitucueneeite,” naain tonoraa nii bero cuhane cuujuenaa coroataja Cureeofasine jaun jetaote:

<sup>19</sup>“Chatohaneeuruhanaate aitoi,” naane jaun jetao:

“Nasarete cocoaicha Jesoso, satiiin cachaauru notaracae nere que irihane naitoonjoan ichaain, itolere que laraajiiin Cana Coauneraacha letoai *profetaneein* nihanatiinte <sup>20</sup>Romanocuru rai coulurujueeure saseredotecuru curuaanaacuru, chaen cana rai cocoina-nacaihuri, naaonjoaihunri, coroso que teein ateinaaauruhane caina.

<sup>21</sup>Canacaanune niqui, cairichaerino-joineein neeuruha Isaraeli cocoaicha nichaachene ichoteratihane cohajihacaanu. Nete inae nichata janoha nitohaneein ateinaaauruhane saijieein, <sup>22</sup>canacaanu aina nenacaauru enecuru tabaauru, janonaa aonaain cuhin natane bana coaraa cuuruhane jana, <sup>23</sup>ecu Jesoso jaberoco eruurenihane jaun, jelaiha nenaanajaun cauhin canacaanu rai beein canacaanu socoinaure. Acaauru rai ecocohin jete: ‘“Coatilha cau nihei Jesoso jaberoco, inae oo caje ichanaane jaunta,” naaunre anjeraauru,’ naain beure. <sup>24</sup>Niritocuruha turuhinne jaunte, canacaanu caje nenacaauru tabaauru netonai cuhin, nii atane bana coaraa cuure. Nii janate chuhisi, nii aitocuruha enecurune rijijieein, inae ecu nene Jesoso jaberoco. Niheichu nii Jesoso nihanatiin coaracuruhi,” nae jetao rai Cureeofasi.

<sup>25</sup>Niritohane jaun jetaote acaauru rai: “Chanuna cha esenetana jerelanaala, nii aitocuruhalu *profetacurune* coacuhin esenetana jereneeiche. <sup>26</sup>Tana jauriaanejeein dedeeu cusihane ajiniha, catohaneein necairicharichaain Mesihasinane coitucuhicheneta,” naane baiha jetao, <sup>27</sup>Moisesa quiricha caje coaunein nunuheteein jetao, que aitiin laenacuruhalu *profetacurune* beebejeein jetao, acaauru rai ereereje Jesoso.

<sup>28</sup>Nitohaneein nii cuuruhane jaan, Emaoso neseu turuuru jana jetaote, rauhijiriin situujiha cunaa rijijieein cuujue Jesoso. <sup>29</sup>Nejetaote:

“Cauna canacaanu aina nesuruure. Inae jataain sohane jaun nocohejia natiin,” naain jetao chunaaure. Nitohaneein chunaauruhane jaun jetaote, ecu acaauru aina nesurue Jesoso.

<sup>30</sup>Nitohaneein acaauru aina nesuruhin jetaote, lenonecuruhane coina nelauriaauruhane jana jetao, faa teberiaain Cana Coaunera bajaane baiha jetao, acaauru rai beeeunebeeinein te. <sup>31</sup>Nitohaneein faan tihane que nainaaain jetaote, Jesoso nihane coaraain acanilhane coitucuuruhane jana jetao, inae acaauru caje jianatoroaaain amue.

<sup>32</sup>Nitohaneein jianatoraaain amuha acaauru cajene jana jetaote: ecu jelai nedaain ita rai nejesinajeein,

“Esinae rauhijiriin acanilhane jaun jiara bero cuhane ujueein, ereerejia Cana Coaunera Quiricha inoaensi quene jana, aca netoojoaain naonae cana suujua cuhanaina,” naaure jetao ita rai.

<sup>33</sup>Niritocuruhane baiha jetaote, caeneenejelanaala jelaiha bero cuhane soroneein cuhin Jerosaleen, ita taojiaain neeuruha lechoonca leinjiin nenacaauru afosotooru aina acaauru leeochoaurune jaan cauha cuure. Inae nii Jerosaleen nenacaauru rene turuuruhane jana jetaote:

<sup>34</sup>“Esinae rauhijiriinte inae ichanae Cana Curuaanaara, Simoon raite inae ecoocera,” naain jetao acaauru rai beeure.

<sup>35</sup>Niritocuruha acaauru raine jana jetaote, bero cuhane acaauru rai netonai ecocohin acaauru aina cuujihane beein, acaauru aina lenoneein faan teberiaain, Cana Coaunera bajaain acaauru rai tihane que nainacuruhane beeure jetao nii acaauru ajiniha netaojiaain nenacaauru rai, nii coroatajaihuri Emaoso coero cuhane cunacaauru.

**Aina nerelanacaauru rai ecooca Jesosone**  
(Mt 28.16-20; Mr 16.14-18; Jn 20.19-23)

<sup>36</sup>Niritiin acaauru rai bero cuhane ecoocane que jaiti ereerecuruhane jana

jetaote, luhecotariin acaauru cataaun neoritiiin:

“Raotojoein neeuche,” naa acaauru rai Jesosone jaun jetao: <sup>37</sup>“Rai corii jecha coaracure,” naauruhane jaun jetao jataain nesoonetoore. <sup>38</sup>Nitohaneein nesoonetooruhane jana jetaote:

“Chanuna jataain nesoonetohiche. Chanuna nainanacharanejeein, baasoneein inara suujua cuhane coaauquiche. <sup>39</sup>Cacoiichuru, catihacuru, naonjoaihunri coaracuchenachuhiti, jeelai cajabereeneeinte neeure caa cajabereecuru. Cajabereeo mucuhin cacoharaauche. Leinjiin onaa corii, caa cacoaraaichene tocoaneein bucuhin, jaberoconein nichaauraaain nenea naineriheita,” nae jetao acaauru rai Jesoso.

<sup>40</sup>Niritiin jetaote, coroso que teein, rai tija, biji, naonjoain curuabaauruhane jaacuru coarate acaauru que. <sup>41</sup>Nejetaote, jataain esenetana jerecurene, jataain chojelatiin rachoojoeeuruhane jaun. Nitohaneeuruhane jaun jetaote:

“Tana cau enohalanohineein niha cau chaelai lenone nijine,” naain acaauru caje bajaane jaun jetao,

<sup>42</sup>niha ate basicuhone jaun, rai teeuruhane jaun jetao, <sup>43</sup>ecu acaauru notaracae netiin que lenone. <sup>44</sup>Nitohaneein lenonihane baiha jetaote acaauru rai:

“Caa catohaneein caetecuruhanene quene inara rai berejetoonu, jaiti canu atinaaurenihane jana inara aina nihanune bana. Inae catoaneein caetecuruhane coina, rai quiricha cuhane itolereneein caque aitiin laenaalu Moisesane nainaaain, chaen aitiin quiricha cuhane laenacuruha *profetacuru*, Salmo naonjoain cuhanene rijijieeine inae nainaaun,” naa acaauru raine baiha, <sup>45</sup>Cana Coaunera Quiricha inoaensi cuhane aitoane rijijieein acaauru que coitucuherteiin jetaote:

<sup>46</sup>“Laenanohineeinte ne, canu Mesihasi nichaaunne ohanune baiha, nichata janohane cuhane ichanacaaunne que. <sup>47</sup>Aihana jaun, canuhacha cocoainanohineein Jerosaleen caje nunuhetein, satiin atanecuru sacuritaain cachaauru rai, ‘Esinae rauhijiriinte, coreniha ichoterate-nohineein nerichaacheein,’ naain beeuchete, nacoaauneein Cana Coaunera coacuhin suujua coreein neeuruhine acaauru osa caje acaauru ichoteratiha Cana Coaunerane coina. <sup>48</sup>Inarate caa ohanune caje ichanacaaunne coaraneein neeiche. <sup>49</sup>Canune inara rai Ofa aitoonjoalu tereeeni. Aihane jaun, jiaonriha caa Jerosaleen caje amuhiche, laraajiin neeichene jaanu dede caje unaa

raaichene reeitihaaineta” nae jetao acaauru rai Jesoso.

**Dedeeu cauha  
cuha Jesosone**  
*(Mr 16.19-20)*

<sup>50</sup>Niritoha acaauru raine baiha jetaote, Jerosaleen caje amanajaain jetao, Betaniau turuanajaain, ecuun biji sijirichaain jetao acaauru cojiotae. <sup>51</sup>Nitohanein acaauru cojiotaain coroaenaacane baiha jetao, inae dedeeu cauha cue, ecu acaauru ratiriin. <sup>52</sup>Nii jana jetaote, ecu Jesoso coroaecuruhane baiha, jataain rachoojoein jelaiha Jerosaleeun cauha cuure. <sup>53</sup>Nitohanein cauhin jetaote, itolere bana Teenforo asae Cana Coaunera coroaerejetecurelu.